

मती रचित सुसमाचार

ईसू क बंसावली

(लूका 3:23-38)

- 1 ईसू मसीह क बंसज वृच्छ अहइ। इब्राहीम क बंसज दाऊद क पूत ईसू मसीह अहइ।
- 2 इब्राहीम क बेटवा इसहाक। इसहाक क बेटवा याकूब। याकूब क बेटवन यहूदा अउर ओकर भाइयन।
- 3 यहूदा क बेटवन फिरिस अउर जोरह। (ओनके महतारी तामार।) फिरिस क बेटवा हिड्रोन। हिड्रोन क बेटवा एराम।
- 4 एराम क बेटवा अम्मीनादाब। अम्मीनादाब क बेटवा नहसोन। नहसोन क बेटवा सलमोन।
- 5 सलमोन क बेटवा बोअज। (बोअज की महतारी राहब।) बोअज क बेटवा ओबेद। (ओबेद की महतारी रूथ।) ओबेद क बेटवा यिसै।
- 6 यिसै क बेटवा दाऊद राजा। दाऊद क बेटवा सुलैमान। (सुलैमान की महतारी उरिय्याह की पत्नी।)
- 7 सुलैमान क बेटवा रहबाम। रहबाम क बेटवा अबिय्याह। अबिय्याह क बेटवा आसा।
- 8 आसा क बेटवा यहोसाफात। यहोसाफात क बेटवा योराम। योराम क बेटवा उज्जियाह।
- 9 उज्जियाह क बेटवा योताम। योताम क बेटवा आहाज। आहाज क बेटवा हिजकिय्याह।
- 10 हिजकिय्याह क बेटवा मनस्से। मनस्से क बेटवा आमोन। आमोन क बेटवा योसिय्याह।
- 11 योसिय्याह क बेटवन यकुन्याह अउर ओकर भाइयन।

(इब्राइल क मनइयन क कइदी बनाइ के बेबीलोन लइ जांत क समइ उ दुइनउँ जनमेन।)

- 12 बेबीलोन में ल जाए क पाछे: यकुन्याह क बेटवा सालतिएल। सालतिएल क बेटवा जरुब्बाबिल।
- 13 जरुब्बाबिल क बेटवा अबीहूद। अबीहूद क बेटवा इल्याकीम। इल्याकीम क बेटवा अजोर।
- 14 अजोर क बेटवा सदोक। सदोक क बेटवा अखीम। अखीम क बेटवा इलीहूद।
- 15 इलीहूद क बेटवा एलीआजर। एलीआजर क बेटवा मत्तान। मत्तान क बेटवा याकूब।
- 16 याकूब क बेटवा यूसुफ। यूसुफ मरियम क पति। ईसू क महतारी मरियम। ईसू मसीह कहा गवा।

17इ तरह इब्राहीम स दाऊद ताई चउदह पीढ़ी बीत गइन। अउर दाऊद स लइके कइदी बनाइके बेबीलोन पठए जाइ तलक चउदह पीढ़ी। अउर कइदी बनाइ के बेबीलोन पठए जाइ स मसीह क जनम ताई चउदह पीढ़ी अउर भइन।

ईसू मसीह क जनम

(लूका 2:1-7)

18ईसू मसीह क जनम इ तरह भवा: जब ओकर महतारी मरियम क यूसुफ क साथ बरिच्छा भइ तउ बियाहे स पहिले ही पता लगि गवा कि उ पबित्तर आलिमा क सक्ती स ओकर गोड़ भारी होइ ग। 19मुला होइवाला ओकर भतार यूसुफ एक ठु बड़िया मनई रहा। उ इ बात क खोलिके बतावइ स बदनम नाहीं होइ चाहत रहा। तउ उ मने में ठानि लिहैस कि उ वरिच्छा क चुप्पे स पक्का न होइ दे। 20फिन जबहें उ इ बारे में सोचत रहा कि उ सपने में आपन समन्वा पभू क दूत परगट होत ओसे कहेस, "हे यूसुफ, दाऊद क बेटवा, *मरियम क पत्नी

दाऊद क बेटवा दाऊद क परिवारे क मनई, इब्राएल क दूसर राजा, मसीह क 1000 बरिस पहिले।

बनवइ स जिन डेरा काहेकि जउन बचवा ओकरे गरभ में अहइ, उ पवित्तर आतिमा क अहइ। ²¹उ एक पूत क जनमी। तू ओकर नाउँ ईसू धरया काहेकि उ आपन मनइयन क पापन स उद्धार देई।”

²²इ सब कछू यह बरे भवा ह कि पर्भू नबी स जउन कछू कहवाएस, पूरा होइ: ²³“सुना, कुँआरी कन्या गोड़े स भारी होइके एक बेटवा क जनमी। ओकर नाउँ इम्मानुएल रक्खा जाई।” * (जेकर अरथ अहइ, “परमेस्सर हमरे लगे बाटइ।”)

²⁴जब यूसुफ नींद स जागि गवा तउ उ उहइ किहेस जउन जेका करइ क पर्भू क दूत ओका हुकुम दिहेस। उ मरियम क बियाहीके आपन घरे लइ आइ। ²⁵मुला उ जब ताई उ पूत क जनम नाहीं दिहेस तब ताई यूसुफ ओकरे लगे सोएस नाहीं। यूसुफ बेटवा क नाउँ ईसू रखेस।

पूरब स बिद्वानन क आउब

2 यहूदिया क बैतलहम में अब ईसू क जनम भवा तबहिं हेरोदेस राज्य करत रहा। कछू समइ बीत जाइ क पाछे कछू बिद्वान जउन नछत्रन क बारे में पढत रहेन, पूरब स यरूसलेम आएन। ²उ पचे पूछेन, “नवा पइदा भवा बचवा कहाँ बाटइ जउन यहूदियन क राजा अहइ? हम ओकरे नछत्र क अकासे में देखा ह। यह बरे हम पूछत अहीं। हम पचे ओका आराधना करइ आइ अहीं।”

³जबहिं राजा हेरोदेस इ सुनेस तउ उ बहोतइ बेचइन भवा। ओकरे साथे यरूसलेम क सब मनइयन फिकिर करइ लागेन। ⁴तउ उ यहूदी समाज सब मुख्ययाजकन अउर धरम सास्तिरियन क एकट्ठा कइके उ पचेन स पूछेस कि मसीह क जनम कहाँ होइ क अहइ?

⁵उ पचे ओका बताएन, “यहूदिया क बैतलहम में। काहेकि नबी पवित्तर सास्तरन में इ तरह लिखे बाटइ:

⁶ “तू बैतलहम यहूदा क धरती प टिका अहा, तू यहूदा क अधिकारियन में कउनो तरह स छोट नाहीं काहेकि तोसे एक ठु राजा परगट होई जउन मोरे मनइयन, इम्राएल क देख भाल करी।”

मीका 5:2

⁷तब हेरोदेस चुप्पे स तारा गियान क पण्डितन क बोलाएस अउर ओनसे पूछेस, कि उ तारा ठीक समइ प कब देखॉई पड़ा? ⁸फिन उ ओनका बैतलहम पठएस अउर कहेस, “जा, उ बचवा क बारे में नीक नीक पता लगावा अउर जबइ तू उ पचेन क मिल जाइ तउ मोका

बतावा जेह बरे मई भी आइके ओकर आराधना कइ सकउँ।”

⁹फिन उ पचे राजा क बात सुनिके चल दिहना उ तारा जेका उ पचे अकासे में निकरा निहारेन उ ओनके अगवा अगवा तब तलक गवा जब तलक उ लोग हुआँ पहुँच नाहीं गएन जहाँ उ बचवा रहा। ¹⁰जब उ पचे तारा क देखेन तउ उ सबइ आनंद स झूमि उठेन।

¹¹उ सबइ घरवा क भीतर गएन अउर बचवा क अउर ओकरी महतारी मरियम क संग दरसन किहना। उ पचे सास्टांग दण्डवत करेन अउर ओकर आराधना करेन। फिन आपन कीमती चीजन्क पिटारी स सोना, लोहबान अउर इत्र क भेंट चढ़ाएन। ¹²मुला परमेस्सर ओनका सपने में होसियार कइ दिहस कि उ पचे हेरोदेस क पास लौटि क न जाई। तउ उ सबइ एक दुसरे राहे स आपन देस लौटि गएन।

ईसू क लइके माता पिता क मिन्न जाब

¹³जब उ पचे चल दिहन तउ यूसुफ क सपने में पर्भू क दूत परगट होइके कहेस, “उठा, बचवा क अउर ओकर महतारी क चुप्पे स लइके मिन्न भागि जा। जब ताई मई तोसे न कहेउँ, हुवाँ ठहरया। काहेकि हेरोदेस इ बचवा क जान स मरवावई बरे खोजी।”

¹⁴तउ यूसुफ खड़ा भवा अउर बचवा अउर ओकर महतारी क रातोरत मिन्न क चलि पड़ा।

¹⁵फिन हुवाँ हेरोदेस क मउत तक रुकि गवा। इ यह बरे भवा कि पर्भू जउन नबी स कहवाए रहा, उ पूरा होइ जाइ, “मई आपन पूत क मिन्न स बाहेर आवइ बरे कहेउँ।” *

बैतलहम क सब लरिकन क हेरोदेस जान स मरवाइ दिहस

¹⁶हेरोदेस जबहिं इ देखेस कि तारा गियानी ओकरे संग इ चाल चलेन ह, तउ उ बहोत गुस्साइ गवा। जइसा तारा गियान क पण्डितन क बताए भए क अनुसार उ हुकुम दिहस कि बैतलहम अउर ओकरे नगिचे क पहुँटा में दुइ साल या एसे छोटवार लरिकन क जान स मरवाइ दीन्ह जाइ। ¹⁷नबी यिर्मयाह क कहा भवा बचन पूरा होइ ग:

¹⁸“रामाह में दुःख भरा सव्व रोवइ अउर विलपइ क सुना गवा। राहेल रोवत रही आपन बचवन बरे उ नाहीं चाहेस कि कउनो धीरा धरावइ काहेकि ओकर सबइ बचवन मरि गवा रहेन।”

यिर्मयाह 31:15

यूसुफ अउर मरियम क मिश्र लौटव

¹⁹फिन हेरोदेस क मउत क पाछे मिश्र मँ यूसुफ क सपन आवा ओहमँ पभू क एक ठु दूत परगट भवा।
²⁰अउर सरगदूत ओसे कहेस, “उठि जा, बचवा अउर ओकर महतारी क लइके इम्राएल क धरती प जा काहेकि जउन बचवा क मार डारइ चाहत रहेन उ सबइ मर बिलाइ गएन।”

²¹तब यूसुफ उठि गवा अउर बचवा अउर ओकर महतारी क लइके इम्राएल गवा। ²²मुला यूसुफ जब इ सुनेस कि यहूदिया प आपन बाप हेरोदेस क जगह प अरखिलाउस राज्य करत अहइ तउ उ हुवाँ जाइ स डेराइ गवा। फिन सपने मँ परमेस्सर स हुकुम मिले क पाछे उ गलील पहुँटा बरे चल दिहस ²³अउर हुवाँ नासरत नाउँ क नगर मँ घर बनाइके रहइ लाग; यह बरे नबियन क कहा भवा बचन पूरा होइ जाइ कि, ‘उ नासरी’ कहा जाइ।

बपतिस्मा देइवाला यूहन्ना क काम

(मरकुस 1:1-8; लूका 3:1-9, 15-17; यूहन्ना 1:19-28)

3 उ दिनन बपतिस्मा देइवाला यूहन्ना यहूदिया क उसरे मँ उपदेस देत भवा हुवाँ आइ। ²उ इ प्रचार करइ लाग, “मन फिरावा काहेकि सरग क राज्य जल्दी आवइ क अहइ।” ³इ उहइ यूहन्ना बाटइ जेकरे बारे मँ नबी यसायाह बात बतावत कहेस ह:

“उसरे मँ एक पुकारैवालन क सब्द अहइ: ‘पभू बरे रस्ता तइयार करा अउर ओकरे बरे सोझ रस्ता बनवा।”
यसायाह 40:3

⁴यूहन्ना क ओड़ना ऊँटे क ऊन स बना रहा अउर करिहाउँ प चमड़ा क पेटी बाँधे रहा। ओकर खइया क टिड्डन अउर जंगली सहद रहा। ⁵उ समइ यरूसलेम, समूचा यहूदिया अउर यरदन नदी क नगिचे क मनई ओकरे लगे ओका सुनइ ऐकट्टा भएन। ⁶उ पचे आपन पापन्क कबूलेह अउर यरदन नदी मँ उ बपतिस्मा * दिहस। ⁷जब उ लखेस कि बेर फरीसियन * अउर सदूकियन * ओकरे लगे बपतिस्मा लेइ आवत अहइँ तउ उ ओनसे कहेस, “ओ सरप क बच्चा लोग! तू पचन क

बपतिस्मा एक यूनानी सब्द अहइ। जेकर अरथ अहइ पानी मँ बुड़की या गोला लगाउव।

फरीसियन एक यहूदी धार्मिक समूह, जउन मूसा क व्यवस्था अउ रीति रिवाज क कट्टर होइके मानत रहा।

सदूकियन एक यहूदी धार्मिक समूह जउन ‘पुराना धर्म नियम’ की केवल पहली पाँच पुस्तकन क स्वीकार करत ह अउर कउनो क मर जाने क बाद ओकर पुनरुत्थान नाहीं मानता।

कउन चिताउनी दिहस ह कि परमेस्सर क होइवाला क्रोध स बच जा? ⁸तोहका इ बात क प्रमान देइ पड़ी कि तू पचे फुरे फुरे मनफिराया ह। ⁹अउर इ जिन सोचा कि खुद अपने स कहे बिना इ बात काफी होई जाई, ‘हम पचे इब्राहीम क संतान अहीं।’ मईँ तोसे कहत हउँ कि परमेस्सर इब्राहीम बरे इ पथरन स बचवन क पइदा कइ सकत ह। ¹⁰बुच्छन * क जरे प कुल्हाड़ा रखा बाटइ अउर हर एक बुच्छ जउन फर पइदा नाहीं करतेन, उ काटिके गिराइ दीन्ह जइहीं; अउर फिन ओका आगी मँ झोंकि दीन्ह जाई।

¹¹“मईँ तोहका तोहरे मनफिराव बरे पानी स बपतिस्मा देत हउँ; मुला उ जउन मोरे पाछे आवइवाला अहइ उ मोसे जिआदा बरिआर अहइ। मईँ तउ ओकर पनही खोलइ क जोग्ग नाहीं। उ तोहका पवित्तर आतिमा अउर आगी स बपतिस्मा देइ। ¹²ओकरे हाथे मँ सूप अहइ, जेसे उ अनाजे क भूसा स अलग करी। अपने खरिहाने स उ साफ कीन्ह अनाजे क उठाइ क, ऐकट्टा कइके कोठिला मँ भरि देइ अउर भूसा क अइसी आगी मँ नाइ दीन्ह जाई कि बुझाए प बुझी।”

ईसू क यूहन्ना स बपतिस्मा लेब

(मरकुस 1:9-11; लूका 3:21-22)

¹³उ समइ ईसू गलील स चलिके यरदन क किनारे यूहन्ना क नगिचे ओसे बपतिस्मा लेइ बरे आवा। ¹⁴मुला यूहन्ना ईसू क निर्नय बदले क जतन करत कहेस, “मोका तउ खुद तोसे बपतिस्मा लेइ क दरकार अहइ। फिन तू काहे मोरे नगिचे आया ह।”

¹⁵ईसू जवाबे मँ ओसे कहेस, “अबहिन तउ ऐका अइसे होइ दिया। जउन परमेस्सर चाहत अहइ, हमका उ पूरा करब नीक बाटइ।” फिन उ वइसे होइ दिहस।

¹⁶अउर तबहिँ ईसू बपतिस्मा लइ लिहस। जइसे उ पानी स बाहेर आवा, अकास खुलि गवा। उ परमेस्सर क आतिमा क एक ठु कबूतरे क नाई खाले उतरत अउर ऊपर आवत देखेस। ¹⁷तबहिन अकासबाणी भइ: “इ मोर पिआरा पूत अहइ। जेसे मईँ खूब खुस हउँ।”

ईसू क परीच्छा

(मरकुस 1:12-13; लूका 4:1-13)

4 फिन आतिमा ईसू क उसरे मँ लइ गइ, काहेकि सइतान क जरिए ओका परखा जाइ। ²चालीस दिन अउर चालीस रात भुखिया क पाछे जब ओका भूख तइपावइ लाग

³तउ ओका ललचावइ वाला ओकरे लगे आवा अउर कहेस, “जदि तू परमेस्सर क पूत बाट्या तउ इ सबइ पथरन स कहा कि इ सब रोटी बन जाईँ।”

बुच्छन अर्थात जउन मनई ईसू मँ बिसवास नाहीं रखतेन।

⁴ईसू जवाब दिहस, "पवित्र सास्तरन में लिखा बाटइः

'मनई सिरिफ रोटी स नार्हीं जितत मुला उ हर एक सब्द स जितत ह जउन परमेस्सर क मुँहे स निकरत ह।'"

व्यवस्था विवरण 8:3

⁵फिन सइतान ओका यरूसलेम क पवित्र सहर में लइ गवा। हुआँ मंदिर क सब स ऊँचे बुर्जे प खड़ा होइके ⁶उ ओसे कहेस, "जदि तू परमेस्सर क पूत बाट्या, तउ नीचे कूदि जा काहेकि पवित्र सास्तरन में लिखा बाटइः

'उ तोहरे रखवारी बरे आपन दूतन क हुकुम देइ अउर उ पचे तोहका हाथन स उठइहीं जेह बरे तोहरे गोड़े में कउनो पाथर ताई न लागइ।'"

भजन संहिता 91:11-12

⁷ईसू जवाब दिहस, "मुला पवित्र सास्तरन इहउ कहत ह,

'अपने पर्भू परमेस्सर क परीच्छा मैं जिन डावा।'"

व्यवस्था विवरण 6:16

⁸फिन सइतान ईसू क बहुतइ ऊँच पहाड़े प लइ गवा अउर ओका इ संसार क सब राज्य अउर ओनकइ माया वैभव देखाएस। ⁹सइतान तब ओसे कहेस, "इ सब चीजनक मई तोहका दइ देब जदि तू मोरे अगवा दण्डवत करा अउर मोर आराधना करा।"

¹⁰फिन ईसू ओसे कहेस, "सइतान! दूर होइजा। पवित्र सास्तरन कहत हः

'आपन पर्भू परमेस्सर क आराधना अउर सिरिफ ओकर सेवा करा।'"

व्यवस्था विवरण 6:13

¹¹फिन सइतान ओका छाँड़े के चला गवा। अउर सरगदूतन आइके ओकर सेवा करइ लागेन।

ईसू गलील में काम सुरू करेस

(मत्कस 1:14-15; लूका 4:14-15)

¹²जब ईसू सुनेस कि यूहन्ना पकड़ लीन्ह गवा ह, तउ उ गलील लौटि आइ। ¹³मुला उ नासरत में नार्हीं रुका अउर जाइके कफरनहूम में रहइ लाग जउन जबूलन अउर नप्ताली क पहाटा में गलील झीले के नगिचे रहा। ¹⁴इ यह बरे भवा कि परमेस्सर क नबी यसायाह जउन कहेस ह, उ पूरा होइ जाः

¹⁵"जबूलन अउर नप्ताली क देस सागर क राहे प, यरदन नदी क पच्छिम में, गैर यहूदियन क देस गलील में

¹⁶ जउन मनई अँधियारे में जितत रहेन उ सबइ एक भारी जोति देखेन अउर जउन मउत क परिछाई क देस में रहत रहेन, ओन प ज्योति क भन्सारे क रोसनी फैलि गइ।"

यसायाह 9:1-2

ईसू चेलनक चुनेस

(मत्कस 1:16-20; लूका 5:1-11)

¹⁷उ समइ स ईसू सुसमाचार क प्रचार सुरू कइ दिहस, "मनफिराव करा काहेकि सरगे क राज्य नगिचे बाटइ।"

¹⁸जब ईसू गलील झिलिया क नगिचे स जात रहा, उ दुइनउँ भाइयन क निहारेस समौन (जउन पतरस कहा गवा) अउर ओकर भाई आन्द्रियास उ पचे झिलिया में जाल डारत रहेन। उ पचे मछुआरा रहेन। ¹⁹ईसू ओनसे कहेस, "भोरे पाछे आवा। मई तोहका सिखाउब कि लोगनक बरे मछरी पकड़इ क बजाय मनई रूप में मछरी कइसे बटोरी जात हीं?" ²⁰उ सबइ तुरतहिँ आपन जाल छाँड़ि दिहन अउर ओकरे पाछे होइ गएन।

²¹फिन उ हुवाँ स आगे चला गवा। उ देखेस कि जब्दी क बेटवा याकूब अउर ओकर भाई यूहन्ना आपन बाप क संग नाउ में बैठिके आपन जालनक मरम्मत करत रहेन। ईसू ओनका बोलाएस। ²²अउर उ पचे फउरन नाउ अउर बाप क छाँड़िके ओकरे पाछे चल दिहन।

ईसू क मनइयन क उपदेस अउर ओनका चंगा करब

(लूका 6:17-19)

²³ईसू समुच्चइ गलील पहाटा में यहूदी आराधनालयन में सरगे क राज्य क सुसमाचार क उपदेस देत अउर हर तरह क बेरामी अउर घोर कस्टन क दूर करत घूमइ लाग।

²⁴समुच्चइ सीरिया देस में ओकरे बारे में खबर संचर गई। यह बरे लोग अइसे मनइयन जउन खूब बेरामी रहेन या जउन तरह तरह के बेरामी अउर भारी बेदनन स पीड़ित रहेन। जेह प दुस्ट आतिमन सवार रहीं जेका मिर्गी आवत रही अउर जउन सुखंडी रहेन, ओनका ओकरे पास लावइ लागेन। ईसू ओनका चंगा किहेस।

²⁵यह बरे गलील, दिकापुलिस, * यरूसलेम, यहूदिया अउर यरदन नदी क उ पार मनइयन क भारी भीड़ पाछे पाछे होइ लाग।

दिकापुलिस यूनानी भाखा में कहा जात ह, जेकर अरथ अहइ दस सहर।

ईसू क उपदेस

(लूका 6:20-23)

5 ईसू जब भारी भीड़ देखेस उ एक पहाड़े प चला गवा। हुवाँ उ बैठि गवा अउर ओकर चेलन ओकरे नगिचे आएन। ²तबहिँ ईसू उपदेस देत भवा कहेस:

- 3 "धन्य अहई उ पचे जउन दीन अहई, काहेकि सरगे क राज्य अहई ओनके बरे।
- 4 धन्य अहई उ सबइ जउन सोक करत हीं काहेकि परमेस्सर ओनका धीरज बँधावत ह।
- 5 धन्य अहई उ सबइ जउन नम्र अहई काहेकि इ धरती ओनही क अहइ।
- 6 धन्य अहई जउन उहइ करब चाहत हीं जउन परमेस्सर चाहत ह। काहेकि परमेस्सर ओनका संतोस देइ, अउर तृप्ति देई।
- 7 धन्य अहई जउन दयालु अहई काहेकि ओन पइ अकास स दया बरसी।
- 8 धन्य अहई जउन हिरदय स सुद्ध अहई काहेकि उ सबइ परमेस्सर क दरसन करिहीं।
- 9 धन्य अहई जउन सान्ति बरे काम काज करत हीं काहेकि उ सबइ परमेस्सर क पूत कहा जईहीं।
- 10 धन्य अहई जउन धर्म क कारण सतावा जात हीं काहेकि सरगे क राज्य ओनही क अहइ।
- 11 "अउर तू पचे धन्य अहा काहेकि जब लोग तोहका बेजत करई, तोहका सतावई अउर मोरे बरे तोहरे खिलाफ सब पुकार क झूठी बातन कहई, बस यह बरे तू सबइ मोर मनवइया अहा, ¹²तब तू सबइ खुस रहया, आनंद मँ रहया, काहेकि सरगे मँ तोहका एकरे बरे अच्छा होई। इ वइसे ही बाटइ जइसे तोहरे पहिले क नबियन क मनइयन सताएन ह।

तू नोन क नाई अहा, तू प्रकास क नाई अहा

(मरकुस 9:50; लूका 14:34-35)

- 13 "तू सबइ समुच्चइ मनई बरे नमक अहा। मुला जदि नोन नोनखार न होइ तउ ओका फिन नोन कइसे बनाइ जाइ सकत ह। उ फिन कउनो कामे क न रही। सिरिफ यह बरे कि ओका मनई क गोड़वा तले फेंक दीन्ह जाइ।
- 14 "तू संसार क प्रकास अहा। एक तु अइसा सहर जउन पहाड़े क चोटी प बसा अहइ, उ छिपाए स छिप नाहीं सकत। ¹⁵लोग दिया बारि के ओका बाल्टी तले नाहीं रखतेन मुला ओका डीबट प धइ देत हीं। अउर उ घरे क सब मनई क प्रकास देत ह। ¹⁶मनई क समन्वा तोहार प्रकास अइसा चमकइ कि तोहरे नीक कामन्क निहारई अउर सरगे मँ बइठा भवा तोहार परमपिता महिमा बखानइ।"

ईसू अउर पवित्तर धरम सास्तर

17 "इ जिन सोचा कि मई मूसा क व्यवस्था या नबियन क लिखा भवा क नस्त करइ आइ हउँ। मई ओन सबन्क नस्त करइ नाहीं आइ हउँ मुला ओनके पूरा पूरा अरथ क समझावइ आइ अहउँ। ¹⁸मई तोहसे सच कहत हउँ कि जब ताई इ धरती अउर अकास नस्त नाहीं होइ जातेन, व्यवस्था क एक एक सब्द अउर एक एक अच्छर बना रही, उ तब ताई बना रही जब ताई उ पूरा नाहीं होइ जात। ¹⁹यह बरे जउन इ छोटवार स छोटवार हुकुमन क तोड़त ह अउर लोगन्क वइसा ही करइ सिखावत ह, उ सरगे क राज्य मँ कउनो बड़कई न पाई। मुला जउन ओहपइ चलत ह अह दूसर मनइयन क ओनपइ चलइ क उपदेस देत ह, उ सरगे क राज्य मँ बड़कवा समुझा जाई। ²⁰मई तोहसे सच कहत हउँ कि जब ताई तू पचे धरमसास्तिरियन अउर फरीसियन क धरम मानइ स अगवा जिन जा, कि तू सरगे क राज्य मँ घुसइ न पावा।

किरोध

21 "तू पचे सुन चुक्या ह कि हमार पूर्वजन स कहा ग रहा, 'हत्या जिन करा' * अउर जदि कउनो हत्या करत ह तउ ओका अदालत मँ जवाब दिहे होई।' ²²मुला मई तोहसे कहत हउँ कि जउन मनई आपन भाई प किरोध करी, ओहका भी अदालत मँ एकरे बरे जवाब दिहे होई। अउर जउन आपन भाई क बेजत करी ओका सबते ऊँच अदालत मँ जवाब दिहे होई। जदि कउनो आपन भाई स कहइ, 'अरे जाहिल, मूर्ख' तउ नरके क आगी क बीच ओह पइ एका जवाब दिहे होई।

23 "यह बरे जदि तू वेदी प आपन भेंट चढ़ावत ह अउर हुवाँ तोहका याद आइ जाइ कि तोहरे मन मँ तोहरे भाई खातिर कउनो खिलाफ बात बाटइ ²⁴तउ तू भेंट क वेदी के सामने छाँड़ि द्या अउर पहिले जाइके आपन भाई स सुलह कइ ल्या अउर फिन आइके भेंट चढ़ावा।

25 "जब ताई तू मुद्दई क संग रस्ता मँ रहा, झटपट ओसे मेल कइ ल्या। कहुँ अइसा न होइ कि उ तोहका हाकिम क सौप देइ अउर हाकिम तोहका सिपाही क। फिन तू जेल मँ धाँध दीन्ह जा। ²⁶मई तोहका सच सच बतावत हउँ कि जब तक तू पाई पाई क हिसाब न कइ देब्या तब तलक तू जेल स न छूटि पउब्या।

व्यभिचार

27 "तू सुनि लिहा कि इ कहा गवा अहइ, 'व्यभिचार जिन करा।' * ²⁸मुला मई तोहसे कहत हउँ कि जदि कउनो स्त्री क बुरी निगाह स देखत ह तउ उ आपन मन

हत्या जिन करा' निर्ग 20:13; व्यवस्था 5:17

व्यभिचार जिन करा' निर्ग 20:14; व्यवस्था 5:18

मैं पहिले ही ओकरे संग संभोग कइ चुका अहइ।²⁹ यह बरे जदि तोहार दाहिन आँख तोसे पाप करवावइ तउ ओका निकाकि क फेंक द्या। काहेकि तेरे बरे इ नीक बाटइ कि तोहरे बदन क एक तु अंग नस्त होइ जाइ एकरे बजाय तोहार सारा बदन नरक में नाइ दीन्ह जाइ।³⁰ अउ जदि तोहार दाहिन हाथ तोहसे पाप करवावइ तउ ओका काटिके फेंक डारा। काहेकि तोहरे बरे इ नीक अहइ कि तोहरे बदन क एक अंग नस्त होइ जाइ बजाए कि तोहार समूचा बदन नरक में जाइ।

तलाक

(मत्थ 19:9; मरकुस 10:11-12; लूका 16:18)

³¹ 'कहा ग अहइ, 'जबहि कउनो आपन पत्नी क तलाक देत ह तउ आपन पत्नी क लिखिके तलाक देइ चाही।' * ³² मुला मई तोहसे कहत हई कि हर मनई जउन आपन पत्नी क तलाक देत ह, जदि उ तलाक ओकरे व्यभिचारी करइ क कारण नाहीं दहेस तउ जब उ पत्नी दूसरा बियाह करत ह, तउ समुझ ल्या कि उ मनई ओसे व्यभिचार करत ह। अउर जउन कउनो उ छोड़ी भई स्त्री स बियाह करत ह तउ भी व्यभिचार करत ह।

सपथ

³³ 'तू सबइ इहई सुन्या ह कि हमरे पूर्वजन स कहा ग रहा, 'तू सपथ जिन तोड़ा मुला पभूस स कीन्ह सपथें पूरा करा।' * ³⁴ मुला मई तू सबन स कहत हई कि सपथ जिन ल्या। सरगे क सपथ जिन खा काहेकि उ परमेस्सर क सिंहासन अहइ।' ³⁵ धरती की सपथ जिन खा काहेकि उ ओकरे गोड़वा क चौकी बाटइ। यरूसलेम क सपथ जिन खा काहेकि इ महाराजाधिराजा क सहर बाटइ। ³⁶ आपन मूँड़ क सपथ जिन खा, काहेकि तू एक तु बरे तक क सफेद या करिया नाहीं कइ सकत्या। ³⁷ जदि तू हों चाहत ह तउ सिरिफ हों कहा अउर ना चाहत ह तउ सिरिफ 'ना'। काहेकि जउन कछू ऐसे जिआदा होता अहइ उ दुस्त (सइतान) स आता अहइ।

बदला लेइ क भावना जिन रखा

(लूका 6:29-30)

³⁸ 'तू पचे सुन्या ह कि कहा बाटइ, 'आँखी क बदले आँखी अउर दाँत क बदले दाँत' * ³⁹ मुला मई तोहसे कहत हई कि कउनो बुरा मनई क विरोध जिन करा। मुला कउनो तोहरे दाहिन गाले प थप्पड़ लगावइ तउ

दूसर गाले क ओकरे कईती घुमाइ द्या।⁴⁰ जदि कउनो तोह प मुकदमा चलाइ के तोहार कुर्ता उतरवावइ चाहइ तउ तू ओका आपन चोगा तलक दइ द्या।⁴¹ जदि कउनो तोहका बेगार में एक मील चलावइ तउ तू ओकरे संग दुइ मील जा।⁴² जदि कउनो तोसे कछू माँगाइ तउ ओका उ दइ द्या। जउन तोसे उधार लेइ चाहइ, ओका मना जिन करा।

सबते पिरेम राखा

(लूका 6:27-28, 32-36)

⁴³ 'तू पचे सुन्या ह कि कहा बाटइ, 'तू आपन पड़ोसी स पिरेम करा' * अउर दुस्मन स घिना करा।' ⁴⁴ मुला मई कहत हई आपन दुस्मन स भी पिरेम करा। जउन तोहका सतावत हीं, ओनके बरे भी पराथना करा।⁴⁵ काहेकि सरगे में बसइया आपन परमपिता क संतान होइ सका। उ सूरज क बुरा अउर भला सब पड़ चमकावत ह। उ पापी अउर धर्मी सब पड़ बसकाला में पापी बरसावत ह। ⁴⁶ इ मई यह बरे कहत हई कि जदि तू ओनही स पिरेम करब्या जउन तोसे पिरेम करत हीं तउ तोहका का मिली? का अइसा तउ चुंगी (टिक्स) क उगहिया * नाहीं करतेन?

⁴⁷ जदि तू आपन मीतन क बरे नीक बाट्या तउ दूसर मनई स नीक नाहीं बाट्या। का अइसा विधर्मी नाहीं करतेन? ⁴⁸ यह बरे आपन में परिपूर्ण बना जइसे तोहार सरगे क परमपिता परिपूर्ण बाटइ।

ईसू दान क उपदेस देत ह

6 'होसियार रहा! अउ परमेस्सर चाहत ह कि उ सब काम काजन्क मनई क समन्वा दिखावा जिन करा। नाहीं तउ तू आपन परमपिता स फल न पउब्या जउन सरगे में बाटइ।

² यह बरे जब तू कउनो दीन दुखिया क दान दच्छिना देत ह तउ ओकर दिंदोरवा पीटा जिन। जइसा कि आराधनालयन अउर गलिथन में कपटी मनई औरन स बड़कई पावइ बरे करत हीं। मई तोसे सच कहत हई कि ओनका तउ एँकर पूर पूर फल पहिले ही दीन्ह जाइ गवा अहइ।

³ मुला जबहि तू कउनो दीन दुखिया क देत ह तउ तोहार बावों हाथ न जान पावइ कि तोहार दाहिन हाथ का करत बाटइ? ⁴ काहेकि तोहार दान गुप्त रहइ। तोहार उ परमपिता जउन छिपाइ क करत ह, तोहका ओकरे बदले में फल देई।

'जबहि ... चाही' व्यवस्था 24:1

'तू ... करा' लैव्य 19:12; गिनति 30:2; व्यवस्था 23:21

'आँखी ... दाँत' निर्ग 21:24; लैव्य 24:20

'तू पचे ... करा' लैव्य 19:18

चुंगी क उगहिया रोम क जरिए किराये प खरीदा भवा यहूदी जउन चुंगी क उगही करत रहेना उ पचे कबहुँ कबहुँ धोखा दिहन अउ दूसर यहूदी ओनसे घिना करत रहेन।

पराथना का महत्व

(लूका 11:2-4)

5¹जब तू पराथना करा तउ कपटी क नाई जिन करा। काहेकि उ पचे आराधनालयन में अउर गलियन क नुक्कड़ प खड़ा होइ क पराथना करा चाहत हीं जैसे मनइयन ओनका निहार सकइँ। मईँ तोसे सच सच कहत हउँ कि ओनका तउ ओकरे बदले में फल पहिले ही मिल चुका बाटइ। 6²मुला जब तू पराथना करा, आपन कोठरी में चला जा अउर फटकवा बंद कइके परमपिता स पराथना करा। फिन तोहार परमपिता जउन तोहार करम क छिपिके निहारत ह, तोहका ओनके बदले फल देई।

7³जब तू पराथना करत रहा, तउ विधर्मी क नाई फिजूल बातन क यों ही बार बार जिन दोहरावा। उ सबइ इ सोचत हीं कि ओनके बहोत बोले स ओनकइ सुनि लीन्ह जाई। 8⁴यह बरे ओनके जइसा जिन होइ जा काहेकि तोहार परमपिता तोहरे माँगइ स पहिले जानत ह कि तोहार का जरूरत अहइ। 9⁵यह बरे इ प्रकार पराथना करा:

‘सरग मैं रहइ वाले हमरे परमपिता, पवित्तर अहइ तोहार नाँ

10 जग मैं तोहार राज्य आवइ जउन चाहा तू वइसे पूर होइ इ धरती प जइसे पूर होत रहता तोहार इच्छा सदा सरग मैं।

11 आज तू हमका दिन भर क खइया द्या

12 हमार पापन क छमा करा जइसे हम छमा कीन्ह आपन अपराधिनक।

13 जिन ल्या कठिन परिच्छा भारी हमका ओसे बचावा जउन दुस्त (सइतान) स अहइ।*’

14⁶यह बरे जदि तू लोगन्क अपराधे क छमा करब्या तउ तोहार सरगे क परमपिता भी तोहरे पाप छमा करी।

15⁷मुला अगर तू लोगन्क छमा न करब्या तउ तोहार सरगे क परमपिता भी तोहरे पापन्क छमा न करी।

उपवास क अरथ

16⁸जब तू उपवास राखा तउ कपटी क नाई दुःखी मुँह बनाइके जिन रहा। काहेकि लोगन्क इ मालूम होइ जाइ कि उ सबइ उपवास करत अहइँ। मईँ तोहसे सच कहत हउँ कि ओनका तउ बदले में फल मिलि चुका अहइ। 17⁹मुला जब तू उपवास राखा तउ आपन मूँड प जैतून क तेल लगावा अउर आपन मुँहना धोवा 18¹⁰जैसे लोग इ न भाँप सकइँ कि तू उपवास करत अहा। मुला

पद 13 कछू यूनानी प्रतियन में यह भाग जोड़ी गइ अहइ: “काहेकि राज्य अउ महिमा सदा तोहरी अहइ। आमीना।”

तोहार परमपिता जेका तू निहार नाहीं सकत्या देखइ कि तू उपवास करत अहा। तबहिँ तोहार परमपिता जउन तोहरे छमा भवा कामे क देखत रहत ह, उ तोहका ओकरे बदले में फल देई।

परमेस्सर धने स बड़वार अहइ

(लूका 12:33-34; 11:34-36; 16:13)

19¹¹आपन बरे धरती प भंडारा जिन भरा। काहेकि ओका किरवा अउर डंक नास कइ देइहीं। चोर सेंध लगइहीं अउर चोराय लइ जइहीं। 20¹²बजाए एँकरे सरग मैं भंडारा भरा। हुवाँ किरवा अउर डंक नास न कइ पइहीं। अउर चोर भी हुवाँ सेंधिया लगाइके नास न कइ पइहीं। 21¹³याद रखा जहाँ तोहार भंडार होई, हुँवई तोहार जिअरा लागी।

22¹⁴देह बरे प्रकास क सोत आँखी अहइ। यह बरे तोहार आँखी नीक अहइ तउ तोहार देह प्रकास करत रही। 23¹⁵मुला जदि तोहार आँखी खराब होइ जाइ तउ तोहार सब देह अँधियर होइ जाइ। यह बरे उ सिरिफ प्रकास जउन तोहरे भीतर अहइ जदि अँधियर होइ जाइ तउ उ केतना गहिर होई।

24¹⁶कउनो भी साथ साथ दुइ सुआमी क नउकर नाहीं होइ सकत काहेकि उ एक स तउ उ घिना करी अउर दूसर स पिरैमा। या एक बरे उ न्यौछावर करी अउर दूसरे क धिक्कारी। तू धन अउर परमेस्सर दुइनउँ क सेवा नाहीं कइ पउब्या।

चिंता तजि द्या

(लूका 12:22-34)

25¹⁷यह बरे मईँ तोहसे सच कहत हउँ कि अपने जिअइ बरे खाइ पिअइ क चिंता तजि द्या। आपन तने क ओढ़ना क फिकिर जिन करा। सचमुच जिन्नगी खइया स अउर तने क ओढ़ना स जिआदा बड़कई क अहइ। 26¹⁸लखा! अकासे क पंछी न तउ बोआई करत हीं अउर न कटाई, न ही उ पचे कोठिला मैं अनाज भरि देत हीं मुला तोहार स्वर्गीय पिता ओनकइ भी पेटवा भरत ह। का तू ओनसे जिआदा बड़कवा नाहीं बाट्या? 27¹⁹तू सबन मैं का कउनो अइसा अहइ कि फिकिर कइके आपन जिन्नगी मैं एक घड़ी भी अउ बढ़ाइ सकत ह?

28²⁰अउ तू आपन ओढ़ना क बारे मैं काहे सोचत ह? सोचा, जंगले क फूलन क बारे मैं कि उ सबइ कइसे खिल जात हीं? उ सबइ न कउनो काम करत हीं अउर न आपन बरे ओढ़ना बनावत हीं। 29²¹यह बरे मईँ तोहसे कहत हउँ कि सुलेमान भी आपन समूची धन दौलत क संग ओहमा स कउनो एक नाई नाहीं सज सका। 30²²तउ जउन जंगली पौधा जउन आज जिअत अहइँ मुला जेनका भियान भारे मैं झोंक दीन्ह जाब अहइ, परमेस्सर अइसा ओढ़ना पहिरावत ह तउ अल्प बिसवास क करवइया

मनइयो! का उ तोहका अउर जिआदा बढिया ओढ़ना न पहिराई? ³¹यह बरे चिंता करत करत इ जिन कहा, 'हम का खाबड़' या 'हम का पिअब' या 'का पहिरब?' ³²मनई जउन परमेस्सर क नाहीं जनतेन इ सब चीजन्क पाछे दौड़त रहत हीं मुला सरग क बसइया तोहार परमपिता जानत ह कि तोहका इ सब चीजन्क जरूरत अहइ। ³³यह बरे सब ते पहिले परमेस्सर क राज्य अउर तोहसे जउन धरम की खोज उ चाहत ह, ओकर फिकिर करा। इ सब चीजन तउ तोहका खुद ही घेलइया मँ दइ दीन्ह जइहीं। ³⁴भियान क फिकिर जिन करा, काहेकि भियान क तउ अउर आपन चिंता होइहीं। हर दिन क आपन आपन परेसानी होत हय।

ईसू क बचन दूसर क दोखी ठहरावइ बरे

(लूका 6:37-38, 41-42)

7 "दूसर प दोख न लगावा काहेकि तोहरे प दोख न लगावा जाइ। ²काहेकि तोहार निआव उहइ फैसला प टिका होई, जउन फैसला तू दूसर क निआव प दिहे रहा अउर परमेस्सर तोहका उहइ नपना स नापी जउने नपना स तू दूसर क नाप्या ह। ³तू आपन भाई बंद क आँखी क किरकरी तक क काहे लखत ह? जब कि तोहका आपन आँखी क लट्टा तलक नाहीं देखोई पड़त? ⁴जबहिं तोहरे आँखी मँ लट्टा बाटइ तब तू आपन भाई स कइसे कहि सकत ह, "तू मोका तोहरी आँखी क किरकरी निकारइ द्या।" ⁵अरे कपटी! पहिले आपन आँखी क लट्टा निकार, फिन तू नीक नीक देखे पउब्या अउर आपन भाई क आँखी क किरकरी निकार पउब्या।

⁶कूकुरन क पवित्तर चीज जिन द्या अउर सुअरन क अगवा मोती जिन बिखरावा। नाहीं तउ उ पचे आपन गोड़ी क तले रौदिहइ अउर कूकुरन पलटि क तोहरे ऊपर चढ़ि बैठिहीं।

जउन तू चाहत ह परमेस्सर स पराथना करत रहा

(लूका 11:9-13)

⁷परमेस्सर स माँगत रहा, तोहका दीन्ह जाइ। खोजत रहा, तोहका मिली। खटखटावत रहा, तोहरे बरे दरवाजा खोलि दीन्ह जाई। ⁸काहेकि हर कउनो जउन माँगत ह, पावत ह। जउन दूँदत ह, पावत ह। जउन खटखटावत रहत ह ओकर बरे दरवाजा खोलि दीन्ह जाई।

⁹तू सबन मँ स अइसा बाप कउन सा अहइ जेकर बेटवा रोटी माँगइ अउर उ बेटवा क पाथर देइ? ¹⁰या जब उ मछरी माँगइ तउ उ ओका साँप दइ देइ। बतावा का कउनो देई? अइसा कउनो न करी। ¹¹यह बरे चाहे तू बुरा काहे न हवा, जानत ह कि आपन गदेलन क नीक भेंट कइसे दीन्ह जात हीं। वइसे हीं सचमुच सरगे क बसइया तोहार परमपिता माँगइवालन क नीक नीक चीजन्क जरूर देइ।

नेम धरम क सबते बड़ी उपदेस

¹²यह बरे जइसा बेवहार आपन बरे तू दूसर लोगस चाहत ह, वइसा बेवहार तू भी ओनसे करा। यही मूसा क व्यवस्था अउर नबियन दुआरा बतावा गवा बा।

सरग अउर नरक क राह

(लूका 13:24)

¹³सँकरे राह स घुसा। इ मई तोहका यह बरे कहत हउँ काहेकि चौड़ा दुआर अउर बड़की राह तउ बिनासे कइँती लइ जात ह। बहोत स मनई उ राहे प चलत हैं। ¹⁴मुला केतना सँकरा अहइ उ दुआर अउर केतना छोटकी अहइ उ राह जउन जिन्नगी कइँती लइ जात ही अउर कठिन अहइ उ सबइ मनइयन जउन ओका पावत अहइँ।

करम ही बतावत हीं कि कउन कइसा अहइ

(लूका 6:43-44; 13:25-27)

¹⁵झूठे नबियन स होसियार रहा। उ पचे तोहरे लगे निर्छल भेड़न क भेस मँ आवत हीं मुला भीतर उ सबइ खूँखार बड़का कूकुर होत हीं। ¹⁶तू ओनके करमन क फल स पहिचान लेब्या। कउनो कँटहरी झाड़ी स न तउ अंगूर एकट्टा कइ पावत ही अउ न गोखरु स अंजीर। ¹⁷अइसे ही बढिया बिरवा प नीक फल लागत हीं मुला बेकार बिरवा प बेकार फल लागत हीं। ¹⁸एक नीक बिरवा फल नाहीं पड़वा करत अउर कउनो बेकार बिरवा नीक फल पड़वा कइ सकत ह। ¹⁹हर उ बिरवा जेह प नीक फल नाहीं लागतेन, ओका काटि के आगी मँ झोकि दीन्ह जात ह। ²⁰यह बरे मई तू सबन क दुबारा कहत हउँ कि उ लोगन क तू ओनके करमन क फले स पहिचान लेब्या।

²¹"पभूँ पभूँ कहइवाला हर मनई सरगे क राज्य मँ घुस न पाई मुला उहइ सरग जउन सरगे मँ बसा अहइ मोरे परमपिता क इच्छा प चलत ह उहइ ओहमा घुसि पाई। ²²उ आखिरी दिना मँ बहोत स मनई मोसे पुछिहीं, 'पभूँ! पभूँ! का हम तोहरे नाउँ स भविस्सबाणी नाहीं कीन्ह? का तोहरे नाउँ स हम सबन दुष्ट आतिमन क नाहीं निकारा अउर का हम पचे तोहरे नाउँ स अद्भुत कारजन नाहीं कीन्ह?' ²³तबहिं मई ओनसे साफ साफ कहियउँ कि मई तू सबनक नाहीं जानत हउँ, हे कुकरमी मनइयो! हियौं स भागि जा।'

एक तु बुद्धिमान अउर एक मूर्ख

(लूका 6:47-49)

²⁴यह बरे जउन मोर सब्दन क सुनत ह अउर उ एंन प चलत ह ओकर तुलना उ बुद्धिमान स कीन्ह जाई जउन आपन घर चट्टाने प बनाएस। ²⁵बरखा भइ, बाढ़ आइ, आँधी चली अउइ सबई उ घरे स टक्कराइ गएन,

मुला घर गिरा नाही। काहेकि ओकर नेंव चट्टाने प धरी गइ रही। ²⁶मुला उ जउन मोरे सब्दन क सुनत ह मुला ओन प चलत नाही, उ मूर्ख मनई क नाई अहइ जउन आपन घर रते प बनाएस। ²⁷बरखा भइ, बाढ आइ अउर आँधी चली अउर उ घरे स टकराइ गएन, जेहसे उ घर आवाज कइके समूचइ गिर गवा।

²⁸नतीजा इ भवा कि जबहि ईसू इ बतियन क कहिके पूरी किहेस, तउ ओकरे उपदेसन प भीड़ क अचरज भवा। ²⁹काहेकि उ धरम सास्तिरियन क नाई नाही मुला एक अधिकारी क नाई उपदेस देत रहा।

ईसू क कोढ़ी क चंगा करब

(मत्कुस 1:40-45; लूका 5:12-16)

8 ईसू जबहि पर्वते स खाली उतरा तउ बहोत बड़ी मनइयन क भीड़ ओकरे पाछे होइ चली। ²हूँवई एक कोढ़ी भी रहा। उ ईसू क लगे आइ अउर निहुरिके बोला, “पभू, जदि तू चाहा तउ मोका चंगा कइ सकत हा।”

³एह प ईसू आपन हथवा बड़ाइके कोढ़ी क छुएस अउर कहेस, “मई चाहत हउँ; चंगा होइ जा।” अउर फउरन कोढ़ी क कोढ़ पराइ गवा।

⁴फिन ईसू ओसे कहेस, “देखा एँकरे बारे में कउनो स कछू जिन कहया। मुला याजक क लगे जाइके ओका आपन क देखावा। फिन मूसा क हुकुम क मुताबिक भेंट चढ़ावा जैसे लोगन्क तोहरे चंगा होइ क साच्छी मिलि जाइ।”

ईसू फऊजी नायक क नउकर क चंगा किहेस

(लूका 7:1-10; यूहन्ना 4:43-54)

⁵फिन ईसू जब कफरनहूम गवा, तउ एक फऊजी नायक ओकरे नगिचे आवा अउर ओसे मदद बरे बिनती करत बोला, ⁶“पभू, मोर एक सेवक मोरे घरवाँ में बिछउना प ओलरा बाटइ। ओका लकवा मारे बाटइ। ओका बहोत दर्द होत अहइ।”

⁷तबहि ईसू फऊजी नायक स कहेस, “मई आइके ओका चंगा करिहउँ।” ⁸फऊजी नायक जवाब दिहेस, “पभू, मई इ जोगा नाही हउँ कि तू मोरे घर में आवा। यह बरे हुकुम दइ दया। बस मोर नउकर चंगा होइ जाई। ⁹इ मई जानत हउँ कि मई एक बड़का अधिकारी क नीचे काम करत अही अउर मोरे नीचे दूसर सिपाही अहइ। जबहि मई एक ठु सिपाही स कहत हउँ, ‘जा’ तउ उ चला जात ह अउर दूसर सिपाही स कहत हउँ, ‘आ’ तउ उ आइ जात ह। मई आपन सेवक स कहत हउँ, ‘इ करा’ तउ उ ओका करत ह।”

¹⁰जब ईसू इ सुनेस तउ उ अचरजे में पड़ि गवा। जउन मनइयन ओकरे पाछे पाछे आवत रहेन ईसू ओनसे कहेस, “मई तोहसे सच कहत हउँ मई एँतना गहरा

बिसवास इम्राएल में भी कउनो में नाही पाया। ¹¹मई तोहका इ अउ बतावत हउँ कि, बहोत स पूरब अउर पच्छिम स अइहीं अउर उ सबइ भोजे में इम्राहीम, इसहाक अउर याकूब क संग सरगे क राज्य में आपन आपन ठउर प बैठ जइहीं। ¹²मुला राज्य क आदिम प्रजा बाहेर आँधियारे में ढकेल दीन्ह जाई जहाँ उ पचे चिचियाइके नरियाइके दाँत पीसत रइहीं।”

¹³तब ईसू उ फऊजी नायक स कहेस, “जा वइसा ही तोहरे बरे होइ जइसा तोहार बिसवास अहइ।” अउर ओकर नउकर फउरन चंगा होइ गवा।

ईसू बहोतन क चंगा किहेस

(मत्कुस 1:29-34; लूका 4:38-41)

¹⁴जब ईसू पतरस क घरे पहुँच गवा, उ ओकरे सास क बुखार स दुखी बिछउना प ओलरी देखेस। ¹⁵तब ईसू ओका आपन हथवा स छुएस अउर ओकर बुखार उतर गवा। फिन उ उठी अउर ईसू क सेवा करय लाग।

¹⁶जइसे साँझ होइ गइ तउ लोग ओकरे नगिचे बहोतन मनइयन क लइ आएन जेहमा दुस्त आतिमन रहत रहीं। आपन एक ही हुकुम स उ दुस्त आतिमन क निकारि दिहस। इ तरह स उ सबइ बेरमियन क नीक कइ दिहस। ¹⁷इ यह बरे भवा कि परमेस्सर नबी यसायाह स जउन कछू कहेस, उ पूरा होइ जाइ:

“उ हमरे बेरमियन क लइ लिहस अउर हमरे संतापे क ओढ़ लिहस।”

यसायाह 53:4

ईसू क मनवइया बनइ क ललक

(लूका 9:57-62)

¹⁸जब ईसू आपन चारिहूँ कइँती भीड़ देखेस तउ उ आपन चलन क हुकुम दिहेस कि उ सबइ झिलिया क ओह पार किनारे चलइ। ¹⁹तब एक धरम सास्तरी ईसू क निअरे आवा अउर कहेस, “गुरु, जहँ तहँ तू जाब्या, मई तोहरे पाछे चलबा।”

²⁰एह प ईसू ओसे कहेस, “लोखरी क बिल अउर अकास क पच्छीयन क घाँसला होत हीं मुला मनई क पूत* क लगे मँडू कटावइ क कउनो ठउर नाही।”

²¹ओकरे चलन में स एक ठु ईसू स कहेस, “पभू, मोका पहिले जाइके आपन पिता क गाड़इ क हुकुम दया।”

²²मुला ईसू ओसे कहेस, “मोरे पाछे चला आवा अउर मरा भवा मुर्दन क आपन मुर्दा खुद गाड़इ दया।”

मनई क पूत ईसू परमेस्सर क पूत रहा। दानि 7:13-14 में इ मसीह क नाउँ अहइ जेका परमेस्सर मनइयन क उद्धार करइ बरे चुने रहा।

ईसू तूफान क सांत किहेस

(मरकुस 4:35-41; लूका 8:22-25)

²³तब ईसू एक नाउ प बड़िठि गवा। ओकर चेलन भी पाछे पाछे गएन। ²⁴उहइ समझया झील में एतना भयंकर तूफान उठि गवा कि नाउ लहरन स दबी जात रही पर ईसू सोवत रहा। ²⁵तबहि ओकर चेलन ओकरे लगे पहुँचेन अउर ओका जगाइके कहेन, "पभू, हमार रच्छा करा। हम पचे मरि जाब!"

²⁶तबहि ईसू ओनसे कहेस, "अरे कम बिसवास करइवालो। तू पचे काहे एतना भयभीत अहा?" तब उ खड़ा होइके तूफान अउर झिलिया क डाटेस अउर चारिहुँ कइती सांति छाइ गइ।

²⁷मनइयन अचरजे में पड़ि गएन। उ सबइ कहेन, "इ कइसा मनई बाटइ? अंधइ तूफान अउर झिलिया तक एकर बतिया मानत हीं!"

दुइ मनई क दुस्ट आतिमन स छूटि जाब

(मरकुस 5:1-20; लूका 8:26-39)

²⁸जब ईसू झील क उ पार, गदरेनियो देस पहुँच गवा, तउ ओका कब्र स निकरि के दुइ मनई आवत भए मिलेन, जेहमाँ दुस्ट आतिमन रहिना उ पचे एतना खौफनाक रहेन कि उ रस्ता स कउनो निकरि तक नाहीं सकत रहा। ²⁹उ पचे चिचियानेन, "हे परमेस्सर क पूत! तू मोसे का चाहत बाट्या? का तू हियोँ ठीक समइ स पहिले हमका दंड देइ आइ अहा?"

³⁰हुवाँ तनिक दूरी प बहोत स सुअरन क झुंड चरत रहा। ³¹तउ उ दुस्ट आतिमन ओसे बिनती करत भए कहेन, "जदि तोहका हम पचन क बाहेर निकारब ही बाटइ, तउ हमका सुअरन क झुंडे में पठइ द्या।"

³²तउ ईसू ओनसे कहेस, "चला जा!" तब उ सबइ ओन मनइयन में स बाहेर निकरि आइन अउर सुअरन में घुसि गइन। फिन समूचा झुंड डलाने स लुढ़कत पुढ़कत पराइके ढालू किनारे स झिलिया में गिरि गवा अउ पानी में बूडिके मर गएन। ³³सुअरन क झुंड क रखवालन भागत भागत हुआँ स सहर आएन अउर सुअरन क साथ तथा दुस्ट आतिमन स ग्रस्त ओन मनइयन क साथ जउन कछू भवा, कहिके सुनाएन। ³⁴फिन तउ सहर क सबइ मनइयन ईसू स भेंटइ बरे निकर पड़ेन। जब उ पचे ईसू क देखेन तउ ओसे बिनती किहेन कि उ ओनके हियोँ स कहुँ अउर ठउर जाइ।

लकुआ क मरीज क चंगा करब

(मरकुस 2:1-12; लूका 5:17-26)

9 फिन ईसू एक नाउ प चढ़ा अउर झिलिया क पार आपन सहर आइ गवा। ²मनइयन लकुआ क मरीजे क खटिया प ओलराइके ओकरे नंगिचे लइ आएन। ईसू जबहि ओकरे बिसवास क देखेस तउ लकुआ क रोगी स

कहेस, "हे बालक ढाड़स रखा। तोहार पापन्क छमा दीन्ह गवा।"

³तबहि कछू धरम सास्तिरियन आपस में कहइ लागेन, "इ मनई (ईसू) परमेस्सर क बेजत करत हा।"

⁴ईसू जानत रहा कि उ पचे का सोचत विचारत अहइ; ईसू ओनसे बोला, "तू सब आपन मन में काहे बुरा बिचार आवइ देत ह? ⁵जिआदा सहल का बाटइ? इ कहब, 'तोहार पापन्क छमा दीन्ह गवा।' या इ कहब, 'खड़ा हवा अउर चलि पड़ा?'" ⁶काहेकि तू सब इ जान पावा कि धरती प पापन्क छमा करइ क सक्ती मनई क पूत में अहइ।" ईसू लकुआ क रोगी स कहेस, "खड़ा हवा, आपन बिछउना उठावा अउ घरे चला जा।" ⁷उ लकुआ क मरीज खड़ा होइके आपन घर चला गवा। ⁸जबहि भीड़े में मनइयन इ निहारेन कि तउ उ सबइ गहरी भक्ति स अचरजे में पड़ि गएन अउर परमेस्सर क गुन गावइ लागेन जउन मनई क अइसी सक्ती दिहेस।

ईसू क मती क चुनब

(मरकुस 2:13-17; लूका 5:27-32)

⁹ईसू जब हुआँ स जात रहा तउ उ महसूले क चुंगी क चौकी प बइठा भवा एक मनई क देखेस। ओकर नाउँ मती रहा। ईसू ओसे कहेस, "मोरे पाछे चला आवा।" एह प मती खड़ा भवा अउर ओकरे पाछे होइ गवा।

¹⁰अइसा भवा कि जब ईसू मती क घर बहोत स चुंगी उगहियन अउर पापी मनइयन क संग आपन मनबइयन क साथ लइके जेवत रहा। ¹¹तउ ओका फरीसियन देखेन अउर ओनके चेलन स पूछइ लागेन, "तोहार गुरु चुंगी क उगहिया अउर बुरा मनइयन क संग खइया के काहे खात ह?"

¹²इ सुनिके ईसू ओनसे कहेस, "हिट्ट पुट्ट मनई क नाहीं मुला बेरमियन क एक बैदय (डाक्टर) क जरूरत होत ह। ¹³यह बरे तू सबइ जा अउर समझा कि सास्तेर क बचन क अरथ का अहइ? मइँ बलिदान नाहीं चाहत हउँ मुला द्या चाहता हउँ। * मइँ धर्मी क नाहीं मुला पापियन क बुलावइ आइ हउँ।"

ईसू दूसर यहूदी धर्म नेता स न्यारा

(मरकुस 2:18-22; लूका 5:33-39)

¹⁴फिन बपतिस्मा क देवइया यूहन्ना क चेलन ईसू क लगे गएन अउर पूछेन, "हम सबइ अउर फरीसियन पुनि पुनि उपवास काहे करत हीं परन्तु तोहार चेलन काहे नाहीं करतेन?"

¹⁵फिन ईसू ओनका समझाएस, "का दूल्हा क साथी जब ताई दूल्हा ओनके संग अहइ, सोक मनाइ सकत हीं? मुला उ दिनन अइहीं जब दूल्हा ओनसे छीन लीन्ह जाई

मइँ ... हउँ होसे 6:6

फिन उ समझ्या मँ उ सबइ दुखी होइहीं अउर उपवास करिहीं।

¹⁶बे सिकुड़ा भवा नवा कपरा क पड़बंद पुरान पोसाके क पकउनो लगावत नाहीं काहेकि इ पड़बंद पोसाके क अउर जिआदा फाड़ देइ अउ कपरा क खोंच अउर बाढ़ जाई। ¹⁷नई दाखरस पुरान मसकन मँ भरी नाहीं जात। नाहीं तउ मसकन क फोरि देइ अउर दाखरस बहिके फैलि जाई। यह बरे लोग नई दाखरस नई मसकन मँ भरत हीं जइसे दाखरस अउर मसकन दुइनउँ बचा रहइँ।”

मरी लरिकि क जिन्गी देब अउर बेरमिया स्त्री क चंगा करब

(मकुस 5:21-43; लूका 8:40-56)

¹⁸ईसू ओन मनइयन क जब इ बतिया बतावत रहा, तबहि यहूदी आराधनालय क एक मुखिया ओकरे लगे आवा अउर ओकरे समन्वा निहुरिके बिनती करत भवा बोला, “अबहीं अबहीं मोर बिटिया मरी गइ अहइ। तू चलिके जदि ओह प आपन हाथ रख द्या तउ उ फिन जी जाई।”

¹⁹एह प ईसू खड़ा होइके आपन चेलन क संग ओकरे साथ चल दिहस।

²⁰हुवाँ एक तु स्त्री रही जेका बारह बरिस स खून बहत रहा। उ पाछे स ईसू क नगिचे आइ, ओकरे ओढ़ना क मुहरी छुइ लिहस। ²¹उ आपन मनवा मँ सोचत रही, “जदि मई तनिकउ भी एकर ओढ़ना छुइ पाई, तउ नीक होब।”

²²धूमिके निहारत भवा ईसू कहेस, “स्त्री, खुस रहा। तोहार बिसवास तोहका चंगा किहसे ह।” अउर उ स्त्री तुरंतहि उहइ छन चंगा होइ गइ।

²³ओह कइती ईसू जब आराधनालय क मुखिया क घरवा पहुँचा तउ उ देखेस कि सोक धुन बजावत बाँसुरी क बजवइया अउर हुवाँ एकट्ठा भए मनइयन लरकी क मउत प सोक करत रहेन। ²⁴तबहि ईसू लोगन्स कहेस, “हिवाँ स बाहेर जा। लरकी मरी नाहीं बा, उ तउ सेवति अहइ।” एह प मनई ओकर हँसी ठट्ठा करह लागेन। ²⁵फिन जब भिरिया क मनइयन क बाहेर पठएस तउ ईसू लरकी क कोठरी मँ जाइके ओकर हथवा पकड़ैस अउर उ उठि गइ। ²⁶एकर खबरिया उ समूचइ पहुँटा मँ संचर गइ।

ईसू ढेर मनइयन क चंगा किहसे

²⁷ईसू जब हुवाँ स जाइ लाग तउ दुइ आँधर ओकरे पाछे होइ गएन। उ दुइनउँ चिल्लात रहेन, “हे दाऊद क पूत, हम प द्या करा।”

²⁸ईसू जइसे घरवा क भीतर पहुँच गवा तउ उ आँधर ओकरे लगे आएन। तबहि ईसू ओन्से कहेस, “का तोहका

बिसवास अहइ कि मई, तोहका फिन आँखिन दइ सकत हउँ?” उ पचे जवाब दिहेन, “हाँ पभू।”

²⁹एह पर ईसू ओनकइ आँखिन क छुअत कहेस, “तोहरे बरे वइसा होइ जइसा तोहार बिसवास अहइ।”

³⁰अउर आँधरन क जोति मिल गइ। फिन ईसू ओनका चिताउनी देत कहेस, “एकरे बारे मँ कउनो क पता नाहीं लागइ चाहीं।” ³¹मुला उ पचे हुवाँ स जाइके इ खबरिया क उ पहुँटा मँ चारिहुँ कइती फैलाइ दिहन।

³²जब उ दुइनउँ हुवाँ स जात रहेन तउ कछू लोग ईसू क लगे एक तु गूंगा क लइ आएन। गूंगा मँ दुस्ट आतिमा क सवारी रही अउर यह बरे उ कछू बोल नाहीं पावत रहा। ³³जब उ दुस्ट आतिमा क निकांरि दिहस तउ उ गूंगा, जउन पहिले कछू नाहीं बोल सकत रहा, बोलइ लाग। तबहि भिरिया क लोग अचरजे मँ कहेन, “इग्राएल मँ अइसी घटना कबहुँ नाहीं देखी गइ।”

³⁴मुला फरीसियन कहत रहेन, “उ दुस्ट आतिमन क सइताने क मदद स बाहेर खदेरत ह।”

ईसू क मनइयन प दुःख

³⁵ईसू यहूदी आराधनालयन मँ उपदेस देत, परमेस्सर क राज्य क सुसमाचार क प्रचार करत, मनइयन क बेरामी अउर हर तरह क दारून दुःख हरत उ समूचइ पहुँटा क गाउँ गाउँ अउर सहर सहर घूमत रहा। ³⁶ईसू जब कउनो भिरिया क देखत तउ ओनके बरे करुना स भरि जात काहेकि उ पचे सतावा भवा अउर बेसहारा रहेन, जइसे भेड़ रहिन अउ ओनकइ कउनो गड़रिया नाहीं रहा। ³⁷तबहि ईसू आपन चेलन स कहेस, “तइयार खेत तउ बहोत अहइँ मुला मजदूर कम बाटेन। ³⁸यह बरे फसल क परमेस्सर स बिनती करा कि उ, आपन फसल काटइ बरे मजदूर पठवइ।”

सुसमाचार क प्रचार बरे प्रेरितन क पठउब

(मकुस 3:13-19; 6:7-13; लूका 6:12-16; 9:1-6)

10 तउ ईसू आपन बारहु चेलन क लगे बोलवाइके ओनका दुस्ट आतिमन क बाहेर खदेरइ, अउर हर तरह क रोग अउर दारून दुख क दूर करइ क सकती दिहसे। ²उ सब बारहु प्रेरितन क नाउँ इ बाटँ सबते पहिले समौन, जउन पतरस कहा गवा, अउर ओकर भाई आन्द्रियास, जब्दी क बेटवा याकूब अउर ओकर भाई यूहन्ना।

³फिलिप्पुस, बरतुल्मै, थोमा, चुंगी (टिक्स) क उगहिया मती, हल्फै क बेटवा याकूब अउर तदै। ⁴समौन कनानी * अउर यहूदा इस्करियोती जे ओका धोखा दइके पकड़वाए रहा।

कनानी यहूदी क एक कट्टर राजनीति दल क नाउँ जेकर उ निअंबर होत रहा।

ईसू इन बारहु प्रेरितन क बाहेर पठवत हुकुम दिहैस कि उ सबइ, 'गैर यहूदियन क पहुँटा मैं न जाई अउर कउनो सामरी सहर मैं न घुसई।' 6मुला उ सबइ इग्राएल क परिवारे क हेराइ गइ भेड़न क नगिचे जाई 7अउर ओनका उपदेस देई, 'सरगे क राज्य नगिचे अहइ।' 8उ सबइ बेरमियन क नीक करई, मरे भएन क जिन्नगी देई, कोढिन क नीक करई अउर दुस्ट आतिमन क खबरेई। तू सबइ बे कछू दिए भए पभू क असीस अउर सकती पाए अहा, यह बरे दुसरउँ क बे कछू लिए अजादी स बाँटा। 9आपन बटुआ मैं सोना, चाँदी अउर तौबा जिन रखा। 10जात्रा बरे कउनो झोला तक जिन रखा। कइसो फालतू कुर्ता, चप्पल अउर छड़ी जिन ल्या। काहेकि मजदूर क ओकरे खइया प हक अहइ।

11'तू पचे जब कबहुँ कउनो सहर या गाउँ मैं जा तउ पता करा कि हुवाँ बिसवास क लायक कउन अहइ। फिन तब ताई हुवाँ ठहरि जा जब ताई हुवाँ स चल न द्या। 12जबहि तू उ कउनो क घरे मैं जा तउ उ परिवार क मनइयन क मान सम्मान करत कहा, 'तोहका सांति मिलइ।' 13जदि घरे क मनई सुपात्र होइहीं तउ तोहार असीस ओनके संग रही अउर जदि ओकरे जोगा नाही होइहीं तउ तोहार असीस तोहरे लगे लौटि आई। 14जदि कउनो तोहार अगवानी न करइ या तोहार बतियन क न सुनइ तउ उ घरवा या सहर क तजि द्या। अउर आपन गोड़वा मैं लागी माटी क हुवैइ झाड़ि द्या। 15मई तोहसे सच कहत हउँ कि जब निआव होई तब उ सहर क दसा सदोम अउर अमोरा* सहरन क दसा कहुँ जिआवा बढिया होई।

आपन प्रेरितन क ईसू क चिताउनी

(मरकुस 13:9-13; लूका 21:12-17)

16'होसियार! मई तोहका बिगवन मैं भेड़न क नाई बाहेर पठवत अही। कीरा क नाई चालाक अउर कबूतरे क नाई भोला बना रहा। 17मनइयन स होसियार रहया काहेकि उ पचे तोहका बंदी बनाइके यहूदी पंचायत क दइ देइहीं अउर तोहका आपन आराधनालयन मैं कोड़ा स धुनवइहीं। 18तोहका हुकूमत क सासक अउर राजा क समन्वा हाजिर करिहीं, काहेकि तू सबहू मोर चेला अहा। तोहका इ औसर दीन्ह जाई कि तू ओनका अउर गैर यहूदियन क मोरे बारे मैं साच्छी द्या। 19जब उ पचे तोहका धरई तउ फिकिर जिन करया कि तोहका का कहइ क बाटइ अउर कइसे कहइ क अहइ। काहेकि उ समइ प तोहका बताइ दीन्ह जाई कि तोहका का कहइ क अहइ। 20याद रखा कि बोलवइया तू नाही अहा, मुला तोहरे परमपिता क आतिमा तोहरे भीतर बोली।

सदोम अउ अमोरा दुइ सहरन क पभू ओनके बसइया क पापन क दण्ड बरे नास कइ दिहैस।

21'भाई आपन भाइयन क धरवाइ क मरवइहीं, महतारी बाप आपन गदेलन क पकड़वइहीं अउर बचवा आपन महतारी बाप क खिलाफ होइ जइहीं। उ पचे ओनका मरवाइ देइहीं। 22मोरे नाउँ क कारण मनई तोहसे घिना करिहीं। मुला आखिर तक जउन टिका रही उहइ क उदधार होई। 23उ सबइ अब तोहका सहर मैं सतइहीं तउ तू दूसर सहर मैं पराइ जाया। मई तोहसे सच सच कहत हउँ एसे पहिले तू इग्राएल क सबइ ही सहरन क चक्कर लगाइ ल्या, मनई क पूत दुबारा आइ जाई।

24'चेला आपन गुरु ते बड़वार नाही होतेन अउर न ही कउनो नउकर आपन मालिक ते बड़वार होत ह। 25चेला क गुरु क नाई होइ मैं अउर नउकरे क मालिक क नाई होइ मैं संतोख करइ चाही। जब उ घरे क मालिक क बालजबूल (सइतान) कहइ तउ, ओकरे घरे क मालिक क संग तउ अउ भी बुरा बेवहार करिहीं।'

परमेस्सर स डेराअ मनइयन स नाही

(लूका 12:2-7)

26'यह बरे ओनसे डेराअ जिन काहेकि जउन छुपी अहइ, सब खुलि जाई। अउर हर चीज जउन छुपी अहइ, परगट होइ जाई। 27मई अँधियारे मैं जउन कछू तोसे कहत हउँ, मई चाहित ह कि तू उजियारे मैं कहा। मई जउन कछू तोहरे कनवा मैं कहेउँ तू ओकरे मकाने क छत्तियापर चढ़िके, एलान करा। 28ओनसे जिन डेराअ, जउन तोहरे देह क नास कइ इइहीं मुला तोहरे आतिमा **U** क नाही मारि सकतेन। बस उ परमेस्सर स डेराअ जउन तोहार देह अउर आतिमा क नरके मैं नाइ के नास कइ सकत ह। 29एक ठु पइसा क दुइ चिड़िया बेसहे मैं स भी एक तोहरे परमपिता क बे जाने भए अउर ओकर बिना इच्छा स धरती प नाही गिर सकत। 30अरे तोहरे मूँडे क एक एक बार तक गिना भवा बाटइ। 31यह बरे डेराअ जिन, तोहार कीमत तउ वइसी बहोत स चिड़ियन ते जिआवा बाटइ।

ईसू मैं बिसवास

(लूका 12:8-9)

32'जउन कउनो मोका सब मनइयन क समन्वा अपनाई, मई भी ओका सरगे मैं बसा आपन परमपिता क समन्वा अपनियाउब। 33मुला जउन कउनो मोका सब मनइयन क समन्वा न अपनियाई, मई भी ओका आपन परमपिता क समन्वा न अपनियाउब।

34'इ जिन सोचा कि मई धरती प सांति लइ आवइ आइ हउँ। सांति नाही मुला एक तरवारे क लइ आइ हउँ। 35-36मई तउ, बेटवा क बाप क खिलाफ:

'बिटिया क महतारी क खिलाफ, दुलहिन क सासे क खिलाफ करइ आइ हउँ। मनई क बैरी ओकरे घरे क मनई ही होइहीं।'

37“जउन आपन महतारी बाप स मोसे जिआदा पिरेम करत ह, उ मोर होइ क जोग्ग नार्हीं जउन अपने बेटवा अउर बिटिया से मोसे जिआदा पिरेम करत ह, उ मोर होइके जोग्ग नार्हीं। 38उ जउन क्रूसे (यातना) उठाइके मोरे पाछे होत नार्हीं, मोर होइके जोग्ग नार्हीं। 39उ जउन आपन प्राण बचावा चाहत ह, आपन प्राण खोइ देइ। मुला जउन मोरे बरे आपन प्राण दइ देइ, उ जिन्नगी पाई। 40जउन तू पचन क अपनावत ह, उ मोका अपनावत ह अउर जउन मोका अपनावत ह, उ उहइ परमेस्सर क अपनावत ह, जउन मोका पठएस ह। 41जउन कउनो नबी क यह बरे अपनावत ह कि उ नबी अहइ, ओका उहइ ओकरे बदले मैं फल मिली जउन कि नबी क मिलत ह। अउ जदि तू कउनो धर्मी क यह बरे अगवानी करत ह कि उ धर्मी बाटइ, ओका सच उहइ बदले मैं फल मिली जउन कउनो धर्मी क मिलत ह। 42अउर जदि कउनो मोर इ भोला भाला चेलन मैं स कउनो एक क एक लोटा ठंडा पानी तक दइ दे कि उ मोर चेला अहइ, तउ मई तोसे सच कहत हउँ कि ओका ँकरे बदले मैं फल सचमुच बे मिले भए न रही।”

ईसू अउर बपतिस्मा क देवइया यूहन्ना

(लूका 7:18-35)

11 अइसा भवा कि ईसू आपन बारहु चेलन क इ तरह समझाइके हुवाँ स चला गावा अउर गलील देस क सहरन मैं उपदेस देत अउर प्रचार करत लाग।

2यूहन्ना जब जेल मैं मसीह क काम क बारे मैं सुनेस तउ उ आपन चेलन स संदेस पठइके पूछेस, 3“का तू उहइ अहा, जउन आवइवाला रहया, या हम पचे कउनो अउर आवइवाला क बाट जोही?”

4ईसू जवाबे मैं ओनसे कहेस, “जउन कछू तू सबइ सुनत अहा, अउर देखत अहा, जाइके यूहन्ना क बतावा कि, 5अँधरे क आँखी मिलति अहइ, लुला लगँडा चल पावत अहइ, कोढ़ी चंगा होत अहइ, बहिर सुनत अहइ अउ मुदाँ जिआइ जात अहइ अउर गरीबन मैं सुसमाचार क प्रचार कीन्ह जात अहइ। 6उ धन्य अहइ जउन मोका अपनाइ सकत ह।”

7जब यूहन्ना क चेलन हुवाँ स जात रहेन तउ ईसू भीड़ मैं यूहन्ना क बारे मैं कहइ लाग, “तू पचे इ उसरे मैं का निहारइ आइ अहा? का कउनो सरपत? जउन हवा स उड़ि जात बा। 8नार्हीं, तउ फिन का देखइ आइ अहा? का एक मनई? जउन बहोत बडिया ओडना पहिरे बा? देखा जउन उत्तिम बस्तर पहिरत हँ, उ सबइ तउ राजा क महले मैं मिलत हँ। 9तउ तू सबइ का निहारइ आइ अहा? का कउनो नबी? हँ, मई तोहका बतावत हउँ कि जेका तू देख्या ह उ कउनो भी नबी स जिआदा अहइ। 10इ उहइ अहइ जेकरे बारे मैं पवित्र सास्तर मैं लिखा बाटइ:

‘देखा, मई तोहसे पहिले ही आपन दूत पठवत हउँ। उ तोहरे बरे राह बनाई।’

मलाकी 3:1

11मई तोहसे सच कहत हउँ बपतिस्मा देवइया यूहन्ना त बड़वार कउनो मनई पइदा नार्हीं भवा। फिन भी सरगे क राज्य मैं छोट त छोट मनई भी यूहन्ना स बड़कवा अहइ। 12बपतिस्मा क देवइया यूहन्ना क समइ स आज तलक सरगे क राज्य खौफनाक हमला झेलत रहा अहइ अउ हिंसा करवइया ओका छीना चाहत हँ। 13यूहन्ना क आवइ तलक सारे नबियन अउर मूसा क व्यवस्था इ भविस्सबाणी किहेन, 14अउर जदि तुम व्यवस्था अउर नबियन जउन कछू कहइ, ओका स्वीकार करने क तैयार ह तउ जेकरे आने की भविस्सबाणी की गयी थी इ यूहन्ना उहइ एलियाह बाटइ। 15जउन सुनि सकत होइ, उ सुनि लेइ।

16“ इ पीढ़ी क तुलना मई कउनो स करउँ? उ सबइ बाजारे मैं बइठा भवा ओन गदेलन क नाई अहइ जउन एक दूसर क नरियाइके कहत रहेन,

17‘हम तोहरे बरे बाँसुरी बजावा, मुला तू नाच्या नार्हीं। हम पचे सोकगीत गावा मुला तू रोया नार्हीं।’

18बपतिस्मा देवइया यूहन्ना आइ। जउन अउरन क नाईन खात रहा अउर न पिअत रहा। मुला लोग कहत हँ, ‘ओहमा दुस्ट आतिमा समाइ गइ अहइ।’ 19फिन मनई क पूत आवा। जउन अउन क नाई खात-पिअत ह, मुला मनई कहत हँ, ‘इ मनई क देखा, ई पेटु अहइ, पिअकइ बाटइ। इ चुंगी (टिक्स) क उगहिया अउर पापी क मीत अहइ।’ मुला बुद्धि क चमत्कार काम स सिद्ध होइ जात ही।”

बिसवासी क न करइया ईसू क चिताउनी

(लूका 10:13-15)

20फिन ईसू ओन नगरन क धिक्कारेस, जेहमाँ उ ढेर अद्भुत कारजन किहेस। काहेकि हुवाँ क मनइयन आपन पाप करवाँ नार्हीं छोड़न अउर मनफिराव नार्हीं करेन। 21ईसू कहेस, “अरे खुराजीन * अरे बैतसैदा * जउन अद्भुत कारजन तोहमा कीन्ह गएन जदि उ सबइ काम सूर अउ सैदा मैं कीन्ह जातेन तउ हुवाँ क मनई बहोत पहिले टाट क कपरा * ओडिके सोक बरे अउर

खुराजीन, बैतसैदा, कफरनहूम गलील झील क किनारे बसा नगर अहइ जहाँ ईसू उपदेस दिहे रहा।

टाट क कपरा उ दिनन मैं सोक मनावई बरे मोटा कपरा पहिरत रहेन अउ देह प राख लगावत रहेन।

देह प राखि लगाइके दुख क परगट करत मनफिराव कइ चुका होतेन। ²²मुला मई तू सब लोगन स कहत हउँ कि निआव क दिन सूर अउर सैदा क दसा तोहसे जिआदा सहइ बरे जोगा होई। ²³अउर अरे कफरनहूम * का तू सोचत ह कि तोहका सरगे क महिमा तलक ऊँचे उठाइ जाई? तू तउ अधोलोक मँ नरक तलक जाब्बा। काहेकि जउन अद्भुत कारजन तोहमा कीन्ह गएन, जदि उ सबइ सदोम मँ कीन्ह जातेन तउ उ नगर आज तलक टिका होत। ²⁴मुला मई तोहका बतावत हउँ कि निआव क दिन तोहरे मनइयन क दसा ते सदोम क दसा कहीं नीक होई।”

ईसू क अपनियावइ बरे सुख चइन क बचन

(लूका 10:21-22)

²⁵उ समझ्या प ईसू कहसे, “परमपिता, तू सरग अउर धरती क पर्भू अहा, मई तोहार गुन गावत हउँ काहेकि तू इन बातन क, ओनमाँ स जउन गियानी अउर समझदार अहई, छुपाइके रखे अहा। अउ जउन भोला भाला अहई ओनके बरे परगट किए अहा। ²⁶हौँ परमपिता इ यह बरे भवा काहे की तू ही एका अच्छे स जानत हया।

²⁷“मोर परमपिता सब कछू मोका सौँप दिहसे अउर असिल मँ परमपिता क बजाय कउनो भी पूत क नाही जानत। अउर हर उ मनई परमपिता क जानत ह, जेकरे बरे पूत ओका परगट करइ चाहत ह।

²⁸“अरे, ओ थका माँदा, बोझवा स दबान मनइयन मोरे लगे आवा। मई तोहका सुख चइन देब। ²⁹मोर जुआ ल्या अउर आपन उपर धरा। फिन मोसे सीखा काहेकि मई सहल हउँ अउर मोर मनवा कोमल अहइ। तोहका भी आपस बरे सुख-चइन मिली। ³⁰काहेकि उ जुआ जउन मई तोहका देइत ह बहोत सहल बाटइ। अउर उ बोझवा जउन मई तोह पर डारत अही, हल्का बाटइ।”

कछू यूहूदियन ईसू क निन्दा किहेन

(मरकुस 2:23-28; लूका 6:1-5)

12 लगभग उहइ समझ्या ईसू सबित क दिन अनाजे क खेतन स होइके जात रहा। ओकरे चलन क भूख लाग अउ गौहूँ क बाल तोड़ि क चबाइय लागेन। ²फरीसियन अइसा होत देखिके कहेन, “देखा! तोहार चलन उ करत अहई जेकर सबित क दिन करब मूसा क व्यवस्था क माफिक नाही।”

³एह प ईसू ओनसे पूछेस, “का तू नाही पढ़या कि दारुद अउर ओकर साथी, जब ओनका भूख लाग, का किहे रहेन? ⁴उ परमेस्सर क घरे मँ घुसिके ओनके बरे चढ़ाई गइ पवित्तर रोटिन क कइसे खाएन? तउ भी ओका अउर ओनके साथी संगी क ओकर खाब मूसा क व्यवस्था क खिलाफ रहा। ओका सिरिफ याजकन ही खाइ सकत रहेन। ⁵मूसा क व्यवस्था मँ तू इ नाही

पढ़या कि सबित क दिन मंदिर क याजक ही असिल मँ सबित क दिन देत हीं अउर फिन ओनका कउनो कछू नाही कहत। “मुला मई तोसे कहत हउँ, हियाँ जउन कउनो बाटइ उ मंदिर ते बड़वार बाटइ।” ⁷जदि तू पवित्तर सास्तर मँ जउन लिखा अहइ, ओका जानत ह, “मई मनइयन मँ दया चाहत हउँ, पसुबलिदान नाही” * तउ तू ओनका देखी नाही ठहरउल्या जउन निर्दोष अहई। ⁸हौँ, मनई क पूत सबित क दिन क भी पर्भू अहइ।”

ईसू सुखंडी हाथे क चंगा किहेस

(मरकुस 3:1-6; लूका 6:6-11)

⁹फिन उ हुवाँ स चला गवा अउर उनके आराधनालय मँ पहुँच गवा। ¹⁰हुवाँ एक तु मनई रहा, जेकर हाथ सुखंडी रहा। तउ मनइयन ईसू स पूछेन, “मूसा क व्यवस्था क माफिक सबित क दिन का कउनो क नीक करब ठीक अहइ?” उ सबइ यह बरे ओसे पूछेन कि, उ पचे ओह प दोख सकई। ¹¹मुला उ ओनका जवाब दिहसे, “मान ल्या, तोहमाँ स कउनो क लगे एक ही भेड़ बाटइ, अउर उ भेड़ सबित क दिन कउनो गड़हा मँ गिरि जात ही, तउ तू का ओका बाहेर न निकरब्या? ¹²सच मनई तउ एक भेड़ स जिआदा बढ़के अहइ। यह बरे सबित क दिन मूसा क व्यवस्था भलाई करइ बरे अनुमति देत ह।”

¹³तब ईसू उ सुखंडी हाथवाला मनई स कहेस, “आपन हथवा आगे बढ़ावा।” उ पूरी तरह स चंगा होइ गवा। ठीक उहइ तरह जइसे ओकर दूसर हाथ रहा। ¹⁴तब फरीसियन हुवाँ स चला गएन अउर ओका मार डारवइ क तरकीब गूँथइ मथइ लागेन।

ईसू उहइ करत ह जेकरे बरे परमेस्सर ओका चुनेस

¹⁵ईसू इ जान गवा अउर हुवाँ स चला गवा। भारी भीड़ पाछे पाछे होइ गइ। उ ओनका चंगा करत ¹⁶चिताउनी दिहस कि ओकरे बारे मँ मनइयन क कछू न बतावई। ¹⁷इ यह बरे भवा कि नबी यसायाह पर्भू क बारे मँ जउन कछू कहेस ह, उ पूरा होइ जाइ,

¹⁸“इ मोर सेवक अहइ, मई जेका चुनेउ हउँ। इ मोर पिआरा अहइ, एसे मई आनंद मँ हउँ आपन आतिमा एह प मई रखियउँ सब देसन क सब मनइयन क इ निआव क एलान करी।

¹⁹ इ कबहुँ नाही चिचिआई, या झगड़ी ही मनइयन एँका गली कूचा मँ न सुनिहई

²⁰ उ सरते क न उ तोड़ी नइ गवा बुझात दिया क उ न बुझाई डटा रही तब ताई जब ताई निआव क जीत न होइ जाई।

21 तब फिन सबइ लोग बँधिही देसन आपन आस फिन ओहमा, फिन उहइ नाउँ मँ।”

यसायाह 42:1-4

ईसू मँ परमेस्सर क सकती बाटइ

(मरकुस 3:20-30; लूका 11:14-23; 12:10)

22 फिन मनइयन ईसू क लगे एक अँधरे क लइ आएन जउन गूंगा भी रहा काहेकि ओहँ प दुस्ट आतिमा क सवारी रही। ईसू ओका चंगा किहेस अउर यह बरे इ गूंगा अउर अँधर बोलइ अउर देखइ लाग। 23 एँह प सबइ मनइयन अचरजे मँ पड़ि गएन अउर उ सबइ कहइ लागेन, “इ का दाऊद क पूत बाटइ।”

24 जबहिँ फरीसियन इ सुनेन तउ उ पचे कहेन, “इ दुस्ट आतिमन क ओनके सरदार बालजबूल क सहारा स बाहरे निकारत ह।”

25 ईसू ओनके मनवा क बात जानि गवा अउर ओनसे कहेस, “हर राज्य जेहमाँ फूट परि जात ह, ओकर नास होइ जात ह। वइसे ही हर सहर या परिवार जेहमाँ फूट परि जात ह उ टिकइ नाहीं पावत। 26 तउ सइतान ही खुद आपन क बाहेर कइसे निकारी फिन तउ ओहमाँ आपन खिलाफ फूट पड़ि जाई। तउ ओकर राज्य कइसे बना रहि पाई। 27 अगर इ सच अहइ कि मई बालजबूल क सहारा स दुस्ट आतिमन क खदेरत हउँ तउ तोहार मनवइया कउने सहारा स ओनका बाहेर खदेरत ही? तउ तोहार आपन मनवइया ही सिद्ध करिहीं कि तू गलत अहा। 28 मई दुस्ट आतिमन क परमेस्सर क आतिमा क सकती स निकारत हउँ। एँसे इ सिद्ध होत ह कि परमेस्सर क राज्य तोहरे निअरे आइ ग अहइ।

29 “फिन कउन कउनो जबरा क घरवा मँ घुसिके ओकर माल कइसे चोरॉइ सकत ह, जब तलक उ जबरा क पहिले बाँध न देइ। तबहिँ उ ओकरे घरवा क लूटि सकत ह।

30 “जउन मोर संग नाहीं उ हमरे खिलाफ बाटइ। अउर जउन अलगाइ भई भेड़न क बटोरइ मँ मोर मदद नाहीं करत, उ ओनका अलगावत ह। 31 यह बरे मई तोहसे कहत हउँ कि सब मनइयन क किस्म किस्म क निन्दा अउर पापक छमा कइ दीन्ह जाइ मुला पवित्तर आतिमा क निन्दा क छमा कीन्ह न जाई। 32 कउनउ मनई क पूत क खिलाफ जदि कछू कहत ह तउ ओका छमा कीन्ह जाइ सकत ह, मुला पवित्तर आतिमा क खिलाफ कउनो कछू कहइ तउ ओका छमा न कीन्ह जाई। न तउ इ युग मँ अउर न आवइवाला युगे मँ।

मनई आपन करम स जाना जात ह

(लूका 6:43-45)

33 “बढ़िया फरे बरे तोहका बढ़िया वृच्छ रोपइ चाही। मुला वृच्छ बुरा अहइ तउ बुरा फर देइ। काहेकि वृच्छ

आपन फरे स जाना जात ह। 34 अरे हे कीरा क बचवन! जब तू खुदह बुरा अहा तउ नीक बातन कइसे कहि सकत ह? मनई क सब्ब जउन ओकरे मनवा मँ भरा अहइ, उहइ स निकरत ही। 35 एक नीक मनई मनवा क नीक भंडारे स नीक बातन निकारत ह अउर बुरा मनई बुरी बातन क निकारत ह जउन मनवा क भंडारे मँ एकटठा रहत हीं। 36 अउ मई तू सब जने क बतावत हउँ कि निआव क दिन हर मनई क लापरवाही स बोली गइ बातन क हिसाब देइ क होई। 37 तोहरे बातन क ऊपर तोहका निर्दोख अउर दोखी ठहराइ जाई।”

ईसू स प्रमाण सरूप चीन्हा क माँग

(मरकुस 8:11-12; लूका 11:29-32)

38 फिन कछू धरम सास्तिरियन अउर फरीसियन ओसे कहेन, “गुरु, हम पचे तोसे अद्भुत चीन्हा परगट करइ चाहित ह।”

39 ईसू ओनसे जवाबे मँ कहेस, “इ जुग क बुरा अउर दुराचारी पीढ़ी क मनई अद्भुत चीन्हा देखा चाहत हीं। नबी योना क अद्भुत चीन्हा तजिके ओनका अउर कउनो अद्भुत चीन्हा न दीन्ह जाई। 40 अउ जइसे योना तीन दिन अउर तीन रात उ समुद्री जीव क पेटवा मँ रहा, वइसे ही मनई क पूत तीन दिन अउर तीन रात धरती प रही। 41 निआव क दिन निनेवा क रहइवाले आज क पीढ़ी क मनई क संग खड़ा होइहीं अउर दोखी ठहरइहीं। काहेकि निनेवा क मनई योना क उपदेस स मनफिराव करे रहेन अउर हियौं तउ योना स बड़वार हाजिर अहइ।

42 निआव क दिन दक्खिन क रानी इ पीढ़ी क मनइयन क संग खड़ी होई अउर ओनका दोखी ठहराइ, काहेकि उ धरती क दूसर छोर स सुलैमान क उपदेस सुनइ बरे आइ रही अउर हियौं तउ कउनउ सुलैमान स भी बड़वार हाजिर अहइ।

मनइयन मँ सइतान

(लूका 11:24-26)

43 “जब कउनउ दुस्ट आतिमा कउनो मनई क छोड़ देत ह तउ उ आराम खोजइ बरे झुरान धरती प ढँढत फिरत ह, मुला उ ओका नाहीं पावत। 44 तब उ कहत ह, ‘जउन घरे क मई छोड़ दिहउँ, मई फिन उहउँ लौट इहउँ।’ तउ उ लौटत ह अउर ओका अब ताई खाली अउ साफ सूधर अउर सजा भवा पावत ह। 45 फिन उ लौटत ह अउ आपन संग सात अउ दुस्ट आतिमन क लइ आवत ह जउन ओसे भी बुरी होत हीं। फिन उ सबइ आइके हुवाँ रहइ लागत हीं। अउर उ मनई क हालत पहिले स जिआदा खौफनाक होत ह। आज क इ खराब पीढ़ी क मनइयन क दसा अइसी बाटइ।”

ईसू क मनवइयन ही ओकर परिवार

(मरकुस 3:31-35; लूका 8:19-21)

⁴⁶ईसू अबहीं भिड़िया क मनवइयन स बातन कर रहा कि ओकर महतारी अउर भाइयन हुवाँ आइके बाहेर खड़ा होइ गएन। उ पचे ईसू स बात करइ बरे इंतजार करत रहेन।

⁴⁷कउनो ईसू स कहेस, “सुना तोहार महतारी अउर तोहार भाइयन खड़ा बाटेन अउर तोसे बात करइ चाहत हीं।”

⁴⁸जवाबे में ईसू बात करइवालन स कहेस, “कउन अहइ मोर महतारी, अउ कउन अहइ मोर भाइयन?”

⁴⁹फिन आपन हथवा स चेलन कईती सनकावत कहेस, “इ अहइ मोर महतारी अउर मोर भाइयन। ⁵⁰हाँ सरगे में रहवइया मोरे परमपिता क इच्छा प जउन कउनो चलत ह, उहइ मोर भाई, बहन अउर महतारी अहइ।”

किसान अउर बिआ क दिस्तान

(मरकुस 4:1-9; लूका 8:4-8)

13 उहइ दिन ईसू उ घरवा क छोड़िके झिलिया क किनारे बइठा। ²बहोत मिला ओकरे चारिउँ कईती ऐकट्टा होइ गएन। तउ एक दिन उ नाउ प चड़िके बइठि गवा। अउ भीड़ किनारे खड़ी रही। ³उ ओनका दिस्तान क सहारा लेत भवा बहोत सी बात बताएस।

उ कहेस, “एक किसान बिआ बोअइ निकरा। ⁴उ जब बोआई करत रहा तउ कछू बिआ राहे क किनारे जाइ गिरेन। चिड़ियन आइन अउर चुन गइन। ⁵तनिक बिआ चट्टान क धरती प जाइ गिरेन। हुआँ क माटी उथली रही। बिआ फउरन उगेन, काहेकि माटी गहिर नहीं रही। ⁶यह बरे जइसे सूरज निकरा तउ उ पउधन झुराइ गएन। अउर काहेकि उ सबइ जिआदा जर पकड़न नहीं यह बरे झुराइके गिर गएन। ⁷बिआ क एक हींसा कँटहरी झाड़िन में जाइ गिरा, झाड़िन बाढ़िन, अउर उ सबइ उ पउधन क दहबोच लिहेन। ⁸मुला थोड़ा बिआ जउन बढ़िया धरती प गिरा रहेन, बढ़िया फसल देइ लागेन। फसल, जेतना बोइ ग रही, ओसे कउनो तीस गुनी, साठ गुनी या सौ गुनी स भी जिआदा भाई। ⁹जउन सुन सकत ह, उ सुनि लेई।”

दिस्तान कथा क मतलब

(मरकुस 4:10-12; लूका 8:9-10)

¹⁰फिन ईसू क चेलन ओकरे लगे जाइके पूछेन, “तू ओनसे बात करत भए दिस्तान कथा क प्रयोग काहे करत ह?”

¹¹जवाबे में उ ओनसे कहेस, “सरगे क राज्य क भेद क जानइ क अधिकार सिरिफ तोहका दीन्ह ग अहइ, ओनका नहीं। ¹²काहेकि जेकरे लगे थोड़ा बहोत बाटइ, ओका अउर भी दीन्ह जाई अउर ओकरे लगे ढेर होइ

जाई। ¹³यह बरे मई ओनसे दिस्तान कथा क प्रयोग करत कहत हउँ। काहेकि अगर उ सबइ निहारत हीं, मुला असल में ओनका कछू देखौई नहीं देत, उ पचे अगर सुनत हीं, मुला असल में उ सबइ न सुनत हीं, न समझत हीं।

¹⁴इ तरह ओन प यसायाह की भविस्वाणी खरी उतरत ही:

‘तू सुनब्या अउर सुनतइ ही रहब्या मुला तोहरे कछू भी समझ न आई तू लखत ह, बस देखतइ ही रहब्या मुला तोहका तउ कछू सूझ न पाई

¹⁵ काहेकि ओनके अकिल प पाथर पड़ा इ सबइ आपन कान मूँद लिहेन, अउर आँखी बंद कई राखी अहइ जैसे आपन आँखिन स उ सबइ कछू न निहारइँ अउर उ सबइ कनवा स कछू सुनि न पावइँ या आपन हिरदय स कबहुँ बूझइँ अउ मुड़िकइ कबहुँ मोरी कईती आवइँ अउर जैसे मई ओनका उद्धार करउँ।’

यसायाह 6:9-10

¹⁶मुला तोहार आँखी अउर कान धन्य अहइ काहेकि उ सबइ देख सुन सकत हीं। ¹⁷मई सच कहत हउँ बहोतन नबियन अउर धर्मी जउन बातन क देखइ चाहत हीं, ओनका तू देखत अहा। उ पचे ओनका नहीं देखि सकतेन। अउ जउन बातन क उ सबइ सुनइ चाहत हीं, ओनका तू सुनत बाट्या। उ सबइ ओनका नहीं सुन सकेन।

बिआ बोअइ क दिस्तान कथा क अरथ

(मरकुस 4:13-20; लूका 8:11-15)

¹⁸‘तउ बिआ बोअइ क दिस्तान क अरथ सुन ल्या।

¹⁹उ बिआ जउन राह क किनारे गिर गवा रहा, ओकर अरथ अहइ कि जबहिँ कउनो सरगे क राज्य क उपदेस सुनावत ह अउर समझत नहीं तउ दुष्ट (सइतान) आइके, ओकरे मनवा में जउन उगा रहा, उखाइ लइ जात ह। ²⁰उ सबइ बिआ जउन पथरही धरती प छितराइ ग रहेन, ओकर अरथ अहइ उ मनई जउन उपदेस सुनत ह, ओका खुसी होइके फउरन अपनावत ह ²¹मुला आपन भीतर ओनकइ जड़ नहीं जमइ देत, उ तनिक ढेर ठहर पावत ह, जब उपदेस स ओह प कस्ट अउर सतव आवत हीं तउ उ फउरन डगमगाइ जात ह। ²²कँटवन में छितराइ गवा बिआ क मतलब अहइ, उ मनई जउन उपदेस क तउ सुनत ह, मुला संसार क फिकिर अउर धन क लालच उपदेस क दहबोच लेत ह अउर उ मनई सफल नहीं होइ पावत। ²³नीक धरती प छितरान बिआ क अरथ अहइ उ मनई जउन उपदेस क सुनत ह अउर समझत ह। उ सफल होत ह। ओकर सफलता तीस गुनी, साठ गुनी या सौ गुनी तक होत ह।”

गोहूँ अउर खरपतवारे क डिस्टान्त

²⁴ईसू ओनके समन्वा एकठू अउर डिस्टान्त कथा राखेस, "सरगे क राज्य उ मनई क नाई अहइ जउन आपन खेतवा मँ नीक बिआ बोएस। ²⁵मुला जब मनइयन सोवत रहेन, उ मनई क दुस्मन आवा अउर गोहूँ क बीचउबीच खरपतवार बोइ गवा। ²⁶जइसे गोहूँ अँखुवान अउर ओह प बालन आइन तउ खरपतवार देखाइ लाग। ²⁷तइसेन खेते क मालिक क लगे आइके ओकर नउकरन ओसे कहेन, 'मालिक, तू तउ खेतवा मँ बढिया बिआ बोए रहा, बोए रह्या न? फिन ई खरपतवार कहाँ ते आइ गवा?' ²⁸"तब उ ओनसे कहेस, 'इ कउनो दुस्मने क काम अहइ।' "ओकर नउकरन ओसे पूछेन, 'का तू चाहत ह कि हम सबइ जाइके खरपतवार उखाइ देइ?'

²⁹"उ बोला, 'नाहीं काहेकि जब तू खरपतवार उखाइब्या तउ ओनके संग तू गोहूँ भी उखाइ देब्या। ³⁰जब ताई फसल पाकइ, दुइनुँ क साथ साथ बाइइ द्या, फिन कटनी क समइ फसल क कटइयान स कहब कि पहिले खरपतवारे क गट्टर बनाइके ओनका जराइ द्या अउर गोहूँ बटोरिके मोरे खरिहाने मँ धइ द्या।'"

अउर डिस्टान्त कथा

(मकुस 4:30-34; लूका 13:18-21)

³¹ईसू ओनके समन्वा दूसर डिस्टान्त कथनक राखेस: "सरग क राज्य राई क बिआ क छोटवार बिआ क नाई अहइ, जेका कउनो लइके खेते मँ बोई दिहे होय। ³²ई बिआ नान्ह स नान्ह होत ह मुला बड़वार होए प इ बगिया क सबइ पउधन स बड़वार होइ जात ह। इ पेड़ बनत ह अउर अकासे क पंछी आइके ँकर डारन प सरन लेत हीं।"

³³ईसू ओनका एक डिस्टान्त कथा अउ कहेस, "सरगे क राज्य खमीर क नाई अहइ, जेका कउनो स्त्री तीन अढइया आटा मँ मिलाएस अउर तब ताई ओका राखि दिहेस जब तलक उ सबइ क सबइ खमीर नाहीं भवा।"

³⁴ईसू लोगन्स सब कछू डिस्टान्त कथन स बताएस। असिल मँ उ ओनसे डिस्टान्त कथा क बिना कछू नाहीं कहत रहा। ³⁵अइसा यह बरे भवा कि परमेस्सर नबी स जउन कछू कहवाए रहेन पूरा होइ जाइ: परमेस्सर कहेस,

"मई डिस्टान्त कथन स आपन मुँहना खोलिहउँ।
सृस्टि क सुरू स जउन बातन छुपी रहिन,
ओनका परगट करबा।"

भजन संहिता 78:2

गोहूँ अउर खरपतवारे क डिस्टान्त क बखान

³⁶फिन ईसू उ भीड़ क बिदा कइके घर आइ गवा। तबइ ओकर चलन आइके ओसे कहेन, "खेते क खरपतवार क डिस्टान्त क अरथ हमका समझाइ द्या।"

³⁷जवाबे मँ ईसू बोला, "जउन उत्तम बिआ बोए रहा, उ अहइ मनई क पूत। ³⁸अउर खेत इ संसार अहइ। नीक बिआ क अरथ अहइ, सरगे क राज्य क मनई। खरपतवार क अरथ अहइ, दुस्ट (सइतान) क संतान। ³⁹उ दुस्मन जउन खरपतवारे क बोएस, सइतान अहइ, अउर कटनी क समइ अहइ, इ संसार क अंत अउर कटइया अहइ परमेस्सर क दूतन। ⁴⁰तउ ठीक उहइ जइसे खरपतवारे क ँकटवा कइके आगी मँ जराइ दीन्ह ग, वइसे ही संसार क अंत होई। ⁴¹मनई क पूत आपन दूतन क पठइ अउर उ सबइ ओनके राज्य स सबइ पापिन क अउ ओनक जउन पाप बरे मनइयन क भइकावत हीं, ⁴²एकटवा कइके धधकत भट्टी मँ झोक देइहीं जहाँ बस दौतन क पीसब अउर रोउब ही रोउब होई। ⁴³तब धर्मी आपन परमपिता क राज्य मँ सूरज क नाई चमकिहीं। जउन सुनि सकत ह, सुनि लेइ।

धने क भण्डार अउर मोती क डिस्टान्त

⁴⁴"सरग क राज्य खेत मँ गड़ा भवा खजाना क नाई अहइ, जेका कउनो मनई पाएस अउर फिन ओका हुवई गाइ दिहेस। उ ँतना खुस भवा कि ओकरे लगे जउन कछू रहा उ ओका बेंच दिहस अउर उ खेत बेसहि लिहस। ⁴⁵सरग क राज्य एक अइसे बेवपारी क नाई अहइ कि जउन बढिया मोती क खोज मँ होइ। ⁴⁶जइसेन ओका एक अनमोल मोती मिला तउ जाइके जउन कछू ओकरे पास रहा, उ बेंच डाएस अउर मोती बेसहि लिहस।

मछरी पकड़इ क जाल

⁴⁷"सरगे क राज्य मछरी पकड़इ बरे झीले मँ फेंक गवा जाल क नाई भी अहइ। जेहमँ किसिम किसिम क मछरी पकड़ लीन्ह गइन। ⁴⁸जब उ जाले मँ मछरी मुचामुच भरि गइन तउ किनारे ओका हींच लीन्ह गवा अउर हुवाँ बैठिके नीक मछरी छौँटिके टोकरिन मँ भरि लीन्ह गइन मुला बेकार मछरी फेंकि दीन्ह गइन। ⁴⁹सृस्टि क अंत मँ अइसे ही होई। सरगदूतन अइहीं अउर धर्मियन मँ स दुस्ट मनइयन क छौँटिके ⁵⁰धधकत भट्टी मँ झोक देइहीं। हुवाँ बस रोउब अउर दौत पीसब होई।" ⁵¹ईसू आपन चलन स पूछेस, "का तू सबइ इ बातन क समझत ह?" उ पचे जवाब दिहन, "हाँ।" ⁵²फिन उ ओनसे कहेस, "देखा, यह बरे हर धरम सासतरी जउन सरग क राज्य क जानत ह, एक अइसे ग्रिहस्त क नाई अहइ, जउन आपन बखरी स नई पुरानी चीजनक बाहेर निकारत ह।"

ईसू क आपन देस लौटब

(मकुस 6:1-6; लूका 4:16-30)

⁵³इ सबन डिस्टान्त कथा क पूरा कइके उ हुवाँ स चला गवा। ⁵⁴अउर आपन देस आइ गवा। फिन उ आराधनालय मँ उपदेस देब सुरू करेस। ँसे हर कउनो

अचरजे मैं पड़िके कहइ लाग, “एँका अइसी सूझबूझ अउर अद्भुत कारजन क सक्ती कहाँ त मिल गइ? 55का इ उहई बढई क बेटवा नाहीं अहइ? का एँकर महतारी क नाउँ मरियम नाहीं अहइ? याकूब, यूसुफ, समौन अउर यहूदा इहई क भाई अहई न? 56एँकर सबही बहिनियन हमरे बीच मैं नाहीं अहई? तउ फिन ओका इ सब कहाँ त मिली गवा?” 57तउ उ सबइ ओका मानेन नाहीं। फिन ईसू कहेस, “कउनो नबी क आपन गाँव अउर घरवा क छाँड़िके, सब मनइयन इज्जत करत हीं।” 58तउ ओनके बिसवास न होइके कारण उ हुवाँ जिआदा अद्भुत कारजन नाहीं किहेस।

हेरोदेस क ईसू क बारे मैं सुनब

(मरकुस 6:14-29; लूका 9:7-9)

14 उ समइ गलील क राजा हेरोदेस जब ईसू क बारे मैं सुनेस 2तउ उ आपन नउकरन स कहेस, “इ बपतिस्मा देइवाला यूहन्ना अहइ जउन मरि गएन मैं जी गवा बाटइ। अउर इहइ बरे इ सक्तिन ओहमाँ करत बाटिन जेसे इ इन अद्भुत कारजन क करि डावत हा।”

यूहन्ना क कतल

3इ उहइ हेरोदेस रहा जउन यूहन्ना क गिरफ्तार कइके, जंजीरे स बाँधि, जेल मैं धाँध दिहसा इ उ हिरोदियास क कहे प किहेस, जउन पहिले ओकरे भाई फिलिप्पुस क पत्नी रही। 4यूहन्ना ओसे अक्सर कहत रहत रहा: “तोहका एँकरे साथ नाहीं रहइ चाही।” 5एँह प हेरोदेस ओका मार डावइ चाहत रहा, मुला उ मनइयन स डेरत रहा काहेकि मनई यूहन्ना क नबी मानत रहेन।

6-7 मुला जब हेरोदेस क जन्म दिन आवा तउ हिरोदियास क बिटिया हेरोदेस अउर ओकर मेहमनवन क समन्वा नाचिके हेरोदेस क एँतना खुस किहेस कि सपथ खाइके ओका देइ बरे बचन दिहेस कि उ जउन कछू चाही। 8आपन महतारी क उस्कावे मैं आइके उ कहेस, “मोका टाठी मैं धइके बपतिस्मा देइवाला यूहन्ना क मँडू द्या।” 9तउ भी राजा बहोत दुखी रहा मुला आपन सपथ अउर आपन मेहमान क कारण उ ओकर मंसा पूरी होइके हुकुम दिहेस। 10उ जेल मैं यूहन्ना क मँडू काटइ बरे मनई पठएस। 11तउ यूहन्ना क मँडू टाठी मैं धइके लइ आवा गवा अउर लरकी क दइ दीन्ह गवा। उ ओका आपन महतारी क लगे लइ गइ। 12यूहन्ना क चलन आएन अउर ओकरे धड़े क गाड़ दिहन अउर फिन उ पचे आइके ईसू क बताइ दिहन।

ईसू क पाँच हजार स जिआदा मनइयन क खियाउब

(मरकुस 6:30-44; लूका 9:10-17; यूहन्ना 6:1-14)

13जब ईसू एँकरे बारे मैं सुनेस तउ उ हुवाँ स नाउ मैं बइठिके निर्जन जगहिया मैं अकेल्ले चला गवा। मुला जब

भीड़ क एँकरे बारे मैं मालूम भवा तउ आपन सहरन स पड़्यौ पड़्यौ ओकरे पाछे होइ गएन। 14ईसू जब नाउ स निकरि के किनारे आवा तउ उ बड़ी भीड़ देखेस। ओका ओन प दया आइ अउर ओनके बेरमियन क नीक किहेस।

15जब साँझ भई तउ ओकर चलन ओकरे लगे आइके कहेन, “इ निर्जन जगह अहइ अउर बहोत देर होइ गइ अहइ, तउ भीड़ क बिदा कइ द्या, जेसे उ सबइ गाउँ मैं जाइके आपन बरे खइया बेसहि लेई।”

16मुला ईसू ओनसे कहेस, “एँनका कहुँ जाइ क जरुरत नाहीं बा। तू एनका कछू खाइके दइ द्या।”

17उ पचे ओसे कहेन, “हमरे लगे पाँच ठु रोटी अउर दुइ मछरिन क छोड़िके अउर कछू नाहीं अहइ।”

18ईसू कहेस, “ओका मोरे लगे लइ आवा।” 19उ भिड़िया क मनइयन स कहेस कि उ पचे घास प बइठि जाई। फिन उ पाँच ठु रोटी अउर दुइ मछरिन क लइके सरग कइती देखेस अउर भोजन बरे परमेस्सर क धन्यवाद दिहेस। फिन रोटी क टुकड़न मैं तोड़ेस अउर ओनका आपन चलन क दिहेस। उ चलन टुकड़न क मनइयन मैं बाँटिन। 20सबइ जिआरा भरि के जेएन। ओकरे बाद खियाए स बचा भवा टुकड़न स चलन बारह झउआ भरि दिहेन। 21स्त्रियन अउर गदेलन क तजिके हुवाँ खवइया कउनो पाँच हजार रहेन।

झीले प ईसू क चलब

(मरकुस 6:45-52; यूहन्ना 6:15-21)

22एँकरे तुरंतइ पाछे ईसू आपन चलन क नाउ प बइठाएस अउर जब ताई। उ भिड़िया क बिदा करइ, ओसे पहिले आपन चलन स गलील झील क उ पार जाइ क कहेस जइसे उ सबइ ईसू क जाइ स पहिले पहुँच जाई। 23उ भीड़ क बिदा कइके पराथना करइ अकेल्ले पहाड़ी प चला गवा। साँझ होइ प उ हुवाँ अकेला रहा। 24तब ताई नाउ किनारे मीलन दूर तलक जाइ चुकी रही अउर लहरन क हिलोर स नाउ डोलय लाग काहेकि आँधी उल्टी चलत रही। 25भित्सांरे तीन अउर छः बजे क बीच मैं ईसू झीले प चलत ओनके लगे आवा। 26ओकर चलन जब ओका झीले प चलत देखेन तउ घबराइके आपुस मैं कहइ लागेन, “इ तउ कउनो भूत अहइ!” उ पचे डेराइ के चिचियाने। 27ईसू फउरन ओनसे बात करत भवा कहेस, “हिम्मत राखा। इ मइँ हउँ, अब अउ जिन डेराआ।”

28पतरस जवाब देत ओसे कहेस, “पभू, अगर तू अहा, तउ मोका पानी प चलिके आपन लगे आवइ क कहा।”

29ईसू कहेस, “पतरस, चला आवा।”

पतरस नाउ स निकरि के पानी प ईसू कइँती चल पड़। 30जबहिँ उ जोर क आँधी देखेस उ घबराइ गवा। उ बूड़इ लाग अउर नरियान, “पभू, मोर रच्छा करा।”

³¹ईसू तुरंतहि ओकरे नगिचे पहुँचिके ओका थाम लिहिस अउर ओसे कहेस, “अरे, कम बिसवास करइया, तू संदेह काहे किहा?”

³²अउर उ सबइ नाउ प चढ़ि आएन। आँधी पटाइ गइ। ³³नाउ क मनइयन ईसू का आराधना किहेन अउर कहेन, “तू सच परमेस्सर क पूत अहा।”

³⁴तउ झील पार कइके उ सबइ गन्नेसरत क किनारे उतरि आएन। ³⁵जब हुवाँ क रहइवाला ईसू क पहिचानेन तउ उ पचे ओकरे अवाई क खबर आसपास क सबहिँ ठउरन में पठइ दिहना। जेसे मनई जउन बेरमिया रहेन, उ सबन क हुवाँ लइ आएन। ³⁶अउर ओसे पराथना करइ लागेन उ ओनका आपन ओढ़ना क छोर छुअइ दे। अउर जउन छुइ लिहेन, उ सबइ पूरंपूर चंगा होइ गएन।

मनई क बनवा बिधान स परमेस्सर क व्यवस्था

बड़वार अहइ

(मरकुस 7:1-23)

15 फिन कछू फरीसियन अउर धरमसास्तिरियन यरूसलेम स ईसू क लगे आएन अउर ओसे पूछेन, ²“तोहार चेलन हमरे पूर्वजन क रीति रिवाज क काहे नाहीं मनतेन? उ पचे खइया खाइ स पहिले आपन हथवन क काहे नाहीं धोउतेन!”

³जवाबे में ईसू ओनसे पूछेस, “आपन रीति रिवाजन क कारण तू परमेस्सर क हुकुम क काहे टारत ह? ⁴काहेकि परमेस्सर तउ कहेस, ‘तू आपन महतारी बाप क इज्जत करा’* अउर जउन कउनो, ‘महतारी बाप क बेज्जत करइ, ओका जरूर मार डावइ चाही।’* ⁵मुला तू कहत ह कि अगर कउनो आपन महतारी बाप स कहइ, ‘मई आपन सब कछू परमेस्सर क अर्पन कइ दिहे हउँ, यह बरे तोहार मदद नाहीं कइ सकत हउँ।’ ⁶इ तरह ओका आपन बाप क मानइ क जरूरत नाहीं। एह तरह तू आपन रीति रिवाजे क कारण परमेस्सर क हुकुम क नाहीं मान्या।

⁷अरे कपटी मनइयो! तोहरे बारे में यसायाह ठीक ही भविस्सबाणी किहेस। उ कहे रहा:

⁸ ‘इ सबइ कहत हीं कि हमार मान करत हीं, मुला रहत ऐनकइ मन मोसे सदा दूर

⁹ अर्पन भइ आराधना मोका ऐनकी बगैर कामे की काहेकि सिखउतेन इ सबइ मनइयन क कहिके आपन धरम क उपदेस बनवा नेम मनई क।”

यसायाह 29:13

‘तू ... करा’ निर्ग 20:12; व्यवस्था 5:16

‘महतारी ... चाही’ निर्ग 21:17

¹⁰उ भिड़िया क आपन नगिचे बोलौएस अउर ओनसे कहेस, “सुना अउर समझ ल्या कि ¹¹मनई क मुँहे स जउन भीतर जात ह उ ओका अपवित्तर नाहीं करत, मुला ओकरे मुँहना स निकरा सब्द ओका अपवित्तर करत ह।” ¹²तब ईसू क चेलन ओकरे निअरे आएन अउर बोलेन, “का तोहका पता बाटई कि तोहरे बात क फरीसियन बहोत बुरा मान गएन?”

¹³ईसू जवाब दिहेस, “हर पउधा जेका सरगे में बसा मोर परमपिता नाहीं लगाएन, ओका उजाइ दीन्ह जाई। ¹⁴ओनका तजि द्या, उ सबइ तउ आँधरन क नेता अहई। जदि एक आँधर दुसरे आँधर क राह देखावत ह, तउ उ दुइनों गइहा में गिरि जात हीं।”

¹⁵जवाबे में पतरस ओसे कहेस, “हम पचन क पवित्तर न होइ क बारे में पहिले दीन्ह में विस्तान्त क समझावा।”

¹⁶ईसू कहेस, “का तू अबहूँ नाहीं समझया? ¹⁷का तू नाहीं जानत अहा कि जउन कछू कउनो क मुँहे में जात ह, उ ओकरे पेटे में पहुँचत ह अउर फिन टट्टी स निकर जात ह? ¹⁸मुला जउन मनई क मुँहे स बाहेर आवत ह, उ ओकरे मने स निकरत ह। इहइ ओका अपवित्तर करत ह। ¹⁹काहेकि बुरा बिचार, कतल, व्यभिचार, बुरी चाल, चोरी, झूठ अउर निन्दा सबइ बुराई मनवा स ही आवत हीं। ²⁰इहइ अहई जेसे कउनो अपवित्तर बनत ह। बे हाथ धोए खाइ स कउनो अपवित्तर नाहीं होत।”

गैर यहूदी स्त्री क मदद

(मरकुस 7:24-30)

²¹फिन ईसू उ ठउर क तजिके सूर अउ सैदा कइँती चला गवा। ²²हुवाँ क एक कनानी स्त्री आई अउर चिचियाइ लाग, “हे पभूँ, दाऊद क पूत मोहे प दया करा। मोरी बिटिया प दुष्ट आतिमा बुरी तरह स सवार अहइ।”

²³ईसू ओसे एक सब्द भी नाहीं कहेस, तउ ओकर चेलन ओकरे लगे आएन अउर बिनती करइ लागेन, “इ हमरे पाछे चिचिआत भई आवति अहइ। एँका दूर हटावा।”

²⁴ईसू जवाब दिहेस, “भोका सिरिफ इम्राएल क लोगन क भटक गई भेड़न क बजाय कउनो अउर बरे नाहीं पठवा ग अहइ।”

²⁵तब उ स्त्री ईसू क समन्वा निहुरिके बिनती करेस, “हे पभूँ, मोर सहायता करा!”

²⁶जवाबे में ईसू कहेस, “इ ठीक नाहीं कि गदेलन क खइया लइके ओका कुकुरन क अगवा नाई दीन्ह जाइ।”

²⁷उ बोली, “इ ठीक बाटइ पभूँ, मुला आपन मालिक क मेजे स गिरि गवा चूर चराबा में स थोड़ बहोत तउ घरे क कूकुर खाइ लेत हीं।”

²⁸तब ईसू कहेस, “बिटिया, तोहार बिसवास बहोत मजबूत क अहइ। जउन तू चाहत ह, पूर होइ जाइ।” अउ फउरन ओकर बिटिया चंगा होइ गइ।

ईसू क बहोतन क चंगा करब

²⁹फिन ईसू हुवाँ स चल पड़ा अउर गलील झीले क किनारे पहुँच गवा। उ एक पहाड़े प चढ़िके बड़ठ गवा।

³⁰बहोत बड़ी भीड़ लँगड़ा, लूला, आँधर, अपाहिज, बहिरा, गूँगा अउर अइसे दूसर बेरमिया क लइके ओकरे लगे आवइ लागेन। भिड़िया ओकरे गोड़वा प भुइयाँ प डाइ दिहेस अउ ईसू ओन पचेन क चंगा किहेस। ³¹एँसी भीड़ क मनइयन क, इ लखिके बहिर, गूँगा बोलत अहई, अपाहिज नीक होइ गएन, लँगड़ा लूला चलइ फिरइ लागेन अउ आँधर अब देख पावत हीं, बड़ा अचरज भवा। उ सबइ इम्राएल क परमेस्सर क सराहना करइ लागन।

चार हजार स जिआदा मनइयन क खइया क खियाउब

(मरकुस 8:1-10)

³²ईसू तब आपन चेलन क आपन नगिचे बोलाएस अउ कहेस, "मोका इ भीड़े पर तरस आवत अहइ काहेकि इ मनइयन तीन दिना स बराबर मोर संग अहई अउर एँके लगे कछू खइया के भी नाहीं बाटइ। मई एँनका भूखा ही नाहीं पठवइ चाहत हउँ काहेकि होइ सकत ह कि कहुँ उ पचे रस्ता मँ चक्कर खाइके गिरि जाई।"

³³तबहि ओकर चेलन कहेन, "एँतनी बड़वार भीड़ बरे अइसी दूर क ठउर मँ एँतना बेर खइया क कहाँ स मिली?" ³⁴तब ईसू ओनसे पूछेस, "तोहरे लगे केतनी रोटी अहई?"

उ सबइ कहेन, "सात रोटी अउर कछू नान्ह नान्ह मछरिना।"

³⁵ईसू भिड़िया स भुइयाँ प बढे के कहेस। ³⁶अउर ओन सात रोटी अउर मछरियन क लइके उ परमेस्सर क धन्यवाद दिहेस अउ रोटिनक तोड़ेस अउर आपन चेलन क देइ लाग। फिन ओकर चेलन लोगन क बाँटि दिहेन। ³⁷सब लोग तब तलक खात रहेन जब अघाइ नाहीं गएन। फिन ओकर चेलन बचा भवा टुकड़न स सात झउआ भरेन।

³⁸दित्रयन अउर बचवन क छाँड़िके हुवाँ चार हजार पुरुसन खइया क खाएन। ³⁹भीड़े क बिदा कइके ईसू नाउ मँ आवा अउर मगदन क च्छेत्र मँ चला गवा।

यहूदी नेतन क छलावा

(मरकुस 8:11-13; लूका 12:54-56)

16 फिन फरीसियन अउर सदूकियन ईसू क लगे आएन। उ पचे ओका परखा चाहत रहेन तउ उ सबइ ओका कउनो अदभुत कारज करइ क कहेन, काहेकि मालूम होइ जाइ कि उ परमेस्सर क बाटइ।

²ईसू जवाब दिहेस, "सूरज बूड़ क समइ तू पचे कहत ह मौसम बढ़िया रही काहेकि अकास ललछउँड अहइ। ³अउर सूरज निकरे प तू कहत ह, 'आज अँधड़

आई काहेकि अकास धँधुर अउ ललछउँड अहइ।' तू अकासे क लच्छन पढ़इ जानत ह, मुला आपन समइ क लच्छन क नाहीं पढ़ सकत्या। ⁴अरे दुस्त अउर पापी पीड़ी क मनई कउनो अदभुत चीन्हा देखइ चाहत हीं मुला ओनके बजाय योना क अदभुत चीन्हा क कउनो अउ दूसर अदभुत चीन्हा नाहीं देखाइ जाई।" फिन उ ओनका तजि क चला गवा।

ईसू क चिताउनी

(मरकुस 8:14-21)

⁵ईसू अउर ओनकइ चेलन झीले क पार चला गएन पर उ पचे रोटिया लइ आउब बिसरि गएन। ⁶एँह पइ ईसू ओनसे कहेस, "चउकन्ना रहया अउर फरीसियन अउ सदूकियन क खमीरे स बचि रहया।"

⁷उ पचे आपुस मँ तजबीजइ लागेन अउर बोलेन, "इ होई कि उ यह बदे कहेस कि हम पचे कउनो रोटी संग नाहीं लइ आएन।"

⁸उ पचे का बिचारत रहेन, ईसू इ जानत रहा, तउ उ बोला, "अरे कमती बिसवास क मनइयो! तू सबइ आपुस मँ काहे सोचत बिचारत अहा कि तोहरे लगे रोटी नाहीं।"

⁹का तू पचे अबहुँ नाहीं समुझ पाया अउर तोहका याद नाहीं अहइ कि पाँच हजार मनइयन बरे उ पाँच रोटी अउर फिन केतना झउआ भरिके तू सबइ उठाया ह? ¹⁰अउर का तोहका याद नाहीं चार हजार मनइयन बरे सात रोटी अउर फिन केतना झउआ भरिके तू पचे उठाए रहया? ¹¹काहे नाहीं समझत्या कि मई तोहसे रोटियन क बारे मँ बात नाहीं कहयो? मई तउ तोहका फरीसियन अउर सदूकियन क खमीरे * स दूर रहइ बरे कहयो ह।"

¹²तबहि उ पचे समुझ गएन कि रोटिया क खमीरे स नाहीं अरथ रहा मुला फरीसियन अउर सदूकियन क सिच्छा स चौकस रहइ क अरथ रहा।

पतरस कहत ह कि ईसू अहइ मसीह

(मरकुस 8:27-30; लूका 9:18-21)

¹³जबहि ईसू कैसरिया फिलिप्पी क पहुँटा मँ आइ तउ उ आपन चेलन स पूछेस, "मनइयन का कहत बाटेन, कि मई मनई क पूत कउन हउँ?"

¹⁴उ पचइ कहेन, "कछू मनइयन कहत हीं तू यूहन्ना अहा बपतिस्मा देइवाला। दूसर मनइयन कहत हीं कि तू एलिय्याह* अहा अउ कछू मिला कहत हीं कि तू यिर्मयाह* या नबियन मँ स कउनो एक अहा।"

खमीरे फरीसियन अउ सदूकियन क कुसंग।

एलिय्याह एक तु नबी ईसू स 850 बरिस पहिले भवा रहा।

यिर्मयाह एक तु नबी ईसू स 600 बरिस पहिले भवा रहा।

¹⁵ईसू आपन चेलन स कहस, “अउर तू का कहत ह कि मई कउन हउँ?”

¹⁶समौन पतरस जवाब दिहस, “तू मसीह अहा, साच्छात जिअत परमेस्सर क पूता।”

¹⁷जवाबे मँ ईसू ओसे कहेन, “योना क पूत समौन। तू धन्य अहा काहेकि तोहका इ बात कउनो मनई नाहीं, मुला सरगे मँ बसा भवा मोर परमपिता देखाएस ह। ¹⁸मई तोहसे कहत हउँ कि तू पतरस अहा। अउर इहइ चट्टाने प मई आपन कलीसिया बनउबा। मउत क सकती *ओह प अपरबल नाहीं होइ। ¹⁹मई तोहका सरगे क राज्य क कुंजी देत हउँ। काहेकि भुइयों प जउन कछू तू बँधब्या उ परमेस्सर क जरिए सरग मँ बँध दीन्ह जाइ अउर धरती पर जेका तू न बंधबे, ओका सरगे मँ भी न बान्धा जाई।” ²⁰फिन उ आपन चेलन क कर्रा हुकुम दिहस कि उ सबइ कउनो क इ न बतावई कि उ मसीह अहइ।

ईसू आपन मउत क भविस्सबाणी

(मरकुस 8:31-9:1; लूका 9:22-27)

²¹उ समइया ईसू आपन चेलन क बतावइ लाग कि, ओका यरूस्लेम जाइ चाहीं। जहाँ ओका धरम सास्तिरियन, बुजुर्ग यहूदी नेतन अउर मुख्ययाजकन क जरिए यातनायें दइके मरवाइ दीन्ह जाई। फिन तीसर दिन उ मरा भवा मँ जी जाई।

²²तबहि पतरस ओका अलगइ लइ गवा अउर ओकर डांट-डपट करत ओसे कहस, “ओ पर्भू! परमेस्सर तोह पइ दया करी। तेरे संग अइसा कबहुँ न होई।”

²³फिन ईसू ओकरे कइँती मुड़ि गवा अउर बोला, “पतरस मोरे समन्वा स हटि जा, सइतान! तू मोरे बरे एक रोड़ा अहा। काहेकि तू परमेस्सर क नाई नाहीं, मनई क नाई सोचत बिचारत ह।”

²⁴फिन ईसू आपन चेलन स कहस, “जदि कउनो मोरे पाछे आवा चाहत ह, तउ उ आपन क बिसराइ के, आपन क्रूस उठाइ लेइ अउर मोरे पाछे होइ जा। ²⁵जउन कउनो आपन जिन्नगी क बचावइ चाहत बा, उ ओका हेराइ देइ। मुला जउन कउनो मोरे बरे आपन जिन्नगी तजि देइ, उहइ ओकर बचाइ सकत ह। ²⁶जदि कउनो आपन जिन्नगी दइके समूचा संसार भी पाइ जाइ तउ ओका ओसे कउन फायदा? आपन जिन्नगी क फिन स पावइ बरे कउनो भला का दइ सकत ह? ²⁷मनई क पूत सरगदूतन क संग आपन परमपिता क महिमा क संग आवइवाला अहइ, जउन हर कउनो क ओकर करम क फल देई। ²⁸मई तोहसे सच कहत हउँ, हियों कछू अइसे लोग खड़ा अहई जउन तब तलक नाहीं मरिहीं जब तलक उ पचे मनई क पूत क ओकरे राज्य मँ आवत न निहारि लेई।”

मउत क सकती अधोलोक क दुआर।

तीन ठु चेलन क मूसा अउर एलियाह क संग ईसू क दरसन

(मरकुस 9:2-13; लूका 9:28-36)

17 छः दिना पाछे ईसू, पतरस, याकूब अउर ओकर भाई यूहन्ना क संग लइके अकेल्ले मँ उँचके पहाड़े प गवा। ²हुवाँ ओनके समन्वा ओकर रूप बदल गवा। ओकर मुँहना सूरज क नाई चमचमाइ लाग अउर ओढ़ना अइसे दमकइ लागेन जइसे रोसनी। ³फिन एकाएक ओनके समन्वा मूसा अउर एलियाह परगट गएन अउर ईसू स बतियाइ लागेन।

⁴इ लखिके पतरस ईसू स बोला, “पर्भू, नीक बाटइ कि हम हियों अहीं। अगर तू चाहा तउ मई हियों तीन तम्बू बनाइ देई एक ठू तोहरे बरे, एक मूसा बरे अउर एक एलियाह क।”

⁵पतरस अबहीं बात करत रहा कि चमचमात बादर आइके ओका ढाकि लिहस अउर बदरे स अकासबाणी भइ, “इ मोर पिआरा पूत अहइ। जैसे मई खूब खुस हउँ। एकर सुना।”

⁶जब चेलन इ सुनेन तउ उ सबइ एँतना ससाइ गएन कि धरती प मुँहना उलटि के गिरि गएन। ⁷तबहि ईसू ओनके लगे गवा अउर ओनका छुअत भवा बोला, “डेराअ जिन, खड़ा हवा।” ⁸जब उ पचे आँखी क ऊपर करेन तउ हुआँ क हुँ। अउर का नाहीं बरन ईसू क पाएन।

⁹जब उ सबइ पहाड़े स उतरत रहेन तउ ईसू ओनका हुकुम दिहस, “जउन कछू तू देख्या ह, तब ताई कउनो क जिन बतावा जब ताई मनई क पूत क मरा भवा स फिन जी न जाइ।”

¹⁰फिन ओकर चेलन ओसे पूछेन, “धरम सास्तिरियन फिन काहे कहत हीं कि एलियाह क पहिले तू आउब तय अहइ?” ¹¹जवाब देते भवा ईसू ओनसे कहस, “एलियाह आवत अहइ, उ हर चीज क तरकीबे स ठीक कइ देइ। ¹²मुला मई तोहसे कहत हउँ कि एलियाह जउन अब तलक आइ चुका अहइ। मुला मनइयन ओका पहिचानेन नाहीं। अउर ओकरे संग जइसा चाहेन वइसा किहेन। ओनके जरिए मनई क पूत क भी वइसे ही सतावइ जाइवाला अहइ।” ¹³तबहि ओकर चेलन समुझ पाएन कि उ ओनसे बपतिस्मा क देवइया यूहन्ना क बारे मँ कहे रहा।

बेरमिया लरिका क चंगा कीन्ह जाब

(मरकुस 9:14-29; लूका 9:37-43)

¹⁴जब ईसू भीड़ मँ वापस आइ गवा तउ एक मनई ओकरे पास आवा। अउर ओका दंडवत कइके ¹⁵बोला, “हे पर्भू मोरे बेटवा प दया करा। ओका मिर्गी आवत ह। उ बहोत तड़फड़ात ह। उ आगी या पानी मँ बहोत के गिरि पड़त ह। ¹⁶मई ओका तोहरे चेलन क लगे लइ आवा, मुला उ सबइ ओका चंगा नाहीं कइ पाएन।”

17जवाबे में ईसू कहेस, “अरे भटका भवा अबिसवासी मनइयन! मई केतैना समइ तोहरे संग अउर रहब? केतैना समइ मई अइसे ही तोहार सहब जात रहब? ओका हियाँ मोरे लगे लिआवा।” 18फिन ईसू दुस्ट आतिमा क हुकुम दिहिस अउर उ ओहमा स बाहिर निकर आइ अउ उ लरिका फउरन नीक होई गवा। 19फिन ओकर चेलन अकेल्ले में ईसू क लगे जाइ क पूछेन, “हम इ दुस्ट आतिमा क काहे नाहीं निकर पाए?”

20ईसू ओनका बताएस, “काहेकि तोहमाँ बिसवास क कमी अहइ। मई तोहसे सच कहत हउँ, जदि तोहमाँ सरसों क बिया जेतैना बिसवास अहइ तउ तू इ पर्वत स कहि सकत ह, ‘हियाँ स हटि के हुवाँ चला जा’ अउर उ चला जाई। तोहरे बरे असंभव कछू भी नाहीं होई।” 21 *

ईसू क आपन मउत क बारे में बताउब

(मरकुस 9:30-32; लूका 9:43-45)

22जब ईसू क चेलन आपन अउर गलील में ओकरे साथ मिलेन तउ ईसू ओनसे कहेस, “मनई क पूत, मनइयन क जरिए एकड़वाइ जाइवाला अहइ, 23अउर उ ओका मार डइहीं। मुला तीसरे दिना उ फिन जी जाई।” एँह प ईसू क चेलन बहोत बिआकुल होइ गएन।

चुंगी (टिक्स) क भुगतान

24जब ईसू अउर ओकर चेलन कफरनहूम में आएन तउ मंदिर क दुइ दरम क चुंगी (टिक्स) उगहिया वालेन पतरस क लगे आएन अउर बोलेन, “का तोहार गुरु दुइ दरम क मंदिर क चुंगी नाहीं देत?” 25पतरस जवाब दिहिस, “हाँ, उ देत ह।” अउर उ घरवा में आवा जहाँ ईसू रहा। पतरस क बोलइ स पहिले ईसू बोल उठा, “समौन, तोहार का बिचार अहइ? धरती क राजा केसे चुंगी लेत हीं? खुद अपने बचवन स, या दूसर क बचवन स?”

26पतरस जवाब दिहिस, “बाहिर क मनइयन स।” तबहिं ईसू ओसे कहेस, “यानी ओकरे आपन बचवन क छूट मिलत ह। 27मुला हम पचे ओन मनइयन क कोहाय न देइ। यह बरे झिलिया प जा अउर आपन कटिया फेंक दया अउर फिन जउन मछरी धरे में आइ जाइ ओकर मुँहना खोल दिहा। तोहका चारि दरम क सिक्का मिली। ओका लइके मोरे अउ आपन बरे ओनका दइ दिहा।”

सबते बड़कवा कउन

(मरकुस 9:33-37; लूका 9:46-48)

18 तब ईसू क चेलन ओकरे लगे आइके पूछेन, “सरगे क राज्य में सबते बड़कवा कउन अहइ?”

2उहइ घड़ी ईसू एक ठु गदेला क अपने लगे बोलाँएस अउर ओका ओकरे समन्वा खड़ा कइके 3उ कहेस, “मई तोहसे सच कहत हउँ जब ताई कि तू सबइ मनवा क फिरउब्या नाहीं अउर गदेलन क नाई नाहीं बनि जाब्या, सरगे क राज्य में घुसि न सकब्या। 4यह बरे आपन खुद क जउन कउनो इ बचवा क नाई आपन क नवावत ह, सरगे क राज्य में उहइ सबते बड़कवा अहइ।”

5“अउर जउन कउनो अइसे गदेलन जइसे मनई क मोरे नाउँ में मान लेत ह उ मोका मान लेत ह। 6मुला जउन मोह में बिसवास करइया मोरे कउनो अइसे गदेल क रस्ते क रोड़ा बनि जात ह, नीक होइ कि ओकरे गटइया में एक ठु जाँत क पाट लटकाइके गहिरि समुद्दर में बोर दीन्ह जाइ। 7संसार क मनइयन बरे ठोकर क कारण मोका दुख बाटइ मुला ठोकर तउ सदा आवत रइहीं। किंतु दुख तउ ओहँ प अहइ जोकरे जरिए ठोकर आइ जात हीं।

8यह बरे तोहार हाथ या गोड़ तोहरे बरे मुसीबत बन जाइ तउ ओका काटि के फेंक दया काहेकि सरगे में बगैर हाथ या बे गोड़ क अनन्त जीवन में घुस जाइ पाउब तोहरे बरे जियादा नीक अहइ। एँकरे बजाय कि दुइनउँ हाथ अउर गोड़वन क साथे तोहका नरके में न बुझइवाली आगी में नाइ दीन्ह जाइ। 9जदि तोहार आँखी तोहरे बरे बियाध बन जाइ तउ तू ओका बाहिर निकारि क डाइ दया, काहेकि सरगे में काना होइके अनन्त जीवन में घुसि पाउब तोहरे बरे जिआदा बढ़िया बा, बजाय एँकर कि दुइनउँ आँखिन क संग तोहका नरके में डाइ दीन्ह जाइ।

हेराइ गइ भेड़ क डिस्टान्त कथा

(लूका 15:3-7)

10“तउ देखा, मोर एँन गदेलन में स कउनो क तुच्छ जिन समइया। मई तोहका बतावत हउँ कि सरगे में बसइ मोरे परमपिता क लगे ओकर रच्छा करइवालन सरगदूतन क पहुँच सदा रहत ह। 11 *

12“बतावा तू का गूँथत मथत अहा? जदि कउनो क लगे सौ भेड़ होई अउर ओहमाँ स एक भटक जाइ तउ का उ दूसर निन्नाबे क पहड़िया प तजिके उ एक ठू भटक गइ भेड़ क ढूँढ़इ न जाई? 13अउर ओका उ मिल जाई मई तोहसे सच सच कहत हउँ कि निन्नाबे क बजाय जउन खोई नाहीं रहिन, ओका पाइके खूब खुस होई।

14इ तरह सरगे में बसा तोहार परमपिता का नाहीं चाहत कि मोर इ गदेलन में स कउनो एक भी भटक जाइ।

पद 21 कछू यूनानी प्रतिथन में पद 21 जोड़ी गइ अहइ: “अइसी दुस्ट आतिमा सिरिफ पराथना अउ उपवास कइ स निकरत ह।”

पद 11 कछू यूनानी प्रतिथन में पद 11 जोड़ी गइ अहइ: “मनई क पूत भटक गवा मनइयन क उद्धार बरे आइ अहइ।”

जब कउनो तोहार बुराइ करइ

(लूका 17:3)

15“जदि तोहार भाई तोहरे संग कउनो बुरा बेवहार करइ तउ अकेल्ले मँ जाइके आपुस मँ ही ओकर देख बताइ द्या। जदि उ तोहार सुनि लेइ तउ तू आपन भाई क फिन जीत लिहा। 16मुला जदि उ तोहार न सुनइ तउ एक दुइ क आपन संग लइ जा काहेकि हर बाते क दुइ तीन साच्छी होइ जाइ। 17जदि उ ओनकी भी न सुनइ तउ कलीसिया क बताइ द्या। अउर जदि उ कलीसिया क भी न मानइ तउ फिन तू ओसे अइसा बेवहार करा जइसे उ विधर्मी होइ जाइ या चुंगी (टिक्स) क उगहिया।

18“मई तोहसे सच बतावत हउँ जउन कछू तू धरती प बँधब्या सरग मँ पभू क जरिए बाँधि दीन्ह जाई अउर जउन कउनो क तू धरती प न बँधब्या, ओका सरगे मँ परमेस्सर क जरिए न बान्धा जाई।

19“मई तोहसे इ भी बतावत हउँ कि इ धरती प जदि तोह मँ स कउनो दुइ क बिचार मेल खात होई तउ एक होइ क सरग मँ मोरे परमपिता स कछू मंगब्या तउ उ तोहरे बरे ओका पूरा करी 20काहेकि जहाँ मोरे नाउँ प दुइ या तीन मोरे मनवइयन क रूप मँ एकटठा होत हीं, हुवाँ मई ओनके संग हउँ।”

छमा क न करइया नउकर क दिस्टान्त कथा

21फिन पतरस ईसू क लगे गवा अउर बोला, “पभू, मोका आपन भाई क केलेनी दाई आपन खिलाफ जुर्म करइ प छमा कइ देइ चाही? जदि उ सात दाई जुर्म करइ तउ भी?”

22ईसू कहेस, “न सिरिफ सात दाई, मुला मई तोहसे बतावत हउँ तोहका ओका सतहत्तर * दाई तलक छमा करत जाइ चाही।”

23“सरगे राज्य क तुलना ओ राजा स कीन्ह जाइ सकत ह जउन आपन नउकरन स हिसाब अदा करइ क बिचारे रहा। 24जब उ हिसाब लेब सुरु करेस तउ ओकरे समन्वा एक अइसे मनई क लइ आवा गवा जेहँ प दसउ लाख रूपया निकरत रहा।

25मुला ओकरे लगे चुकाइ देइ क कउनो उपाय नाहीं रहा। ओकर मालिक हुकुम दिहेस कि उ नउकर क, ओकर पत्नी, ओकर बाल बचवन अउर जउन कछू माल असबाब अहइ, सब समेट के बेचे स कर्ज अदा कइ दीन्ह जाइ।

26“एँह प ओकर नउकर ओकरे गोड़वा प गिरिके गिड़गिड़ाइ लाग, ‘धीरा धरा, मई सब कछू चुकाइ देइहउँ।’ 27तब जाइके मालिक क तरस आवा अउर ओकर कर्जा माफ कइ दिहस।

28“फिन जब उ नउकर हुवाँ स जात रहा तउ ओका ओकर एक साथी नउकर मिला जेका सउ दिनारी *देइ क रहा। उ ओकर ढोंढा पकड़िके गटइया क दबावत कहेस, ‘जउन तोहका मोर देइ क अहइ, लउटाइ द्या।’

29“एँह प ओकर साथी नउकर गोड़वा प गिरि गवा अउर बीसउ नह जोड़ेस, ‘धीरा धरा, मई तोहका दइ देब।’

30“मुला उ मना कइ दिहस। एँतना ही नाहीं उ ओका तब तलक बरे, जब तलक उ ओकर कर्ज अदा न कइ देइ, जेल मँ पठएस। 31दूसर संगी नउकरन देखेन कि का भवा, उ सबइ बहोत दुखी भएन। जउन कछू भवा रहा, सब आपन मालिक क जाइके बताइ दिहन।

32“तब ओकर मालिक ओका बोलाएस अउर कहेस, ‘अरे नीच नउकर, मई तोहार सारा कर्ज माफ कइ दिहउँ काहेकि तइने कहेस कि दया क भीख द्या।

33का तोहका आपन संगी नउकर प दया नाहीं करइ चाही जइसे मई तोह प दया किहउँ?’ 34तउ ओकर मालिक कोहाइ गवा अउर ओका तब ताई सजा भुगतइ बरे सुपुर्द करेस जब ताई समूचा कर्ज अदा न होइ जाइ।

35“तउ जब तलक तू आपन भाई बंद क आपन मनवा स छमा नाहीं कइ दिहा मोर सरगे क परमपिता भी तोहरे साथ वइसा ही बेवहार करी।”

तलाक

(मरकुस 10:1-12)

19 इ बातन बताइ के ईसू गलील स लउटिके यहूदिया क पहुँटा मँ यरदन नदी क पार गवा। हुवाँ एक ठु भारी भीड़ ओकरे पाछे होइ गइ। उ बेरमिया मनई क चंगा किहेस।

3कछू फरीसियन ओका परखइ बरे ओकरे निअरे पहुँचेन अउर बोलेन, “का इ ठीक बाटइ कि कउनो आपन पत्नी क कउनो भी कारण स तलाक दइ सकत ह?”

4जवाब देत ईसू कहेस, “का तू पवित्तर सास्तरन मँ नाहीं बाख्या कि जबहि संसार क रचइया एँका रचेस, सुरुआत मँ ‘उ एक पुरुस अउर एक स्त्री बनाएस?’ * 5अउर परमेस्सर कहे रहा, ‘इहइ कारण आपन महतारी बाप क तजिके पुरुस आपन पत्नी क संग होत भवा भी एक तन होइके रही।’ * 6तउ उ सबइ दुइ नाहीं रहतेन मुला एक रूप होइ जात हीं। यह बरे जेका परमेस्सर जोड़ेस ह ओका कउनो मनई क अलगावइ नाहीं चाही।”

दिनारी रूपया मूरे मँ एक दीनार लगभग चालीस पइसा क बराबर।

‘उ ... बनाएस’ उत्पत्ति 1:27 यसा 5:2

‘इहइ ... रही’ उत्पत्ति 2:24

सतहत्तर हियाँ साते क सत्तर गुना तक अरथ कीन्ह जाइ सकत ह। उत्पत्ति 4:24

7उ फरीसियन बोलेन, “फिन मूसा इ काहे ठहराएन ह कि कउनो पुरुस आपन पत्नी क तलाक दइ सकत ह। सर्त इ अहइ कि उ ओका तलाकनामा लिखि के दइ देइ।”

8ईसू ओनसे कहेस, “तोहरे मन की कठोरता क कारण मूसा पत्नी क तलाक देने की अनुमति तोहरे दी। मुला सुरुआत मैं अइसी रीति नाहीं रही।” 9तउ मैं तोहसे कहत हउँ कि जउन व्यभिचार क तजिके आपन पत्नी क कउनो अउर कारण स तलाक देत ह अउर कउनो दूसर स्त्री क बीहत ह तउ उ व्यभिचार करत ह।”

10एह प ओकर चलन ओसे कहेन, “जदि एक स्त्री अउर एक पुरुस क बीच अइसी बात होइ तउ कउनो क बिआह नाहीं करइ क चाहीं।”

11फिन ईसू ओनसे कहेस, “हर कउनो तउ इ उपदेस क नाहीं मानत। एँका बस उहइ मान सकत ह जेका एँकर च्छमता प्रदान की गया अहइ। परमेस्सर स ताकत मिलि गइ अहइ। 12कछू अइसेन बाटेन जउन महतारी क गर्भ स नपुंसक पइदा भएन। अउर कछू ऐसे अहइ जउन लोगोन द्वारा नपुंसक बना दिये अहइ। अउर अखिर मैं कछू अइसे भी बाटेन जउन सरगे क राज्य क कारण बिआह नाहीं करइ क फइसला कइ लिहना। इ उपदेस क जउन लइ सकत होइ, लइ लो।”

ईसू क आसीर्बाद-गदेलन बरे

(मरकुस 10:13-16; लूका 18:15-17)

13फिन मनइयन कछू गदेलन क ईसू क लगे लइ आएन कि उ ओनके मुँडवा प हथवा धइके ओनका आसीर्बाद देइ अउ ओनके बरे पराधना करइ। मुला ओकर चलन ओका डाटेन। 14ओह प ईसू कहेस, “गदेलन क रहइ दया, ओनका जिन रोका, मोरे लगे आवइ दया काहेकि सरगे क राज्य अइसेन क अहइ।” 15फिन उ गदेलन प आपन हाथ रखेस अउर हुवाँ स चला गवा।

एक खास प्रस्न

(मरकुस 10:17-31; लूका 18:18-30)

16हुवाँ एक मनई रहा। उ ईसू क लगे आवा अउर कहेस, “गुरु अनन्त जीवन पावइ बरे मोका का नीक काम करइ चाहीं?”

17ईसू ओसे कहेस, “नीक का अहइ, एँकरे बारे मैं मोसे काहे पूछत अहा? काहेकि नीक तउ सिरिफ एक ही बाटइ। फिन भी तू अगर अनन्त जिनगी मैं घुसइ चाहत ह, तउ तू हुकुमन क मान ल्या।”

18उ ईसू स पूछेस, “कउन स हुकुम?”

तब ईसू बोला, “कतल जिन करा। व्यभिचार जिन करा। चोरी जिन करा। झूठी साच्छी जिन द्या। 19आपन

बाप अउर आपन महतारी क इज्जत करा।*अउर ‘जइसे तू आपन खुद क पिआर करत ह, वइसे ही आपन पड़ोसी स पिआर करा।’*”

20नउजवान ईसू स पूछेस, “मई इन बातन क मान्यो ह। अब मोहमाँ कउनै बात क कमी बाटइ?”

21ईसू ओसे कहेस, “जदि तू सिद्ध बनइ चाहत अहा तउ जा अउर जउन कछू तोहरे लगे बा, ओका बेचिके धन गरीबन क दइ द्या जैसे सरग मैं तोहका धन मिल सकइ। फिन आवा अउर मोरे पाछे होइ जा।”

22मुला जब उ नउजवान मनई इ सुनेस तउ उ दुखी होइके चला गवा काहेकि उ बहोत धनी रहा।

23ईसू आपन चलन स कहेस, “मई तोहसे सच कहत हउँ कि धनी क सरगे क राज्य मैं घुसि पाउब मुस्किल बाटइ। 24हाँ मई तोहसे कहत हउँ कि कउनो धनी मनई क सरग क राज्य मैं घुसि पाउब स एक ऊँटे क सुई क छेद स निकर जाब सहल बा।”

25जब ओकर चलन सुनेन तउ अचरज मैं आइके पूछेन, “फिन केकर उद्धार होइ सकत ह?”

26ईसू ओनका देखत भवा कहेस, “मनइयन बरे इ असम्भव बाटइ मुला परमेस्सर बरे सब कछू होइ सकत ह।”

27जवाबे मैं पतरस ओसे कहेस, “देखा, हम पचे कछू तजिके तोहरे पाछे होई गएन ह। तउ हमका का मिली?”

28ईसू ओनसे कहेस, “मई तू सबन स सच कहत हउँ कि नवा जुग मैं जब मनई क पूत आपन प्रतापी सिंहासने प बिराजी तउ तू भी, जउन मोरे पाछे अहा, बारह सिंहासन प बइठिके इम्राएल कबारह कबीले क निआव करब्या। 29अउर मोरे बरे जेतना भी घर-बार या भाइयन या बहिनियन या बाप या महतारी या बचवन या खेतन क तजि दिहे अहइ, उ सब सौ गुना जिआदा पाइ अउर अनन्त जीवन क हकदार होई। 30मुला बहोत स जउन अब पहिले अहई, पिछला होइ जइहीं अउर जउन पिछला अहई उ पहिले होइ जइहीं।

मजूर क डिस्टान्त कथा

20 “सरगे क राज्य एक जमींदार क नाई बाटइ जउन भिन्सारे आपन अंगूरे क बगीचा बरे मजदूर लइ आवइ निकरा। 2उ चाँदी क एक रूपया प मजदूर क लगाइके ओनके आपन अंगूरे क बगिया मैं काम करइ पठएस।

3नौ बजे क करीब जमींदार फिन घरवा स निकरा अउर उ देखेस कि कछू मनई बजारे मैं एँहर ओहर अइसे ही बेकार खड़ा रहेन। 4तब उ ओनसे कहेस, ‘तू पचे भी मोरे अंगूरे क बगीचा मैं जा, मई तोहका जउन

‘कतल ... करा’ निर्ग 20:12-16

‘जइसे ... करा’ लैव्य 19:18

कछू ठीक अहइ, देवा।⁵ तउ उ पचे भी बगीचा मँ काम करइ गएन।

“फिन करीब बारह बजे अउर दुबारा तीन बजे क करीब, उ वइसा ही किहेस।⁶ करीब पाँच बजे उ फिन आपन घरवास गवा अउर कछू मनइयन क बजारे मँ एँह कइँती ओह कइँती खड़ा देखेस। उ ओनसे पूछेस, ‘तू हियाँ दिन भइ बेकार ही काहे खड़ा होइ रहया?’

⁷ उ सबइ ओसे कहेन, ‘काहेकि हम सबन क कउनो मजूरी प नाहीं राखेस।’ “उ ओनसे कहेस, ‘तू भी मोरे अंगूर क बगीचा मँ चला जा।’

⁸ “जब साँझ भइ तउ अंगूर क बगीचा क मालिक आपन प्रधान करमचारी क कहेस, ‘मजूरन क बोलाइके आखिरी मजूरे स सुरू कइके जउन पहिले लगावा ग रहेन ओन सबन क मजूरी दइ द्या।’

⁹ “तउ उ पचे जउन पाँच बजे लगावा रहेन, आएन अउ ओहमँ स हर एक क बस एक ही चाँदी क रूपया मिला।¹⁰ फिन जउन पहिले लगावा ग रहेन, उ आएन। उ सोचेन ओनका कछू जिआदा मिली मुला ओनमा हर कउनो क एक तु चाँदी क रूपया मिला।¹¹ रूपया तउ उ सबइ लइ लिहन मुला जर्मीदारे स सिकाइत करत।¹² उ सबइ कहेन, ‘जउन पाछे लगावा रहेन, उ पचे बस एक ही घंटा भइ काम किहेन अउ तू हम पचेन क ओतँना ही दिहा जेतँना ओनका। जब कि हम पचे दिन भइ चिलचिलात धूपे मँ मेहनत कीन्ह।’

¹³ “उ जवाबे मँ ओहमँ स कउनो एक स जर्मीदारे स कहेस, ‘मीत, मइँ तोहरे साथ कउनो अनिआव नाहीं करयोँ ह। का हम पचे तय नाहीं कीन्ह कि मइँ तोहका चाँदी क एक तु रूपया देब?’¹⁴ जउन तोहार होत ह, ल्या अउर चला जा। मइँ सबते पाछे रखा गवा इ मजदूर क ओतँना ही मजूरी देइ चाहब जेतँना तोहका देत अही।¹⁵ का मोका इ अधिकार नाहीं कि जउन मइँ आपन धने क चाहूँ, कइ सकउँ? मइँ अच्छा हउँ का तू एँसे मने मँ जरत ह?’

¹⁶ “इ तरह आखिरी पहिले होइ जइहीं अउर पहिले आखिरी होइ जइहीं।”

ईसू आपन मउत क बारे मँ बताएस

(मकुस 10:32-34; लूका 18:31-34)

¹⁷ जब ईसू आपन बारहु चेलन क संग यरूसलेम जात रहा तउ उ ओनका एक कइँती लइ गवा अउर चलत चलत ओनसे बोला, ¹⁸ “सुना, हम यरूसलेम पहुँचइ क अही। मनई क पूत हुवाँ मुख्ययाजकन अउर धरम सास्तिरियन क हाथे मँ दइ दीन्ह जाई। उ पचे ओका मृत्युदण्ड क काबिल ठहरइहीं।¹⁹ फिन ओकर हँसी हँसारत करवावइ अउर कोइन स पिटवावइ बरे ओका गैर यहूदियन क दइ देहहीं। फिन ओका क्रूस प चढ़ाई दीन्ह जाई। मुला तिसरे दिन उ फिन जी उठी।”

एक महतारी क गदेलन बरे खास चिरौरी

(मकुस 10:35-45)

²⁰ फिन जब्दी क पूतन की महतारी आपन पूतन क संग ईसू क नगिचे गई अउर उ निहुरिके पराथना करत ओसे कछू माँगिस।

²¹ ईसू ओसे पूछेस, “तू का चाहति अहा?”

उ बोली, “भोका बचन दया कि मोर इ दुइनउँ बेटवन तोहरे राज्य मँ एक तोहरे दाहिन अउर दूसर तोहरे बाई कइँती बइँडँ।”

²² ईसू जवाब दिहस, “तू नाहीं जानत अहा कि तू का माँगत बाट्या? का तू यातनाओं क कटोरा पिउ सकत अहा, जेहका मइँ पिअइवाला हउँ?”

उ सबइ ओसे कहेन, “हाँ पिउ सकित ह।”

²³ ईसू ओनसे बोला, “तू पचे सचमुच उ पिआला पीब्या। मुला मोर दाहिन अउर बाएँ कइँती हक क देवइया मइँ नाहीं हउँ। हियाँ बइँडइ क हक तउ ओनही का बा, जेनके बरे इ मोर परमपिता क जरिए रक्खा गवा अहइ।”²⁴ जब बाकी दसउ चेलन इ सुनेन कि तउ उ पचे दुइनउँ भाइयन प बहोत कोहाय गएन।²⁵ तबबइ ईसू ओनका आपन नगिचे बोलाइके कहेस, “तू जानत ह कि गैर यहूदियन राजा, प्रजा प आपन सकती देखावा चाहत हीं अउर ओनके खास नेता, मनइयन प आपन हक जमावा चाहत हीं।²⁶ मुला तोहरे बीच अइसा न होइ चाही। मुला तू हम स जउन बड़वार बनब चाही, तोहार नउकर बनइ।²⁷ अउ तोहमँ जउन कउनो पहिला बनब चाही, ओका तोहार गुलाम जरूर बनइ क होई।²⁸ तोहका मनई क पूत जइसा होइ क चाही जउन आपन सेवा करावइ नाहीं, मुला सेवा करइ अउर बहोतन क छुटौती बरे आपन प्रान क फिरौती देइ आवा अहइ।”

अँधरे क आँखी

(मकुस 10:46-52; लूका 18:35-43)

²⁹ जब उ सबइ यरीहो सहर स जात रहेन भारी भीड़ ईसू क पाछे होइ गइ।³⁰ हुवाँ सरक क किनारे दुइ अँधर बइँठा रहेन। जब उ सबइ सुनेन कि ईसू हुवाँ स जात बाटइ, उ पचे नरियानेन, “पभूँ दाऊद क पूत! हम प दया करा!”

³¹ एँह प भीड़ ओनका धमकावत चुप रहइ क कहेस। पर उ पचे अउ जिआदा चिल्लानन, “पभूँ दाऊद क पूत! हम प दया करा।”

³² फिन ईसू रुकि गवा अउ ओनका बोलाएस। उ कहेस, “तू का चाहत अहा, मइँ तोहरे बरे का करउँ?”

³³ उ पचे ओसे कहेन, “पभूँ, हम चाहित ह कि फिन स निहारइ लागी।”

³⁴ ईसू क ओन प दया आइ। उ ओनकइ अँखियन क छुएस, अउर तुरंतहि उ पचे फिन लखइ लागेन। उ पचे ओकरे पाछे होइ गएन।

ईसू राजा क नाई यरूसलेम में घुसत ह

(मरकुस 11:1-11; लूका 19:28-38; यूहन्ना 12:12-19)

21 ईसू अउर ओकर चेलन जब यरूसलेम क लगे जैतून पहाड़े क नगिचे बैतफगे पहुँच गएन।² तउ ईसू आपन दुइ चेलन क इ हुकुम दइके पठएस, "आपन सोझइ समन्वा क गाउँ में जा अउर हुवाँ जात भए ही तोहका एक गदही बाँधी मिली। ओकरे लगे ओकर बच्चा भी मिली। ओनका बाँधिके मोरे लगे लइ आवा।³ जदि कउनो तोहसे कछू कहइ तउ ओसे कहया, 'पभू क एकर जरूरत अहइ। उ फउरन ही लउटाइ देई।'"

4 अइसा यह बरे भवा कि नबी अइसा काहे रहा:

5 "सियोन क नगरी स कहि द्या, 'देखा तोहार राजा तोहरे लगे आवत बा। उ नमनसील अहइ, अउर गदहे प सवार अहइ हँ गदहे क बच्चा प जउन एक लादइवाला पसु क बच्चा अहइ।'"

जकर्याह 9:9

6 तउ ओकर चेलन चला गएन अउ वइसा ही किहेन जइसा ओनका ईसू बताए रहा।⁷ उ पचे गदही अउर ओकरे बच्चा क लइ आएन। अउर ओन प आपन ओढ़ना डार दिहन काहेकि ईसू बइठ गवा।⁸ बहोत मिला आपन ओढ़ना राहे में दसाइ दिहेन अउ दूसर मनइयन बृच्छ क टहनी काटेन अउर ओनका राहे प बिछाइ दिहन।⁹ जउन मनई ओकरे आगे चलत रहेन अउर जउन मनई पाछे चलत रहेन, सब पुकारि क कहत रहेन:

"दाऊद क पूत क होसन्ना! * धन्य अहइ जउन पभू क नाउँ प आवत बाटइ! सरगे में बिराजेस परमेस्सर क होसन्ना!"

भजन संहिता 118:26

10 तउ जब उ यरूसलेम में घुसा तब समूचा सहर में हड़बड़ाइ गवा। लोग पुछइ लागेन, "इ कउन अहइ?"

11 लोग ही जवाब देत रहेन, "इ गलील क नासरत क नबी ईसू अहइ।"

ईसू मंदिर में

(मरकुस 11:15-19; लूका 19:45-48; यूहन्ना 2:13-22)

12 फिन ईसू मंदिर क अहाते में आवा अउर उ मंदिर क अहाते में जउन बेंचत बेसहत रहेन, ओन सबन क

बाहेर खदेरेस। उ पइसा क लेवइया देवइया क चउकी उलटि दिहस अउ कबूतरे क दुकानदार क तखता पलटेस।¹³ उ ओन्से कहेस, "पवित्तर सास्तरन में कहत बा, 'मोर घर पराथना घर कहा जाई।' * मुला तू सबइ एँका 'डाकुअन क अइडा' बनावत अहा।" *

14 मंदिर में कछू आँधर, लंगड़ा लूला ओकरे लगे आएन। जेनका उ नीक किहेस।¹⁵ जब मुख्ययाजकन अउर धरम सास्तिरियन ओकर अचरज कारजन क लखेन जउन उ किहे रहा अउर मंदिर में गदेलन क ऊँची आवाजे में कहत सुनेन: "दाऊद क पूत क होसन्ना।"

16 तउ उ पचे कोहाइ गएन अउ ओसे पूछेन, "तू सुनत अहा इ सबन का कहत अहई?"

ईसू ओन्से कहेस, "हँ सुनत अही। का पवित्तर सास्तर में तू बचन नाहीं पढ़या, 'तू गदेलन अउर दूधमुँहन बचवन स स्तुति कराया ह।' *"

17 फिन उ ओनका हुवँइ तजिके यरूसलेम सहर स बाहेर बैतनय्याह चला गवा। जहाँ उ राति बिताएस।

बिसवास क सक्ती

(मरकुस 11:12-14, 20-24)

18 दूसर दिन भिन्सारे जब उ सहर लउटत रहा तउ ओका भूख लागि।¹⁹ रस्ता क किनारे अंजीर क बिरवा क लखेस तउ उ ओकरे नगिचे गवा, मुला ओका ओह प पातन क छोड़िके कछू नाहीं मिल सका। तब उ बिरवा स कहेस, "तोह प आगे कछू फल न लागइ।" अउर अंजीरे क बृच्छ फउरन झुराइ गवा।

20 जइसेन चेलन इ निहारेन तउ अचरजे में आइके पूछेन, "इ अंजीरे क बिरवा एँतनी हाली कइसे झुराइ गवा?"

21 ईसू जवाब देत भवा ओन पचेन स कहेस, "मई तोहसे सच कहत हउँ जदि तोहरे में बिसवास अहइ अउ तू संदेह नाहीं करत बाट्या तउ तू न सिरिफ उ कइ सकत ह जउन मई अंजीरे क बृच्छ कीन्ह, मुला जदि तू इ पहाड़े स कहि द्या, 'उठा अउर आपन क सगरे में बोर द्या' तउ उहइ होइ जाई।²² अउर पराथना करत तू जउन कछू मंगब्या, जदि तोहका बिसवास बा तउ तू पउब्या।"

यहूदी नेता लोगनक ईसू क हक प सक

(मरकुस 11:27-33; लूका 20:1-8)

23 ईसू जब जाइके मंदिर में उ पदेस देत रहा। मुख्ययाजकन अउर बुजुर्ग यहूदी नेतन ओसे पूछेन, "अइसी

होसन्ना इ एक इब्रानी सब्द अहइ। पहिले एकर प्रयोग परमेस्सर स मदद मांगइ बरे कीन्ह जात रहा। मुला इ स्थान पर परमेस्सर या मसीह क तारीफ करत भव आनंद परगट करइ बरे भवा अहइ।

‘मोर ... जाई’ यसा 56:7

‘डाकुअन ... अहा’ यर्म 7:11

‘तू ... कराया ह’ भजन 8:3

बातन क तू कउने हक स करत ह? अउर इ हक तोहका कउन दिहस?"

24जवाबे में ईसू ओनसे कहेस, "मई तोहसे भी एक सवाल पूछत हउँ, जदि तू ओकर जवाब मोका दइ द्या तउ मई तोहका बताइ देब कि मई इन बातन क कउने हक स करत हउँ।" 25बतावा यूहन्ना क बपतिस्मा कहाँ ते मिला रहा? परमेस्सर स या मनई स?"

उ सबइ आपुस में सोच बिचारिके कहइ लागेन, "जदि हम पचेन कहत अही, 'परमेस्सर स' तउ इ हमसे पूछी, 'फिन उ ओह प बिसवास काहे नाहीं करत्या?'" 26किंतु जदि हम कहित ह, 'मनई स' तउ हमका मनइयन क डर बाटइ काहेकि उ पचे यूहन्ना क एक नबी मानत हीं।"

27तउ जवाबे में उ सबइ ईसू स कहेन, "हमका पता नाहीं।"

एह प ईसू ओनसे बोला, "ठीक बा तउ फिन मई भी तोहका नाहीं बतावत हउँ कि इ बातन क मई कउने हक स करत हउँ।"

यहूयिन बरे एक दिस्तान्त कथा

28"अच्छा बतावा तू पचे एँकरे बारे में का सोचत अहा? एक मनई क दुइ बेटवा रहेन। उ बड़के क लगे गवा अउर बोला, 'बेटवा आज मोरे अंगूर क बगिया में जा अउर काम करा।'

29"मुला बेटवा जवाब दिहस, 'मोर मन नाहीं बा' मुला पाछे ओकर मन फिरि गवा अउर उ चला गवा।

30"फिन उ बाप दुसरे बेटवा क लगे गवा अउर ओसे भी वइसे ही कहेस। जवाबे में बेटवा कहेस, 'जी हाँ, मुला उ गवा नाहीं।'

31"बतावा इन दुइनउँ में स जउन बाप चाहत रहा, कउन किहेस?" यहूदी नेतन कहेन, "बड़कवा।"

ईसू ओनसे कहेस, "मई तोहसे सच कहत हउँ। चुंगी (टिक्स) उगहिया अउर वेस्यन परमेस्सर क राज्य में तोहसे पहिले जइहीं। 32इ मई यह बरे कहत हउँ काहेकि बपतिस्मा देवइया यूहन्ना तोहका जिन्गी क सही रस्ता देखोवइ आइ अउर तू ओहमाँ बिसवास नाहीं किहा। मुला चुंगी उगहिया अउर वेस्यन ओहमाँ बिसवास किहेन। तू जब इ देख्या तउ पाछे न मनफिरावा किहा अउ न ओहे प बिसवास।"

परमेस्सर क आपन पूत क पठउब

(मत्कुस 12:1-12; लूका 20:9-19)

33"एक तु अउर दिस्तान्त कथा सुना: एक जमींदार रहा। उ अंगूरे क बगिया लगाएस। ओकरे चारिउँ कईती बाड़ा लगाएस। फिन अंगूरे क रस निकारइ बरे कोल्हू बनवइ क एक गड़हा खोदेस अउर रखवारी बरे एक गुंबद बनवाएस। फिन ओका बटाई प दइके जात्रा प चला

गवा। 34जब अंगूरे क फसल क समइ आइ तउ बगिया क मालिक नउकरन क लगे आपन गुलामन क पठएस जेसे आपन हींसा क अंगूर लइ आवइ।

35"मुला किसानन ओकरे नउकरन क धइ लिहना कउनो क पीटेन, कउने प पाथर उछारेन अउर कउनो क तउ मारि डाएन।

36"एक दाई फिन पहिले स अउ जिआदा नउकरन क पठएस। उ किसानन ओनके संग भी वइसा ही बर्ताव किहेन। 37पाछे उ ओनके लगे आपन बेटवा क पठएस। उ कहेस, 'उ सबइ मोरे बेटवा क मान रखिहइ जरूर।'

38"मुला उ किसानन जब ओकरे बेटवा क देखेन तउ उ सबइ आपुस में कहइ लागेन, 'इ तउ ओकर वारिस अहइ, आवा एँका मारि डाई अउर ओकर वारिस क हक हथियाइ लेई।' 39एह प उ पचे ओका धइके बगिया क बाहेर ढकेलेन अउर मार डाएन।

40"तू का सोचत बाट्या हुवाँ जब अंगूरे क बगिया क मालिक आई तउ किसानन क संग का करी?"

41उ यहूदी याजकन अउ नेतन ओसे कहेन, "काहेकि उ सबइ निरदयी रहेन यह बरे उ ओनका निरदयी होइके मारि डाई अउर अंगूरे क बगिया क दूसर किसानन क बटाई प दइ देइ जउन फसल आवइ प ओका ओकर हींसा देइहीं।" 42ईसू ओनसे कहेस, "का तू सबइ पवित्तर सास्तरन क बचन कभी नाहीं पढ्या।"

'जउने पाथर क मकान क बनवइयन बेकार समझेन, उहइ कोने क सबते जिआदा महिमा क पाथर बन गवा' 'अइसा पर्भू क जरिए कीन्ह गवा जउन हमरी निगाह में अजुबा बाटइ।'

भजन संहिता 118:22-23

43"यह बरे मई तोहसे कहत हउँ परमेस्सर क राज्य तोहसे छीन लीन्ह जाई अउर उ ओन मनइयन क दइ दीन्ह जाई जउन ओकरे राज्य क रीति स बर्ताव करिहइ। 44जउन इ चट्टाने प गिरी, चूर चूर होइ जाई अउ इ चट्टान कउनो प गिरी तउ उ ओका रउँद डाई।"

45जब मुख्ययाजकन अउर फरीसियन ईसू क दिस्तान्त कथन क सुनेन तउ उ पचे समुझ लिहन कि उ ओनके बारे में कहत रहा। 46तउ उ सबइ ओका धरइ क जतन किहन मुला उ पचे मनइयन स डेरत रहेन काहेकि लोग ईसू क नबी मानत रहेन।

बियाहे क भोज प लोगन्क क राजा क बोलावइ क दिस्तान्त कथा

(लूका 14:15-24)

22 एक दाई फिन ईसू ओनसे दिस्तान्त कथन क कहइ लाग। उ बोला, 2"सरगे क राज्य उ राजा क नाई अहइ जउन आपन बेटवा क बियाहे प भोज

दिहेस।³ राजा आपन नउकरन क पठएस कि उ पचे ओन मनइयन क बोलाइ लियावई जेका बियाहे क भोज प न्यौता दीन्ह गवा रहा। मुला उ पचे नाहीं आपन।

⁴“उ आपन नउकरन क फिन पठएस, उ कहेस कि जउन मनइयन क बियाह क भोजे प बोलावा गवा ह, ओनसे कहि द्या, ‘देखा मोर भोज तइयार बा। मोर सॉइ अउर मोटवार ताजा पसू क काटा जाइ चुका बाटइ। सब कछू तइयार अहइ। बियाहे क भोज मँ आइ जा।’

⁵“मुला न्यौतहरी ओह प कउनो धियान नाहीं दिहेन अउर उ सबइ चला गएन। कउनो आपन खेत मँ काम करइ चला गवा तउ दूसर मिला आपन आपन काम धधा पा।⁶ अउ कछू मिला तउ राजा क नउकरन क धइके ओकरे साथे मार—पीट किहेन अउ ओनका मार डाएन।⁷ तउ राजा कोहाइके आपन फउज पठएस। उ सबइ ओन हत्यारन क मउत क घाटे पहुँचाइ दिहस अउर ओनके सहर मँ आगी बार दिहस।

⁸“फिन राजा क नउकरन स कहेस, ‘बियाह क भोज तइयार बाटइ मुला जेकाँ बोलाइ गवा रहा, उ सबइ अजोग माना गएन,⁹ यह बरे गलियन क नोककइ प जा अउर तू जेका पावा, बियाहे क भोज प बोलाइ लिआवा।’¹⁰ फिन नउकरन गलियन मँ गएन अउ जउन भी भला अउर बुरा मनई भेटेन उ पचे ओनका बटोरि लियाएन। अउ सादी क महल मेहमनवन स भरि गवा।

¹¹“मुला जब जेन्हार क लखइ राजा आवा तउ हुवाँ उ एक अइसा मनई क निहारेस जउन बियाहे क ओढ़ना नाहीं पहिरे रहा।¹² राजा ओसे कहेस, ‘मितउ, बियाहे क वस्तर पहिरे बिना हियाँ भीतर कइसे आइ गया?’ पर उ मनई खमोस रहा।¹³ एह प राजा आपन नउकरन स कहेस, ‘एकर हाथ गोइ छौँदिके बाहेर अँधियारे मँ नाइ द्या। जहाँ मनई रोवत अउर दँवा कटकटावत होइहीं।’

¹⁴“काहेकि बोलावा तउ बहोत गवा अहई मुला चुना भवा थोड़के अहई।”

यहूदी नेतन लोगनक छलावा

(मरकुस 12:13-17; लूका 20:20-26)

¹⁵ तब फरीसियन जाइके एक सभा बोलाएन जेसे उ इ बात क फरियाइ सकई कि ईसू क ओकरे आपन ही कही भई बात मँ कइसे फँसावइ।¹⁶ उ पचे अपने चलन क हिरोदियन क संग ओकरे लगे पठएन. उ मनइयन ईसू स कहेन, “गुरु हम जानत अही कि तू सच्चा अहा। तू सचमुच परमेस्सर क राहे क सिच्छा देत अहा। अउर तू कउनो का सोचत ह, एँकइ चिंता नाहीं करत्या काहेकि तू कउनो मनई क हैसियत प नाहीं जाल्या।¹⁷ तउ हमका बतावा तोहार का बिचार बा कि सम्राट कैसर क चुंगी (टिक्स) चुकाउब ठीक अहइ कि नाहीं?”

¹⁸ ईसू ओनकइ बुरा बिचार क समुझ गवा, तउ उ बोला, “अरे कपटियो! तू पचे मौका काहे परखब चाहत

बाट्या?¹⁹ मौका कउनो दीनार देखावा जेसे तू पचे चुंगी अदा करत ह।” तउ सबइ ओकरे लगे एक दीनार लइ आएन।²⁰ तब उ ओनसे कहेस, “एँह प केकर मूरत अउर लिखाई खुदी बा?”

²¹ उ पचइ ओसे कहेन, “कैसर का।”

तब उ ओनसे कहेस, “अच्छा तउ फिन जउन कैसर क अहइ, ओका कैसर क द्या, अउर जउन परमेस्सर क अहइ, ओका परमेस्सर का।”²² इ सुनिके उ पचइ अचरजे स भरि गएन अउर ओका छोड़िके चला गएन।

सदूकियन क चाल

(मरकुस 12:18-27; लूका 20:27-40)

²³ उहइ दिन कछू सदूकियन जउन पुनरुस्थान क नाहीं मनतेन, ओकरे लगे आएन।²⁴ अउ ओसे पूछेन, “गुरु, मूसू क उपदेस क अनुसार जदि बिना बे बाल बच्चा क कउनो मरि जाइ तउ ओकर भाई, निचके क नातेदार होइ क नाते ओकरे विधवा स बियाह करइ अउर आपन भाई क बंस चलावइ बरे संतान पइदा करइ।²⁵ अब मानल्या हम पचे सात तु भाई अही। पहिलौठा बेटवा का बियाह भवा अउर पाछे ओकर मउत होइ गइ। फिन काहेकि ओकरे कउनो संतान नाहीं भइ, यह बरे ओकर भाई आपन भउजी क आपन पत्नी बनइ लिहस।²⁶ तब दुसरका भाई मरि गवा। उहइ घटना तिसरेक क संग भइ। जब तलक सातह भाइयन मरि नाहीं गएन वइसन भवा।²⁷ अउर सब क पाछे उ स्त्री भी मर गई।²⁸ अब हमार पूछब इ अहइ कि पुनरुस्थान मँ ओन सातउ मँ स कउने क पत्नी होई काहेकि सातउ ओका आपन बनाएन?”

²⁹ जवाब देत ईसू ओनसे कहेस, “तू बगद गया काहेकि तू पचे पवित्तर सास्तरन अउर परमेस्सर क सक्ती क नाहीं जनत्या।³⁰ तोहका समझइ चाही कि पुनरुस्थान मँ लोग न तउ बियाह करिहीं अउर न ही कउनो सादी मँ दीन्ह जाई। मुला उ पचे सरगे क दूतन क नाई होइहीं।³¹ इहइ सिलसिला मँ तोहरे फायदा बरे परमेस्सर मरा भवा क पुनरुस्थान क बारे मँ जउन कहेस ह, का तू कबहुँ नाहीं पद्या? उ कहे रहा, ³² ‘मई इब्राहीम क परमेस्सर हउँ, इसहाक क परमेस्सर हउँ अउर याकूब क परमेस्सर हउँ।’* उ मरा हुअन क नाहीं मुला जिन्दा क परमेस्सर अहइ।”³³ जब मनइयन इ सुनेन तउ ओकरे उपदेस प उ सबइ बहोत अचम्भा मँ पड़ि गएन।

सबन ते बड़का हुकुम

(मरकुस 12:28-34; लूका 10:25-28)

³⁴ जब फरीसियन इ सुनेन कि ईसू आपन जवाबे स सदूकियन क चुप कराइ दिहस तब उ सबइ एँकट्टा

भएन। ³⁵ओहमाँ क एक फरीसी ईसू क परीच्छा क बिचार स ओसे पूछेन, ³⁶“गुरु, व्यवस्था में सबन ते बड़का हुकुम कउन स बाटइ?”

³⁷ईसू ओसे कहेस, “तोहका आपन सारे मनवा स, सारी आतिमा स अउर सारी बुद्धि स आपन परमेस्सर पर्भू क पिरेम करइ चाही।” * ³⁸इ सब ते पहिला अउर सब ते बड़ा हुकुम अहइ। ³⁹फिन अइसा ही दूसर हुकुम इ अहइ: ‘आपन पड़ोसी स वइसा ही पिरेम करा जइसा तू अपने स खुद करत ह।’ * ⁴⁰सारे व्यवस्था अउर नबियन क किताबन इन दुइनउँ हुकुमन प टिका बाटइ।”

ईसू क फरीसियन स एक सवाल

(मरकुस 12:35-37; लूका 20:41-44)

⁴¹जब फरीसियन अबहीं एकटटा ही रहने, कि ईसू ओनसे एक ठु प्रस्न पूछेस, ⁴²“मसीह क बारे में तू का बिचारत ह कि उ केकर बेटवा अहइ?”

उ फरीसियन ओसे कहेन, “मसीह दाऊद क पूत ह।” ⁴³ईसू ओसे पूछेस, “फिन आतिमा क बसे में होइके दाऊद ओका ‘पर्भू’ कहत इ काहे कहेस:

⁴⁴‘पर्भू मोरे पर्भू (ईसू) स कहेस: मोरे दाहिन बइठिके राज्य करा जब ताई कि मई दुस्मनन क तोहरे गोड़वा तले न कइ देउँ।’

भजन संहिता 110:1

⁴⁵फिन जब दाऊद ओका ‘पर्भू’ कहेस तउ उ ओकर बेटवा कइसे होइ सकत ह?” ⁴⁶जवाबे में कउनो भी ओसे कछू नाहीं कहि पावा। अउर न ही उ दिना क पाछे कउनो क ओसे पूछइ क हिम्मत भवा।

ईसू यहूदी धरम नेतन क नुक्ताचीनी किहेस

(मरकुस 12:38-40; लूका 11:37-52; 20:45-47)

23 ईसू फिन आपन चेलन अउर भीड़ स कहेस। ²उ कहेस, “धरम सास्तिरियन अउर फरीसियन मूसा क व्यवस्था क अरथ बतावइ क हकदार अहई। ³यह बरे जउन कछू उ सबइ कहई ओह प चलत रहा अउर ओनका मानके करत रहा। मई इ कहत हई काहेकि उ पचे बस कहत रहत ही मुला करतेन नाहीं। ⁴उ पचे मनई क काँधे प एतना बोझा लादि देत ही कि उ सबइ ओका उठाइके चल न सकई अउर लोग्णप दबाव डारत ही कि ओका लइके चलई। मुला उ सबइ खुद ओहमाँ स कउनो प भी चलइ बरे आपन अंगुरी तलक नाहीं हिलउतेन।

⁵उ सबइ नीक काम यह बरे करत ही कि लोग ओनका लखई। असिल मैं उ सबइ आपन ताबीज अउर

पोसाक क झलरे क यह बरे बड़ा स बड़कवा करत रहत ही कि लोग ओनका धर्मात्मा समझई। ⁶उ सबइ जेवनार मैं सबते जिआदा खस जगह पावा चाहत ही। आराधनालयन में ओनका प्रमुख आसन चाही। ⁷बजारे में उ पचे मान क साथ पैलगी करावा चाहत ही। अउ चाहत ही कि लोग ओनका ‘गुरु’ कहिके पुकारई।

⁸‘मुला तू पचे मनइयन स आपन क ‘गुरु’ जिन कहवावा काहेकि तोहार सच्चा गुरु तउ बस एक अहइ। अउर तू सबइ सिरिफ भाई बहिन अहा। ⁹धरती प मनइयन क आपन में स कउनो क भी ‘पिता’ जिन कहइ द्या। काहेकि तोहार ‘पिता’ तउ बस एक ही अहइ, अउ उ सरगे में बा। ¹⁰न ही तू मनइयन क आपन बरे ‘स्वामी’ कहइ द्या काहेकि तोहार स्वामी तउ बस एक ठु बाटइ अउ उ अहइ मसीह। ¹¹तोहमाँ सब ते बड़कवा मनई उहइ होई जउन तोहार नउकर बनी। ¹²जउन आपन खुद क उँचा उठाई ओका नंवई क होई। अउर जउन आपन खुद क नवाई ओका ऊँचा उठाइ जाइ।

¹³‘हे कपटी धरम सास्तिरियो अउर फरीसियो! तोहका धिक्कार अहइ। तू सबइ सरगे क राज्य क दुआर बाँकि दिहा ह। न तउ तू पचे ओहमाँ घुसि पउब्या अउर न ही ओनका जाइ देब्या जउन घुसइ बरे जतन करत ही। ¹⁴*

¹⁵‘अरे कपटी धरम सास्तिरियो अउर फरीसियो! तोहका धिक्कार अहइ। तू कउनो क आपन मत में लइ आवइ बरे धरती अउर समुंद्र पार कइ जात ह। अउ उ तोहरे नेम धरम में आइ जात ह तउ तू ओका आपन स भी दुइ गुना नरक क काबिल बनाइ देत ह।

¹⁶‘अरे कपटी धरम सास्तिरियो अउर फरीसियो! तोहका धिक्कार अहइ। तोहका धिक्कार अहइ जउन कहत ह, ‘जदि कउनो मंदिर क सपथ खात ह तउ ओका सपथ क खाब जरूरी नाहीं मुला अगर कउनो मंदिर क सोने सपथ खात ह तउ ओका सपथ क मानब जरूरी अहइ।’ ¹⁷अरे आँधर मूर्ख लोगो! बड़का कउन अहइ? मंदिर क सोना या उ मंदिर जउन उ सोना क पवित्तर बनएस। ¹⁸तू सबइ इ भी कहत ह, ‘जदि कउनो वेदी क सपथ खात ह तउ कछू नाहीं, मुला जदि कउनो वेदी प धरा चढ़ावा क सपथ खात ह तउ आपन सपथ स बँधा भवा अहइ।’ ¹⁹अरे आँधर लोगो! कउन बड़कवा अहइ? वेदी प धरा चढ़ावा या उ वेदी जेसे उ चढ़ावा पवित्तर बनत ह? ²⁰यह बरे जदि कउनो वेदी क सपथ लेत ह तउ उ वेदी क साथे वेदी प जउन धरा बाटइ, उ सबन क सपथ खात ह। ²¹उ जउन मंदिर अहइ, ओकर

पद 14 कछू यूनानी प्रतियन में पद 14 जोड़ी गइ अहइ: “अरे कपटा धरम सास्तिरियन अउ फरीसियन तू पचे विधवा क धन दौलत हड़पत ह। देखींवा बरे बड़ी बड़ी पराधना करत ह। एकरे बरे तोहका करी सजा मिली।”

‘तोहका ... चाही’ व्यवस्था 6:5

‘आपन ... ह’ लैव्य 19:18

भी सपथ लेत ह उ मंदिर क संग जउन मंदिर क भितरे बा, ओकर भी सपथ खात ह।²²अउर उ जउन सरगे क सपथ खात ह, उ परमेस्सर क सिंहासने क संग जउन उ सिंहासने प बिराजत बा ओकर भी सपथ खात ह।

²³अरे कपटी धरम सास्तिरियो अउर फरीसियो! तोहका धिक्कार अहइ। तोहरे लगे जउन कछू अहइ, तू ओकर दसवाँ, हींसा, हीयाँ तलक कि आपन पुदीना, सौंफ अउर जीरा तक क दसवाँ हींसा परमेस्सर क देत ह। फिन भी तू व्यवस्था क खास बातन, निआव, दाया अउर बिसवास क धकियाइ दिहा। तोहका इ चाहत रहा कि ओन बातन क बगैर छोड़े भए इन बातन क करत जात्या।²⁴अरे आँधर अगुवा लोगो! तू आपन पिअइ क पानी स माछर तउ छान लेत ह पर ऊँटे क लील जात ह।

²⁵अरे कपटी धरम सास्तिरियो अउर फरीसियो! तोहका धिक्कार अहइ। तू आपन खोरा अउर टाटी बाहेर स धोइके फर्छइ करत ह पर ओकरे भितरे तू जउन चाल चपेट या आपन बरे रियायत में पाया ह, भरा बाटइ।²⁶अरे आँधर फरीसियो! पहिले आपन खोरा क भितरे स माँज ल्या जैसे भितरे क साथ साथ उ बाहेर स भी चमकइ लगाइ।

²⁷अरे कपटी धरम सास्तिरियो अउर फरीसियो! तोहका धिक्कार अहइ। तू लीपा पोत भवा समाधि क नाई अहा जउन बाहेर स तउ सुन्नर देखाति अहइ मुला भितरे स मरे हुअन क हाइ अउर हर किसिम क मलिनता स ढँसी रहत ह।²⁸अइसे ही बाहेर स तउ धर्मी देखॉइ देत ह मुला भितरे स चाल चपेट अउर अनभले स बुरा अहा।

²⁹अरे कपटी धरमसास्तिरियो अउर फरीसियो! तोहका धिक्कार अहइ। तू नबियन क बरे मकबरा बनावत ह अउर धर्मीयन क कन्न क सिंगार करत ह।³⁰अउ कहत बाट्या, 'जदि तू आपन पूर्वजन क समइ में पइदा होत्या तउ नबियन क मरवावइ में ओनकइ साथ न देत्या।'³¹अइसे प तू खुद ही साच्छी देत अहा, कि तू मानत बाट्या कि तू ओनकइ बाल-बच्चा अहा जउन नबियन क हत्यारन रहेन।³²तउ तू जउन तोहार पुरखन सुरु करेन, ओका पूरा कइ द्या।

³³अरे कीरा अउर नाग क संतान! तू सबइ कइसे सोच लिहा कि तू नरक भोगइ स छूट जाब्बा।³⁴यह बरे मइँ तोहका बतावत हउँ कि मइँ तोहरे लगे नबियन, बुद्धिमानन अउर गुरुअन क पठवत हउँ। तू पचे ओनमाँ स बहोतन क मार डउब्बा अउर बहोतन क क्रूसे प चढउब्बा। कछू मनइयन क तू सबइ आपन आराधनालयन में कोइन स पिटवउब्बा अउर एक सहर स दूसर सहरे ताई ओनकइ पाछा करत खदरेब्बा।³⁵आखिर निरीह हाबिल स लइके बिरिक्याह क बटेवा जकरयाह ताई जेका तू मंदिरे क गरभ घर अउर वेदी क बीच मारि डाए रह्या हर धर्मी मनई क कतल क सजा तोह प होई।

³⁶मइँ तोहसे सच कहत हउँ कि इ सब कछू बरे इ पीढ़ी क मनइयन क सजा भोगे होई।

यरूसलेम क मनइयन प ईसू क दुःख

(लूका 13:34-35)

³⁷“यरूसलेम, ओ यरूसलेम! तू उ अहइ जउन नबियन क कतल करत ह अउर परमेस्सर क पठए गए दूतन क पाथर मारत ह। मइँ केतनी दाई चाहयो ह कि जइसे कउनो मुर्गी आपन चूजन क आपन पंखा तरे बटोर लेत ह वइसे ही तोहरे गदेलन क बटोर लेउँ। मुला तू पचन नाहीं चाह्या।³⁸तोहार घर समूचइ उजड़ जाई।³⁹मइँ तोहका सच बतावत हउँ तू मोका तब ताई फिन नाहीं देखब्बा जब ताई तू नाहीं कहब्बा, ‘धन्य अहइ उ जउन पभूक नाउँ में आवत।’*”

ईसू मंदिरे क बिनास क भविस्सबाणी किहसे

(मत्कुस 13:1-31; लूका 21:5-33)

24 मंदिर क छोड़िके ईसू जब हुवाँ स होइके जात रहा तउ ओकर चलन ओका मंदिर क इमारत देखॉवइ ओकरे लगे आएन।²पह प ईसू ओनसे कहेस, “तू पचे इ इमारतन क देखत अहा? मइँ तोहका सच सच कहत हउँ, हिआँ तलक एक पाथर प दूसर पाथर टिक नाहीं पाई। एक एक गिराइ दीन्ह जाई।”

³ईसू जब जैतून पहाड़ प बइठा रहा तउ अकेल्ले में ओकर चलन लगे आएन अउर बोलेन, “हमका बतावा इ कब होई? जब तू लउटि अउब्बा अउर इ संसारे क अंत होई तउ कइसे संकेत परगट होईहीं?”

⁴जवाबे में ईसू ओनसे कहेस, “होसियार! तू पचन क कउनो भरमाइ न पावइ।⁵मइँ इ यह बरे कहत हउँ कि अइसे बहोतन अहइँ जउन मोरे नाउँ स अइहीं अउर कइहीं, ‘मइँ मसीह हउँ’ अउर उ सबइ बहोतन क भरमइहीं।⁶तू सबइ नगीचे क जुद्ध क बातन यादूरि क जुद्ध क अफवाह सुनब्बा पर देखा तू घबराया जिन। अइसा तउ होइ मुला अबहीं अंत नाहीं आवा अहइ।⁷हर राष्ट्र दूसर राष्ट्र क खिलाफ अउर एक राज्य दूसर राज्य क खिलाफ खड़ा होई। अकाल पड़ी। हर कतहूँ भुँइडोल आई।⁸मुला इ सब बातन उहइ तरह अहइ जइसे नया पइदा होय क पहले की सुरुआती पीडा।

⁹उ समइ उ पचे तोहका सजा देवाँवइ बरे पकड़वइहीं अउर उ पचे तोहका मरवाइ देइहीं। काहेकि तू सबइ मोर चलन अहा। सबहीं राष्ट्र क लोग तोहसे घिना करिहीं।¹⁰उ समइ बहोत मनइयन क मोह टूटि जाई अउर ओहहि समइ बहुत स बिसवासियन क बिसवास डिग जाई। उ पचे एक दूसर क अधिकारियन क हाथे में दइ देइहीं अउ आपस में घिना करिहीं।¹¹बहोत स झूठे नबियन खड़ा

होइ जइहीं अउर मनइयन क ठगिहीं।¹² काहेकि बुराई क बाढ़ आइ जाए स पिरेम घटि जाई।¹³ मुला जउन अंत तक टिका रही ओकर उद्धार होई।¹⁴ सरगे क राज्य क इ सुसमाचार समूचे संसार में प्रचार कीन्ह जाई। एँसे सब राजन क साच्छी रही अउर तबहीं अंत होइ जाई।

¹⁵ 'यह बरे जबहि तू लोग 'खौफनाक बिनास करइवाली चीज' *क पवित्तर स्थान प खड़ा होइके देखा, जेकरे बारे में दानिय्येल नबी बताएन ह, (पढ़इया खुद समुझ जाई कि एकर अरथ का बाटइ।)¹⁶ तब जउन मनई यहूदिया में होई ओनका पहाड़े प भाग जाइ चाही।¹⁷ जउन आपन घरे क छत प होई, उ घरवा स बाहरे कछू भी लड़ जाइके तर खाले न आवई।¹⁸ अउर जउन बाहरे खेतन में काम करत होई, उ पाछे मुडिके आपन ओढ़ना तक न लेई।¹⁹ उ स्त्रियन बरे जेकरे कोखे में गरभ होइ या जेकर लरिकन दूध पिअत होई, उ दिनन कस्टे क होइहीं।²⁰ पराथना करा कि तोहका जाड़ क दिनन में या सवित क दिन पराइ क न पड़इ।²¹ उ दिनन में अइसी बिपत आई जइसी जबते परमेस्सर सूस्टि रचेस ह, आनु तक कबहुँ नाहीं आइ अउ न कबहुँ आई।²² अउर जदि परमेस्सर उ दिनन क घटावइ क पक्का इरादा न कइ लिहे होत तउ कउनो भी न बच पावत किंतु चुना भएन क कारण उ दिनन में कमती कइ देइ।

²³ 'उ दिनन में जदि कउनो तू पचन स कहइ, 'देखा, इ रहा मसीह' या 'उ रहा मसीह!' तउ ओकर बिसवास जिन किहा।²⁴ मई इ कहत हउँ काहेकि कपटी मसीह अउप कपटी नबी खड़ा होइहीं अउर अइसे अचरज कारजन देखइहीं अउर अद्भुत कारजन करिहई कि बन पड़इ तउ चुने भएन क भी चकमा दइ देई।²⁵ देखा, मई तोहका पहिले ही चेतावनी दइ चुका अहई।

²⁶ 'तउ जदि उ सबइ तोहसे कहई, 'देखा, मसीह जंगल में बा!' फिन हवाँ जिन जाया अउर जदि उ कहई, 'देखा उ कोठरी में छुपा बाटइ!' तउ ओनकइ बिसवास जिन करया।²⁷ मई इ कहत हउँ काहेकि जइसे बिजुली पूरब में सुरू होइके पच्छिम क अकासे तक चमक जात ह वइसे ही मनई क पूत भी परगट होई।²⁸ जहँ कहुँ लहास होई हुआँ गिद्ध एकटा होइहीं।

²⁹ 'उ दिनन जउन मुसीबत पड़ी, ओकरे क बाद:

'सूरज करिया पड़ि जाई चन्दा स चाँदनी न निकसी अकासे स तारा टुटिहीं अउ अकास में आसमानी सवित झकझोर दिन्ह जइहीं।'

यसायाह 13:10; 34: 4,5

³⁰ 'उ समइ मनई क पूत क आवइ क चीन्हा अकास में परगट होई। तबहिं भुइयाँ प सब जातिन क मनइयन

फूटि फूटि क रोइहीं अउर उ सबइ मनई क पूत क सकती अउर महिमा क संग सरग क बदरन में परगट होत देखिहीं।³¹ उ ऊँच सुर क तुरुही क संग आपन दूनन क पठइ। फिन उ पचे सरग क एक छोर स दूसर छोर तलक सब कहुँ स आपन चुना भवा मनइयन क एकटा करी।

³² 'अंजीरे क बूच्छ स उपदेस ल्या। जइसे ही ओकर टहनियन सुकुवार होइ जात हीं अउर कोंपर फूटइ लागत हीं। तू लोग जान जात ह कि गर्मी आवइ क अहइ।³³ वइसे ही जब तू इ सब घटत देख्या तउ समुझ लिहा कि उ समइ नगिचे आइ ग बाटइ, मुला ठीक दुआर तलक।³⁴ मई तू लोगस सच कहत हउँ कि इ पीढ़ी क खतम होइ क पहिले इ सब बातन होइ जइहीं।³⁵ धरती अउर अकास तउ मिट सकत हीं मुला मोर बचन कबहुँ न मिटी।'

सिरिफ परमेस्सर जानत ह कि उ समइ कब आई

(मकुस 13:32-37; लूका 17:26-30, 34-36)

³⁶ 'उ दिना या उ घड़ी क बारे में कउनो कछू न जानत! न सरगे क दूनन अउर न खुद पून। सिरिफ परमपिता जानत ह।³⁷ जइसे नूह क दिना में भवा, वइसे ही मनई क पूत क अवाई भी होई।³⁸ वइसे ही जइसे मनई जन क बाढ़ आवइ स पहिले क दिनन ताई खात पिअत रहेन, बियाह सादी करावत रहेन जब तलक नूह नाउ प नाहीं चढ़ गवा।³⁹ ओनका तब ताई कछू पता नाहीं लगि सका जब ताई प्रलय नाहीं आइ गइ अउर ओन सबन क बहाइ के नाहीं लड़ गइ। मनई क पूत क अवाई भी अइसे ही होई।⁴⁰ उ समइ खेते में काम करत दुइ मनइयन में स एक क लड़ लीन्ह जाई अउर एक क हुवई छोड़ि दिन्ह जाई।⁴¹ चकरी पीसत दुइ स्त्रियन में एक क धइ लीन्ह जाई अउर एक हुवई पाछे छोड़ि दिन्ह जाई।

⁴² 'तउ तू लोग होसियार रहा काहेकि तू नाहीं जनत्या कि तोहार स्वामी कब आई।⁴³ याद राखा अगर घरे क स्वामी जानत होत कि राति क कउनो घड़ी में चोर आइ जाई तउ उ जागत रहत अउर चोरे क आपन घरवा में सेंध नाही लगावइ देत।⁴⁴ यह बरे तू भी तइयार रहा काहेकि जब तू पचे सोच भी नाहीं रहब होब्या, मनई क पूत आइ जाई।

⁴⁵ 'तब सोचा उ भरोसामंद अउ समझदार सेवक कउन बाटइ, जेका स्वामी आपन घरवा क सेवक क ऊपर ठीक समइ प ओनका खइया क देइ बरे लगाएस ह।⁴⁶ धन्य अहइ उ सेवक जेका ओकर स्वामी जब आवत ह तउ ओका दियामया काज करत पावत ह।⁴⁷ मई तोहसे सच कहत हउँ उ स्वामी ओका आपन समूचे धन दौलत क अधिकारी बनाई देई।⁴⁸ दूसर कइँती सोचा एक ठु बुरा सेवक अहइ, जउन अपना मनवा में कहत ह मोर स्वामी बहोत दिना स लुटि क नाहीं आवत

ह। 49 अइसे उ आपन संगी साथी सेवकन स मारपीट करइ लागत ह अउर सराबियन क संग खाब पिअब सुरू कइ देत ह। 50 तउ ओकर स्वामी अइसे दिन आइ जाई जउने दिन उ ओकरे अवाई क सोचत तलक नाहीं अउ जेकर ओका पता तलक नाहीं। 51 अउर ओकर स्वामी ओका बुरे ढंग स सजा देई अउर कपटियन क बीचउबीच ओकर ठउर ठहराई जहाँ लोग रोवत होइहीं अउर दँतवन क किड़किड़ावत रइहीं।

दस कुँवारियन क दिस्तान्त कथा

25 “उ दिन सरग का राज्य ओन दस कुँवारियन क नाई होई जउन मसाल लइके दुलहन स भेंटइ निकरिन। 2 ओनमाँ स पाँच मूरख रहीं अउ पाँट ठु चउकस। 3 पाँच उ मूरख कुँवारियन आपन मसाल तउ थाम लिहन मुला ओनके साथे तेल नाहीं लिहन। 4 ओहँर चउकस कुँवारियन मसाले क साथ कुप्पियन में तेल भी लइ लिहन। 5 काहेकि दुलहन क अवाई में देर होत रही। सबहीं कुँवारियन थके स ओघाइ लागिन अउर ओलर क सोइ गइन।

6 “पर आधी राति में धूम मच गइ। ओ हो, ‘दुलहा आवत बा। ओसे भेंटइ बाहेर जा!’

7 “उहइ छिन उ सबइ कुँवारियन उठि गइन अउर आपन मसाल तइयार किहेन। 8 मूरख कुँवारियन चउकस कुँवारियन स कहेन, ‘हमका आपन तनिक तेल दइ द्या, हमर मसालन बुझि जात अहई।’

9 “जवाबे में सबइ चउकस कुँवारियन बोलिन, ‘नाहीं हम नाहीं दइ सकित। काहेकि फिन इ हमरे बरे पूर न होई अउर न तोहरे बरे। तउ तू पचे तेली क लगे जाइके आपन खातिर बेसहि ल्या।’

10 “जब उ पचे बेसहइ जात रहिन कि दुलहन आइ पहोचेन। फिन उ कुँवारियन जउन तइयार रहिन, उ सबइ ओनके संग भोजे में भीतर घुसिन अउर फिन कउनो फाटक बंद कइ दिहस।

11 “आखिर में उ सबइ बाकी कुँवारियन भी गइन अउर बोलिन, ‘स्वामी, हे स्वामी, दरवाजा खोलि द्या, हमका भीतर आवइ द्या।’

12 “मुला उ जवाब देत भवा कहेस, ‘मई तोहसे सच सच कहत हउँ; मई तोहका नाहीं जानत हउँ।’

13 “तउ होसियार रहा। काहेकि तू न उ दिना क जानत ह, न घड़ी क, जब मनई क पूत लउटी।

तीन सेवकन क दिस्तान्त कथा

(लूका 19:11-27)

14 “सरग का राज्य उ मनई क नाई होई जउन जात्रा प जात भवा आपन नउकरन क बोलाइके अपने समान क रखवारा बनाएस। 15 उ एक क चाँदी स भरी पाँच ठु थैली दिहस। दुसरे क दुइ अउ तिसरे क एक दिहस। उ

हर एक क ओकर जोगग होइ क मुताबिक दइके जात्रा प निकरि गवा। 16 जेका चाँदी क रूपया स भरी पाँच ठु थैली मिलीं, उ फउरन उ पइसे क धंधा में लगाइ दिहस फिन पाँच थैली अउर कमाएस। 17 अइसे ही जेका दुइ थैली मिलिन, उ भी दुइ अउर कमाइ लिहस। 18 मुला जेका एक मिली रही उ कहुँ जाइके भुइँया में गइहा खोदेस अउर स्वामी क धने क गाड़ दिहस। 19 बहोत समइ बीत जाए क पाछे ओन सेवकन क स्वामी लउटि आवा अउर हर कउनो स लेखा जोखा लेइ लाग। 20 उ मनई जेका चाँदी क पाँच थैली मिलिन, आपन स्वामी क लगे गवा अउर चाँदी क पाँच अउर थैली लइ जाइके ओसे बोला, ‘स्वामी, तू मोका पाँच थैली दिहे रहा। चाँद क इ पाँच थैली अउर अहई जउन मई कमायउँ ह।’ 21 ओकर स्वामी ओसे कहेस, ‘साबास! तू भरोसा क बढिया नउकर अहा। तनिक क रकम क बारे में तू बिसवास क जोगग रह्या मई तोहका अउर जिआदा हक देब। भितरे जा अउर आपन स्वामी क खुसी में खुसी मनाव।’

22 “फिन जेका चाँदी क दुइ थैली मिली रहीं, आपन स्वामी क लगे गवा अउर बोला, ‘स्वामी तू मोका चाँदी क दुइ थैली दिहे रहा, चाँदी क इ दुइ थैली अउ अहई जेका मई कमायो ह।’

23 “ओकर स्वामी ओसे कहेस, ‘साबास! तू भरोसा क लायक बढिया नउकर अहा। तनिक रकम क बारे में तू बिसवास क जोगग रह्या। मई तोहका अउर जिआदा हक देब। भितरे जा अउर आपन स्वामी क खुसी में खुसी मनाव।’

24 “फिन उ जेका चाँदी क एक थैली मिली रही, आपन स्वामी क लगे आवा अउर बोला, ‘स्वामी, मई जानत हउँ तू बहोत कठोर मनई अहा। तू हुवाँ काटत ह जहाँ तू बोया नाहीं रहा, अउर जहाँ तू कउनो बिआ नाहीं छिटकाया तू हुवाँ स फसिल बटोरब्या। 25 यह बरे मई डेराइ गवा रहे। तउ मई जाइके चाँदी क थैलिया क भुइँया में गाड़ दीन्ह। इ लइ ल्या जउन तोहार अहइ इ बाटइ, लइ ल्या।’

26 “जवाबे में ओकर मालिक ओसे कहेस, ‘तू एक बुरा आलसी सेवक अहा, तू जानत ह कि मई बिन बोए कटनी करत हउँ, हुवाँ स फसिल बटोरत हउँ। 27 तउ तोहका मोर धन साहूकार क लगे जमा कइ देइ चाही रहा। फिन जब मई आइत तउ जउन मोर रहा बियाज क साथ लइ लेइत।’

28 “यह बरे एँसे चाँदी क एक थैली लइ ल्या अउर जेकरे लगे चाँदी क दस थैली अहई, एँका उहइ क दइ द्या। 29 काहेकि हर उ मनई क जो जउन कछू ओकरे लगे रहा ओकर सही प्रयोग किहेस ओका अउ जिआदा दीन्ह जाई। अउर जेतनी ओका जरूरत अहइ, उ ओसे जिआदा पाई। मुला ओसे, जो जउन कछू ओकरे लगे रहा

ओकर सही प्रयोग नाहीं किहेस, सब कछू छोर लीन्ह जाई।³⁰ तउ उ बेकार क नउकर क बाहेर अँधियरे मँ धकियाइ द्या जहाँ लोग रोइहीं अउर आपन दँत पिसिहीं।'

मनई क पूत सबक निआव करी

³¹'मनई क पूत जब आपन सरगे क महिमा क संग आपन सबही दूतन क संग आपन सानदार सिंहासने प बइठी ³²तउ संसार क सबहिँ लोग ओकरे समन्वा ऐकट्ट होइ जइहीं अउर एक दूसर क वइसे ही अलगाइ देइ, जइसे एक गड़रिया आपन बकरियन स भेड़न क अलगाइ देत ह। ³³उ भेड़न क दाहिन कइँती अउर बकरियन क बाई कइँती राखी। ³⁴फिन उ राजा, जउन ओकरे दाहिन अहइ, ओनसे कही, 'मोरे परमपिता स असीस पाए मनइयो, आवा अउर जउन राज्य तोहरे बरे संसार क सृस्टि स पहिले तइयार कीन्ह ग अहइ, ओकर अधिकारी बनि जा। ³⁵इ राज्य तोहार अहइ काहेकि मईँ भुखान रह्योँ अउ तू मोका कछू खाइके द्या, मईँ पिआसा रह्योँ अउर तू मोका कछू पिअइ क दिहा। मईँ नगिचे स जात भवा अनजान रह्योँ, अउर तू मोका भितरे लइ गया। ³⁶मईँ बेवस्तर रह्योँ, तू मोका ओढ़ना पहिराया। मईँ बेरमिया रह्योँ, अउर तू मोर सेवा किहा। मईँ गिरपतार रह्योँ, अउर तू मोरे लगे आया।'

³⁷'फिन जवाबे मँ धर्मी मनई ओसे पुछिहईँ 'पभूँ, हम पचे तोहका कब भुखान लखा ह अउर खिआवा या पिआसा लखा अउर पिअइ क दिहा? ³⁸तोहका हम कब नगिचे स जात भवा अजनबी लखा अउर भितरे लइ गएन, या बेवस्तर के लखिके तोहका ओढ़ना पहिरावा? ³⁹अउ हम कब तोहका बेरमिया या गिरपतार लखा अउर तोहरे लगे आएन?'

⁴⁰'फिन राजा जवाबे मँ ओनसे कही, 'मईँ तोहसे सच कहत हउँ जब कबहुँ तू मोर भोले भाले मनइयन मँ स कउनो एक बरे भी कछू किहा तउ उ तू मोरे बरे किहा।'

⁴¹'फिन उ राजा आपन बाँई कइँती क मनइयन स कही, 'अरे अभागे लोगो! मोरे नगिचे स चला जा, अउ जउन आगी सइतान अउर ओकरे दूतन बरे तइयार कीन्ह गइ अहइ, उ अनंत आगी मँ जाइके कूद जा। ⁴²इहइ तोहार सजा अहइ काहेकि मईँ भुखान रह्योँ पर तू मोका खाइके कछू नाहीं दिहा, ⁴³मईँ अनजान रहा पर तू मोका भितरे नाहीं लइ गया। मईँ बिन ओढ़ना क बेवस्तर रहा, पर तू मोका ओढ़ना नाहीं पहिराया। मईँ बेरमिया अउर गिरपतार रहा, पर तू मोरे कइँती धियान नाहीं दिहा।'

⁴⁴'फिन उ सबइ भी जवाबे मँ ओसे पुछिहईँ, 'पभूँ, हम तोहका भूखा या पिआसा या अनजान या बिना ओढ़ना क बेवस्तर या बेरमिया या गिरपतार कब लखा अउर तोहार सेवा नाहीं कीन्ह?'

⁴⁵'फिन उ जवाबे मँ ओनसे कही, 'मईँ तोहसे सच कहत हउँ जब कबहुँ तू मोर इन मनइयन मँ स कउनो एक बरे नाहीं किहा, उ मोरे बरे भी नाहीं किहा।'

⁴⁶'फिन इ सबइ बुरे लोग अनन्त सजा पइही अउ धर्मी मनई अनन्त जीवन मँ चला जइहीं।''

यहूदी नेतन क ईसू क कतल करइ क चाल

(मरकुस 14:1-2; लूका 22:1-2; यूहन्ना 11:45-53)

26 इ सब बातन क कहि चुकइ क पाछे ईसू आपन चेलन स बोला, ²'तू पचे जानत ह कि दुइ दिन पाछे फसह क त्यौहार बाटइ। अउर मनई क पूत दुस्मनन क हाथन स क्रूसे प चढ़ाइ जाइ बरे पकड़वाइ जाइवाला अहइ।''

³तब मुख्ययाजकन अउर बुजुर्ग यहूदी नेतन काइफा नाउँ क महायाजक क घरे क आँगन मँ ऐकट्टा भएन। ⁴अउर उ पचे कउनो चाल स ईसू क धरइ अउर मार डावइ क छल करेन। ⁵फिन भी उ सबइ कहत रहेन, 'हमका इ फसह क त्यौहार क दिनन मँ नाहीं करइ चाही। नाहीं तउ होइ सकत ह मनई दंगा फसाद कइ बइठौँ।''

ईसू प इतर क छिरकब

(मरकुस 14:3-9; यूहन्ना 12:1-8)

⁶ईसू जब बैतनिय्याह मँ समौन कोढ़ी क घरे रहा। ⁷तबही एक स्त्री चिकना, स्फटिक क सीसी मँ बहोत महँग इतर भरिके लइ आई अउर ओका ओकरे मूँडे प उड़ेल दिहस। उ समइ उ पटरा प टेक लगाइ क बइठा रहा। ⁸जब ओकर चेलन इ देखेन तउ उ सबइ किरोध मँ आइके बोलेन, 'इतर क अइसी बर्बादी काहे कीन्ह गइ? ⁹इ इतर तउ महँग दामे मँ बिक सकत रहा अउर फिन उ धने क दीन दुखियन मँ बाँटि जाइ सकत रहा।''

¹⁰ईसू जानि गवा कि उ सबइ का कहत अहईँ। तउ ओनसे बोला, 'तू इ स्त्री क काहे तंग करत अहा? उ तउ मोरे बरे एक सुन्नर काम करेस ह। ¹¹काहेकि दीन-दुखी तउ हमेसा तोहरे पास रइहीं* पर मईँ तोहरे साथ हमेसा नाहीं रहब। ¹²उ मोरे सरीर प इ सुगंधि छिरकिके मोरे गाड़ा जाइके तइयारी करेस ह। ¹³मईँ तोहसे सच कहत हउँ समूची दुनिया मँ जहँ कहुँ भी सुसमाचार क प्रचार अउर फइलाव कीन्ह जाइ, वही ऐकर याद मँ जउन कछू इ किहेस ह, ओकर चर्चा होई।''

ईसू क दुस्मन यहूदा बनत ह

(मरकुस 14:10-11; लूका 22:3-8)

¹⁴तब यहूदा इफकरियोती जउन ओकर बारहु चेलन मँ एक रहा, मुख्ययाजकन क लगे गवा अउर ओसे

बोला, ¹⁵“यदि मैं ईसू क तोहका पकरवाइ देउँ तउ तू मनई मोका का देब्या?” तब उ पचे यहूदा क चौंटी क तीस रूपया देइ बरे इच्छा परगट किहेन। ¹⁶उहइ समइ स यहूदा ईसू क धोखा दइ के पकड़वावइ क ताक मैं रहइ लाग।

ईसू क आपन चलन क संग फसह भोज

(मरकुस 14:21-22; लूका 22:7-14, 21-23;

यूहन्ना 13:21-30)

¹⁷बिना खमीरे क रोटी क त्रौहार स पहिले दिन ईसू क चलन आइके पूछेन, “तू का चाहत ह कि हम तोहरे खाइके बरे फसह भोज क तइयारी कहाँ जाइके करी?”

¹⁸ईसू कहेस, “गाउँ मैं उ मनई क लगे जा अउर ओसे कहा, कि गुरु कहेस ह, ‘मोर तय भई घरी निगचे बाटइ, मैं तोहरे घर आपन चलन क संग फसह क त्रौहार मनइहउँ।” ¹⁹फिन चलन वइसा ही करेन जइसा ईसू बताए रहा अउर फसह क त्रौहार क तइयारी किहेस।

²⁰दिन बडत ईसू आपन बारहु चलन क संग मेज पर बइठा रहा। ²¹तबहीं ओनके खइया क खात उ बोला, “मई सच कहत हउँ, तोहमाँ स एक मोका धोखे स पकरवाई।” ²²उ सबइ बहोत दुखी भएन अउ ओनमाँ स हर कउनो आपुस मैं पूछइ लागेन, “पभू उ मई तउ नाहीं हउँ। बतावा का मई अहउँ।”

²³तब ईसू जवाब दिहस, “उहइ जउन मोरे संग खाना लेय के बरे एक टाठी मैं हाथ डए बा मोका धोखा स पकड़वाई। ²⁴मनई क पूत तउ जाई ही, अइसा कि ओकरे बारे मैं पवित्तर सास्तरन मैं लिखा बाटइ। मुला उ मनई क धिक्कार बा जउन मनई क जरिए मनई क पूत पकड़वाइ जात अहइ। उ मनई बरे केतना नीक होत कि ओकर जन्म ही न भवा रहत।”

²⁵तब ओका धोखे स पकरवावइ वाला यहूदा बोलि उठा, “हे गुरु, उ मई नाहीं हउँ। का मई हउँ?” ईसू ओसे कहेस, “हाँ अइसा ही अहइ जइसा तू कह्या ह।”

पभू क भोज

(मरकुस 14:22-26; लूका 22:15-20; 1 करिंथकरांस

11:23-25)

²⁶जब उ पचे खइया क खात ही रहेन, ईसू रोटी लिहस, ओका असीसेस अउर फिन तोडेस। फिन ओका चलन क देत भवा उ बोला, “ल्या एँका भकोसा, इ मोर देह अहइ।”

²⁷फिन उ दाखरस क खोरा उठाएस अउर धन्यबाद देइ क पाछे ओका ओन पचेन क देत भवा कहेस, “तू पचे एहमाँ पिआ। ²⁸काहेकि इ मोर खून अहइ जउन एक नवा करार की सुरुआत अहइ। इ बहोतन बरे बहाइ जात ह। जेसे ओनके पापक छमा करब संभउ होइ जाइ। ²⁹मई तोहसे सच कहत हउँ उ दिना तक दाखरस न

चीखब जब ताई आपन परमपिता क राज्य मैं तोहरे साथ नवा दाखरस न पिउ लेउँ।”

³⁰फिन उ पचे भजन गाइके जैतून पहाड़े प गएन।

ईसू क कहब: सब चलन ओका तजि देइहीं

(मरकुस 14:27-31; लूका 22:31-34; यूहन्ना 13:36-38)

³¹फिन ईसू ओनसे कहेस, “आज राति तू पचन क मोह मैं बिसवास दुग जाई। काहेकि पवित्तर सास्तरन मैं लिखा अहइ:

‘मई गड़रिया क मारब अउर झुंड क भेड़न तितराइ बितराइ जइहीं।’

जकर्याह 13:7

³²पर फिन स जी जाए प मई तोहसे पहिले गलील चला जाब।”

³³पतरस जवाब दिहस, “चाहे सब मिला तोहमाँ बिसवास दुगाइ देई, मुला मई कबहूँ न खोउब।”

³⁴ईसू ओसे कहेस, “मई तोहसे सच कहत हउँ आज इहइ राति मुर्गा क बाँग देइ स पहिले तू तीन दाई मोसे मुकर जाब्या।”

³⁵तब पतरस ओसे कहेसे, “अगर मोका तोहरे संग मरि जाइ क होइ तउ भी तोसे कबहूँ न मुकरब।” बाकी सब चलन इहइ कहेन।

ईसू क एकान्त मैं पराथना

(मरकुस 14:32-42; लूका 22:39-46)

³⁶फिन ईसू ओकरे संग उ जगह प आवा जउन गतसमनी कहा जात रहा। अउर उ आपन चलन स कहेस, “जब ताई मई हुवाँ जाउँ अउर पराथना करउँ, तू सबे हियइ बइठा।” ³⁷फिन ईसू पतरस अउर जब्दी क दुइनउँ बेटवन क आपन संग लइ गवा। अउर दुख अउ घबराहट महसूस करइ लाग। ³⁸फिन उ ओनसे कहेस, “मोर मन बहोत दुखी बा, जइसे मोर प्रान निकरि जइहीं। तू मोरे संग हियँई ठहर जा अउर होसियार रहा।”

³⁹फिन तनिक अगवा बइइ क बाद उ धरती प निहुरिके पराथना करइ लाग। उ कहेस, “हे, मोर परमपिता, जदि होइ सकइ तउ यातना क कटोरा मोसे टरि जाइ। फिन भी जइसा मई चाहत हउँ वइसा नाहीं मुला जइसा तू चाहत ह वइसा ही कर।” ⁴⁰ओकरे पाछे उ आपन चलन क लगे गवा अउर ओनका सोवत पाएस। उ पतरस स कहेस, “तउ तू पचे मोर संग एक घंटा भी नाहीं जागि सक्या। ⁴¹जागत रहा अउर पराथना करा जेसे तू परीच्छा मैं न पड़ि जा। तोहार आतिमा तउ उहइ करब चाहत ह जउन चंगा बा, मुला, तोहार सरिर दुर्बल अहइ।”

⁴²एक दाई फिन उ जाइके पराथना किहेस अउर कहेस, “हे मोर परमपिता, जदि यातना क कटोरा मोरे

बागैर पिए टर नाही सकत तउ तोहार इच्छा पूरी होइ जाइ।" ⁴³तब उ आवा अउ ओनका फिन सोवत पावा। उ पचेन क आँखन थकी रहिन। ⁴⁴तउ उ ओनका छोड़िके फिन गवा अउर तिसरी दाई भी पहिले क नाई ओनही सब्दन में पराथना करेस। ⁴⁵फिन ईसू आपन चलन क लगे गवा अउर ओनसे पूछेस, "का तू अबहूँ आराम स सोवत अहा? सुना, समइ आइ ग अहइ, जब मनई क पूत पापी मनइयन क हथवन मैं दइ दीन्ह जाई।" ⁴⁶उठा, आवा चली। देखा मोका धरइवाला इ बा।"

ईसू क गिरफ्तार करब

(मरकुस 14:43-50; लूका 22:47-53; यूहन्ना 18:3-12)

⁴⁷ईसू जब बोलत रहा, यहूदा जउन बारहु चलन मैं एक रहा, आवा। ओकरे संग तरवारन अउर लाठियन स लइस मुख्ययाजकन अउर बुजुर्ग यहूदी नेतन क पठई एक भारी भीड़ भी रही। ⁴⁸यहूदा जउन ओका पकड़वावइ वाला रहा, ओनका एक इसारा बतावत भवा कहेस, "जउन कउनो क मई चूमउँ, उहइ होई, ओका धइ लिहा।" ⁴⁹फिन उ सीधे ईसू क लगे गवा अउ बोला, "हे गुरु!" अउर बस उ ईसू क चूम लिहिस।

⁵⁰ईसू ओसे कहेस, "मीत, जउन काज बरे तू आइ अहा, ओका करा।"

फिन भिड़िया क लोगन क लगे जाइके ईसू क दहबोच कइ गिरफ्तार कइ लिहना। ⁵¹फिन जउन मिला ईसू क संग रहेन, ओनमाँ स एक तरवारी हींच लिहस अउर वार कर महायाजक क नउकर क कान काट लिहस। ⁵²तब ईसू ओसे कहेस, "आपन तरवार क मियान मैं घुसेड़ द्या। जउन तरवार चलावत हीं उ पचे तरवारे स मार डावा जइहीं।" ⁵³का तू नाही सोचत अहा कि मई आपन परमपिता क बोलाइ सकत हउँ अउ उ फउरन सरगे क दूतन क बारहु फउज स भी जिआदा मोरे लगे पठइ देई? ⁵⁴मुला मई अइसा करउँ तउ पक्वितर सास्तरन मैं लिखी बात कइसे पूर होइ जाई कि सब कछू अइसे ही होइ क अहइ?"

⁵⁵उहइ समइ ईसू भीड़े स कहेस, "तू पचे तरवारन, लाठियन क संग मोका धरवावइ अइसे काहे आइ अहा जइसे कउनो डाकू क धरइ आवत हीं? मई हर दिन मंदिर मैं बइठा उपदेस देत रहत हउँ अउर तू पचे मोका नाही धर्या।" ⁵⁶मुला इ सब कछू घटि गवा कि नबियन क लिखा पूर होइ।" फिन ओकर चलन ओका तजि क पराय गएन।

यहूदी नेतन क समन्वा ईसू क पेसी

(मरकुस 14:53-65; लूका 22:54-55, 63-71;

यूहन्ना 18:13-14, 19-24)

⁵⁷ईसू क जउन धरे रहेन, उ पचे ओका काइफा नाउँ क महायाजक क समन्वा लइ गएन। हुवाँ धरम

सास्तिरियन अउर बुजुर्ग यहूदी नेतन भी ऐकट्टा भएन। ⁵⁸पतरस ओसे दूर-दूर रहत ओकरे पाछे पाछे महायाजक क अंगना क भितरे तलक चला गवा। अउर फिन अंत देखइ हुवाँ पहरेदारन क संग बइठ गवा।

⁵⁹मुख्ययाजकन समूची यहूदी महासभा क संग ईसू क मउत क सजा देइ बरे ओकरे खिलाफ कउनो झूठा जुर्म ढूँढ़इ बरे जतन करत रहेन। ⁶⁰मुला ढूँढ़ नाही पाएन। जदपि बहोत स झूठे गवाहन अगवा बढिके झूठ बोलेन। आखिर मैं दुइ मनई अगवा आएन। ⁶¹अउर बोलेन, "इ कहे रहा, 'मई परमेस्सर क मंदिर क तहस नहस कइ सकत हउँ अउर तीन दिन मैं फिन बनाइ सकत हउँ।'"

⁶²फिन महायाजक खड़ा होइके ईसू स पूछेस, "का जवाबे मैं तोहका कछू नाही कहइ क अहइ कि इ मनइयन तोहरे खिलाफ इ का साच्छी देत अहई?" ⁶³मुला ईसू खमोस रहा।

फिन महायाजक ओसे पूछेस, "मई तोहका साच्छत परमेस्सर क सपथ देत हउँ, हमका बतावा का तू परमेस्सर क पूत मसीह अहा?"

⁶⁴ईसू जवाब दिहस, "हाँ, मई अहउँ। मुला मई तोहका बतावत हउँ कि तू पचे मनई क पूत क उ परम सक्तीवाला क दाहिन कइँती बइठा अउर सरगे क बदरवन प आवत हाली ही देखब्या।"

⁶⁵महायाजक इ सुनिके ऐतना गुस्साइ गवा कि आपन ओढ़ना फाड़त भवा बोला, "इ जउन बातन कहेस ह उ सब परमेस्सर प कलंक लगाएस ह। अब हमका अउर जिआदा साच्छी न चाही। तू पचे ऐका परमेस्सर क खिलाफ कहत सुन्या ह।" ⁶⁶तू पचे का सोचत अहा?"

जवाबे मैं उ पचे बोलेन, "इ अपराधी अहइ। ऐका मरि जाइ चाही।"

⁶⁷फिन उ सबइ ओकरे मुँहना प थूकेन अउ ओका घँसा स मारेन। कछू थप्पड़ दिहेन ⁶⁸अउर कहेन, "हे मसीह! भविस्सबाणी करा कि उ कउन अहइ जउन तोहका थोकरेस ह!"

पतरस क ईसू क न मानब

(मरकुस 14:66-72; लूका 22:56-62;

यूहन्ना 18:15-18, 25-27)

⁶⁹पतरस अबहीं अंगना मैं बाहरे बइठा रहा कि एक ठु नउकरानी लगे आइ अउर बोली, "तू भी तउ उहइ गलील क ईसू क संग रह्या।"

⁷⁰मुला सबइ क समन्वा पतरस मुकर गवा। उ कहेस, "मोका पता नाही तू का कहति अहा।"

⁷¹फिन उ इयौड़ी तलक गवा ही रहा कि एक दूसर लरिकि देखेस अउर जउन मनई हुवाँ रहेन, ओनसे बोली, "इ मनई नासरत क ईसू क संग रहा।"

⁷²एक दाई फिन पतरस इन्कार करेस अउर सपथ खत भवा कहेस, "मई उ मनई क नाही जानत हउँ।"

⁷³तनिक देर पाछे हुवाँ खड़ा लोग पतरस क लगे गएन अउर ओसे बोलेन, "तोहार बोलइ क लहजा स साफ लागत ह कि तू असिल मँ ओनही मँ स एक अहा।"

⁷⁴तब पतरस आपन क धिक्कारइ लाग अउर सपथ खाएस, "मई उ व्यक्ति क नाही जानत हउँ।" तबहिं मुर्गा बाँग दिहस। ⁷⁵तबबइ पतरस क उ याद होइ आवा जउन ईसू ओसे कहे रहा, "मुर्गा कबाँग देइ स पहिले तू तीन दाई मोका नकार देब्या।" तब पतरस बाहेर चला गवा अउ फूट फूट क रोवइ लाग।

ईसू क पीलातुस क अगाव पेसी

(मरकुस 15:1; लूका 23:1-2; यूहन्ना 18:28-32)

27 दूसर दिन बड़े भिन्सारे सबइ ही मुख्ययाजकन अउर बुजुर्ग यहूदी नेतन ईसू क मरवाइ डावइ क एक चाल चलेन। ²फिन उ पचे ओका बाँध के लइ गएन अउर राज्यपाल पिलातुस क सौँप दिहन।

यहूदा क आत्महत्या

(प्रेरितन क काम 1:18-19)

³ईसू क धरवावइ वाला यहूदा जब देखेस कि ईसू क दोखी ठहराइ दीन्ह ग अहइ, तउ उ बहोत पछतान। अउर उ याजकन तथा यहूदी नेतन क चौँदी क तीस रूपया लउटाइ दिहस।

⁴उ कहेस, "मई एक बे अपराधी क मार डावइ बरे धरवाइ क पाप कीन्ह ह।"

एँह प मनई कहेन, "हम पचेन क का! इ तोहार आपन मामिला अहइ।"

⁵एँह प यहूदा चौँदी क ओन रूपयन क मंदिर क भितरे लोकाइके चला गवा अउर फिन बाहेर जाइके आपन क फाँसी लगाएस।

⁶मुख्ययाजकन उ सब चौँदी क सिक्कन क उठाइ लिहन अउर कहेन, "हमारे व्यवस्था क मुताबिक इ धन क मंदिर क खजाना मँ धरब नीक नाही काहेकि एँकर प्रयोग कउनो क मार डावइ बरे कीन्ह ग रहा।" ⁷यह बरे उ पचे उ रूपयन क यरूसलेम मँ बाहेर स आवइ वाले मनइयन क मरि जाए प गाइइ बरे कोहारे क खेत खरीदे क फैसला कीन। ⁸यह बरे आजु ताई इ खेत 'लहू क खेत' क नाउँ स जाना जात ह। ⁹इ तरह, नबी यिर्मयाह क कहा भवा बचन पूर होइ ग:

"उ पचे चौँदी क तीस सिक्का बरे, उ रकम जेका इम्राएल क मनइयन ओकरे बरे देब तइ किहे रहेन। ¹⁰अउ पभू क जरिए मोका दीन्ह गवा हुकुम क मुताबिक ओसे कोहारे क खेत खरीदेस।"*

पिलातुस क सवाल ईसू स

(मरकुस 15:2-5; लूका 23:3-5; यूहन्ना 18:33-38)

¹¹एँकरे बीच मँ ईसू राज्यपाल क समन्वा पेस भवा। राज्यपाल ओसे पूछेस, "का तू यहूदियन क राजा अहा?" ईसू कहेस, "हाँ, मई हउँ।"

¹²दुसरी कइती जब मुख्ययाजकन अउर बुजुर्ग यहूदी नेतन ओह प देख लावत रहेन तउ उ कउनो जवाब नाही दिहस।

¹³तब पिलातुस ओसे पूछेस, "का तू नाही सुनत अहा कि उ सबइ तोह प केतना देख लगावत अहइ?"

¹⁴मुला ईसू पिलातुस क कउनो भी देख क जवाब नाही दिहस। पिलातुस क एँह प बहोत अचरज भवा।

ईसू क छोड़इ मँ पिलातुस सफल नाही भवा

(मरकुस 15:6-15; लूका 23:13-25; यूहन्ना 18:39-19:16)

¹⁵फसह क त्योहार क अउसर प राज्यपाल क रीति रही कि उ कउनो भी एक कैदी क, जेका भीड़ चाहत रही, ओनके बरे छोड़ दीन्ह जात रहा। ¹⁶उहइ समइया बरअब्बा नाउँ क एक बदनाम कैदी हुवाँ रहा। ¹⁷तउ जब भीड़ आइके एकट्ठी होइ गइ तउ पिलातुस ओसे पूछेस, "तू का चाहत बाट्या, मई तोहरे बरे केका छोड़ि देउँ, बरअब्बा क या उ ईसू क, जउन मसीह कहा जात ह?" ¹⁸पिलातुस जानत रहा कि उ पचे ओका मने मँ डह क कारण धरवाइ दिहेन ह।

¹⁹पिलातुस जब निआव क आसन प बइठा रहा तउ ओकर पत्नी ओकरे लगे एक संदेसा पठएस: "उ सीधा साँच मनई क संग कछू जिन कइ बइट्या। मई ओकरे बारे मँ एक तु सपन देखिउँ ह जेसे मई आज सारा दिन भइ बेचइन रही।"

²⁰मुला मुख्ययाजकन अउर बुजुर्ग यहूदी नेतन भीड़े क बगदाएन, फुसलाएन कि उ पिलातुस स बरअब्बा क छोरि देइ क अउर ईसू क मरवाइ डावइ बरे कहेन।

²¹जवाबे मँ राज्यपाल ओसे पूछेस, "दुइनउँ कैदियन मँ स कउनो एक बरे केका मोसे छुरवावइ बरे तू पचे चाहत बाट्या?"

उ पचे जवाब दिहन, "बरअब्बा का।"

²²जब पिलातुस ओसे पूछेस, "तउ मई, जउन मसीह कहा जात बा उ ईसू क का करउँ?"

उ सबइ कहेन, "ओका क्रूस प चढ़ावा!"

²³पिलातुस पूछेस, "काहे, उ कउन अपराध किहेस ह?" मुला उ सबइ तउ अउर जिआदा चिचियाने, "ओका क्रूस प चढ़ाइ द्या।"

²⁴पिलातुस देखेस कि अब कउनो फायदा नाही। मुला दंगा भइकइ क बा। तउ उ तनिक पानी लिहस अउर भीड़े क समन्वा आपन हाथ धोएस, उ बोला, "इ मनई क लहू स हमार कउनो जिम्मेदारी नाही। यह तोहार मामिला बा!"

25जवाबे में सब लोगन कहेन, “एँकरे मउत क जवाबदेही हम अउ हमार लरिकन मान लेत हैं।”

26तब पिलातुस ओनके बरे बरअब्बा क छोरि दिहस अउर ईसू क कोड़वा स पिटवाइ क क्रूस प चढ़ावइ बरे सौंपि दिहस।

ईसू क मजाक

(मत्कुस 15:16-20; यूहन्ना 19:2-3)

27फिन राज्यपाल क सिपाही ईसू क राज्यपाल निवास क भितरे लइ गएन। हुवाँ ओकरे चारिहुँ कइँती सिपाहियन क फउज एँकट्टी होइ गइ। 28उ पचे ओकर ओढ़ना उतरवाइ दिहेन अउ चमचमात लाल रंगे क ओढ़ना पहिराइ क 29कॉटे स बनवा एक तान ओकरे सिरें प ढाँपि दिहस। ओकरे दाहिन हाथ में ए तु नरकट थमाइ दिहेन ओकरे समन्वा आपन घोटैना तलक निहुरि क ओकरे हँसी करत बोलेन, “यहूदियन क राजा अमर रहइ!”

30फिन उ पचे ओकरे मुँहना पर थुकेन, डंडी छोरन अउर ओकरे मुँडवा प सुटकइ लागेन। 31जब उ पचे ओकर हँसी उड़ाइ चुकेन तउ ओकर पोसाक उतारेन अउर ओका ओकर आपन ओढ़ना पहिराइ क क्रूसे प चढ़ावइ बरे लइ चलेन।

ईसू क क्रूस प चढ़ाउब

(मत्कुस 15:21-32; लूका 23:26-43; यूहन्ना 19:17-27)

32जब उ पचे बाहर जात ही रहेन तउ ओनका कुरेनी क निवासी समौन नाउँ क एक मनई मिलि गवा। उ पचे ओह प जोर डाएन कि उ ईसू क क्रूस उठाइके चलइ। 33फिन जब उ पचे गुलगुता नाउँ क जगह (जेकर अरथ अहइ “खोपड़ा क ठउरा।”) पहुँचेन। 34तउ उ पचे ईसू क अंगूर क रस में पित्त* नाइ क पिअइ बरे दिहना मुला जब ईसू ओका चखेस तउ पिअइ स मना किहस। 35तउ उ सबइ ओका क्रूसे प चढ़ाइ दिहन अउर ओकरे ओढ़ना क आपुस में बाँटइ बरे पाँसा खेलिके आपन हाँसा लिहना। 36एँकरे पाछे हुवाँ बइठिके ओह प पहरा देइ लागेन। 37उ पचे ओकर जुर्म पत्तर लिखिके ओकरे मुँड़े पर लटकाइ दिहेन, “इ यहूदियन क राजा ईसू अहइ।” 38इहइ समइ ओकरे संग दुइ डाकू भी क्रूसे प चढ़ाइ जात रहेन एक तु ओकरे दाहिन अउर दूसर ओकरे बाई कइँती। 39नगिचे स होइ क जात मनइयन आपन मुँड़ी झमकावत ओका बेज्जत करत रहेन। 40उ पचे कहत रहेन, “अरे मंदिर क गिराइके तीन दिना ओका फिन स बनवइया, आपन क तउ बचावा। जदि तू परमेस्सर क पूत अहा तउ क्रूसे स तरखाले उतरि आवा।”

पित्त एक अइसी चीज अहय जेका अंगूर क रस में मिला कर पिअब स पीढा कम होय जात हय।

41अइसे ही मुख्ययाजकन, धरम सास्तिरियन अउर बुजुर्ग यहूदी नेतन क संग ओकर इ कहिके हँसउआ करत रहेन: 42“दूसर क उद्धार करइया इ आपन उद्धार नाहीं कइ सकत। इ इम्राएल क राजा अहइ। इ क्रूसे स अबहीं तरखाले उतरइ तउ एँका मान लेइ। 43इ परमेस्सर में बिसवास करत ह। तउ जदि परमेस्सर अब एँका बचाइ लेइ। आखिर इ तउ कहत भी रहा ‘मई परमेस्सर क पूत हउँ।’” 44उ सबइ लुटेरन भी जउन ओकरे संग क्रूसे प चढ़ाइ गएन रहा, ओकर अइसा ही हँसउआ भवा।

ईसू क मउत

(मत्कुस 15:33-41; लूका 23:44-49; यूहन्ना 19:28-30)

45फिन समूची धरती प दुपहर स तीन बजे तलक आँधियारा छावा रहा। 46कउनो तीन बजे क लगभग ईसू ऊँच अवाजे में चिल्लान, “एली, एली, लमा सबवतनी” अरथ, “मोरे परमेस्सर, हे मोरे परमेस्सर, तू मोका काहे बिसार दिहा ह?”

47हुवाँ खड़ा भवा मनइयन में स कछू इ सुनिके कहइ लागेन, “यह एलियाह क पुकारत अहइ।”

48फिन फउरन ओनमाँ स एक मनई धावत सिरका में बोरा भवा स्पंज एक डंडी प लटकाइ क लइ आवा अउर ओका ईसू क चूसइ बरे दिहस। 49मुला दूसर लोग कहत रहेन, “छोड़ द्या, देखित ह कि एलियाह एँका बचावइ आवत ह कि नाहीं।”

50ईसू फिन एक दाई ऊँच सुरे में चिल्लाइ क प्राण तजि दिहस।

51उहइ समइया मंदिरे क परदा ऊपर स तरखाले तलक फाटिके दुइ टुकड़न में बाँटि गवा। धरती डोल उठी। चट्टानन फाट पड़िन। 52हियाँ तलक कब्रन खुलि गइन अउर परमेस्सर क मरा भएन भक्तन क बहोतन सररी जी उठेन। 53उ पचे कब्रन स निकरि आएन अउर ईसू क जी जाइ क पाछे पवित्तर नगर में जाइके बहोतन क देखाइ दिहेन। 54रोम क फऊजी नायक अउर ईसू क पहरुअन भूइडोल अउर वइसी ही दुसर घटना क लखिके डेराअ गएन। उ पचे बोलेन, “ईसू असिल में परमेस्सर क पूत रहा।”

55हुवाँ बेरि के स्त्रियन खड़ी रहिन जउन दूरे स लखत रहिन। उ पचे ईसू क देखभाल बरे गलील स ओकरे पाछे पाछे आवत रहिन। 56ओनमाँ स मरियम मगदलीनी, याकूब अउर थोसेस क महतारी मरियम तथा जब्दी क बेटवन की महतारी रही।

ईसू क दफन

(मत्कुस 15:42-47; लूका 23:50-56; यूहन्ना 19:38-42)

57साँझ क समइ अरिमतियाह सहर स यूसुफ नाउँ क एक धनवान आवा उ खुद ही ईसू क चेला होइ गवा।

यूसुफ़ पिलातुस क लगे गवा अउर ईसू क सब माँगिस।⁵⁸तबहिं पिलातुस हुकुम दिहस कि सब ओका दइ दीन्ह जाइ।⁵⁹यूसुफ़ ल्हास लइ लिहस अउर ओका एक नई चदरे में लपेटिके⁶⁰आपन खुद क नई कब्र में धइ दिहस। जेका उ चट्टाने में काटि के बनवाए रहा। फिन उ चट्टाने क दरवाजे प एक बड़का सा पाथर लुढ़काएस अउर चला गवा।⁶¹मरियम मगदलीनी अउर दूसर स्त्री मरियम हुवाँ कब्रे क समन्वा बइठी रहिन।

ईसू क कब्रे प पहरा

⁶²अगले दिन जब सुक्रवार बीत गवा तउ मुख्ययाजकन अउर फरीसियन पिलातुस स मिलइ गएन।⁶³उ पचे कहेन, “महासय हमका याद बा कि इ छलिया, जब उ जिअत रहा, कहे रहा, ‘तिसरे दिन मई फिन जी उठबा।’⁶⁴तउ हुकुम द्या कि तिसरे दिना तलक कब्रे प चौकसी कीन्ह जाइ। जेसे अइसा न होइ कि ओकर चलन आइके ओकर ल्हास चोरॉइ लइ जाई अउर मनइयन स कहई, उ मरे भवा मैं स जी गवा। इ दूसर छल पहिले छल स जिआदा बुरा होई।”⁶⁵पिलातुस ओसे कहेस, “तू पहरा बरे सिपाही लइ जाइ सकत ह। जा जइसी चौकसी कइ सकत ह, करा।”⁶⁶तब उ पचे चला गएन अउर उ पाथर प मोहर लगाइके अउर पहरुअन क हुवाँ बइठाइ के कब्र क हिफाजत करइ लागेन।

ईसू क फिन स जी उठब

(मरकुस 16:1-8; लूका 24:1-12; यूहन्ना 20:1-10)

28 सबित क बाद जब रविवार क भिन्सारे पउ फाटत रही, मरियम मगदलीनी अउर दूसर स्त्री मरियम कब्र क जाँच करइ आइन।

²काहेकि सरगे स पभू क एक दूत हुवाँ उतरा रहा, यह बरे उ समइ बहोत बड़का भुइँडोल आवा। सरगदूत हुवाँ आइके पाथर क लुढ़काएस अउर ओह पर बइठ गवा।³ओकर रूप अकासे क बिजरी क नाई चमचमात रहा अउर ओकर ओढ़ना बरफ जइसे उज्जर रहेन।⁴उ सिपाहियन जउन कब्रे प पहरा देत रहेन, डर क कारण डेरानेन अउर अइसा होइ गएन जइसे मरि गवा होई।

⁵तब सरगदूत बोला अउर उ ओन स्त्रियन स कहेस, “डेराअ जिन, मई जानत हउँ कि तू ईसू क खोजति अहा जेका, क्रूस प चढ़ाइ दीन्ह गवा रहा।⁶हियाँ नाहीं बा। जइसा कि उ कहेस, उ मउत क पाछे फिन जिआइ दीन्ह जाई। आवा, उ ठउरे क लखा, जहाँ उ ओतरा रहा।⁷अउ फिन तुरंत जा अउर ओकरे चलन स कहा, ‘उ

मरे हुअन मैं स जिआइ दीन्ह जाई अउर अब उ तोहसे पहिले गलील क जात अहइ। तू ओका हुवाँ देखब्बा।’ इहइ मई तोहका बतावइ आवा हउँ, ओका याद राखा।”

⁸उ स्त्रियन फउरन ही कब्र क तजि दिहना उ पचे डर अउर आनंद स खुस होइ गइन। फिन ईसू क चलन क इ बतावइ उ पचे धाएन।⁹एकाएक ईसू ओनसे भेटेस अउर बोला, “अरे तू!” उ पचे ओकरे लगे आइन, उ पचे ओकर गोड़वा धइ लिहन अउर ओकर आराधना करेन।¹⁰तब ईसू ओनसे कहेस, “डेराअ जिन, मोरे भाइयन क लगे जा, अउर ओनसे कहा कि उ पचे गलील बरे रवाना होइ जाई, हुवँइ उ सबइ मोका देखिहई।”

यहूदी नेतन क घटना क बारे मैं बताएन

¹¹अबहीं उ स्त्रियन आपन राहे मैं ही रहिन कि कछू सिपाही जउन पहरुअन मैं रहेन, सहर मैं गएन अउर जउन कछू भवा, उ सब क खबर मुख्ययाजकन क जाइके सुनाएन।¹²तउ उ सबइ बुजुर्ग यहूदी नेतन स मिलिके एक चाल चलने। उ पचे सिपाहियन क बहोतइ धन दइके।¹³कहेन कि उ पचे मनइयन स कहई, “ईसू क चलन राति क आएन अउ जब हम सबइ सोवत रहेन ओकरे सब क चुराइ लइ गएन।¹⁴जदि तोहार इ बात राज्यपाल तक पहुँचत ह तउ हम ओका समझाइ लेब अउर तोहरे प कउनो आँच न आवइ पाई।”¹⁵पहरुअन धन लइके वइसा ही करेन, जइसा ओनका बतावा ग रहा। अउ इ कहानी यहूदियन मैं आज तलक इहइ रूप मैं सँचर गइ अहइ।

ईसू क आपन चलन स बातचीत

(मरकुस 16:14-18; लूका 24:36-49; यूहन्ना 20:19-23;

प्रेरितन क काम 1:6-8)

¹⁶फिन ग्यारहू चलन गलील मैं उ पहाड़ी प पहुँचेन जहाँ बरे ईसू कहे रहा।¹⁷जब उ पचे ईसू के निहारेन तउ ओकर आराधना करेन। जदपि कछूक मनवा मैं सक रहा।¹⁸फिन ईसू ओनके लगे जाइके कहेस, “सरगे मैं अउ धरती प सबइ हक मोका दइ दीन्ह गवा अहई।¹⁹तउ, जा अउर सब देसन क मनइयन क मोर चलन बनावा। तोहका इ काम परमपिता क नाउँ मैं, पूत क नाउँ मैं अउर पवित्र आत्मा क नाउँ मैं ओनका बपतिस्मा दइके पूर करब अहइ।²⁰उ सबइ हुकुम जउन मई तोहका दियो हउँ, ओनका ओन प चलब सिखावा। अउर याद राखा इ सुस्टि क अंत ताई मई हमेसा तोहरे संग रहबा।”

License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at distribution@wbtc.com.

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: info@wbtc.com

WBTC's web site – World Bible Translation Center's web site: <http://www.wbtc.org>

Order online – To order a copy of our texts online, go to: <http://www.wbtc.org>

Current license agreement – This license is subject to change without notice. The current license can be found at: <http://www.wbtc.org/downloads/biblelicense.htm>

Trouble viewing this file – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

Viewing Chinese or Korean PDFs – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>